

ITATITANIL DE CRISTO, YEJUA IN SAN MATEO, QUIJCUILOJ NIJÍN YANGUIC TAJTOLTZIN DE DIOS TEN CUALCUI NE NEMAQUIXTILIS

**Nican in Mateo techtapohuij de ne
achto huejcautetatme de Jesucristo
Temaquixtijque**

(Lc. 3.23-38)

1 Nican pehua in tajcuilamat ten cuica tocamye de neque huejcautetatme de Jesucristo; nochin yejuan panocque ya. Huan Jesucristo catca teconeu de rey David, huan no teconeu den Abraham. ²Huan in tetat Abraham quiscaltij in Isaac; huan niman Isaac catca no tetat de Jacob; huan niman in Jacob catca no tetat de Judá huan iicnihuan. ³Huan in tetat Judá ihuan in tenan Tamar quiscaltijque in Fares huan Zara; huan niman in Fares catca no tetat de Esrom; huan niman in Esrom catca no tetat de Aram. ⁴Huan in tetat Aram quiscaltij in Aminadab; huan niman in Aminadab catca no tetat de Naasón; huan niman Naasón catca no tetat de Salmón. ⁵Huan in tetat Salmón ihuan in tenan Rahab quiscaltijque in Booz; huan niman in tetat Booz ihuan in tenan Rut quiscaltijque in Obed; huan niman in Obed catca no tetat de Isaí. ⁶Huan in tetat Isaí quiscaltij in tetat rey David;

huan in rey David ihuan isihuan de Urías quiscaltijque in Salomón. ⁷Huan in tetat Salomón quiscaltij Roboam; huan niman in Roboam catca no tetat de Abías; huan niman in Abías catca no tetat de Asa. ⁸Huan in tetat Asa quiscaltij in Josafat; huan niman in Josafat catca no tetat de Joram; huan niman in Joram catca no tetat de Uzías. ⁹Huan in tetat Uzías quiscaltij in Jotam; huan niman in Jotam catca no tetat de Acáz; huan niman in Acáz catca no tetat de Ezequías.

¹⁰Huan in tetat Ezequías quiscaltij in Manasés; huan niman in Manasés catca no tetat de Amón; huan niman in Amón catca no tetat de Josías. ¹¹Huan in tetat Josías quiscaltij in Jeconías huan iicnihuan tech in tonalme cuac quiniyacque queme presos nochi in pueblojuani de Israel hasta in país de Babilonia. ¹²Nimampa de que quiniyacque in pueblojuani de Israel hasta Babilonia, ijcuacón in tetat Jeconías quiscaltij in Salatiel; huan niman in Salatiel catca no tetat de Zorobabel. ¹³Huan in tetat Zorobabel quiscaltij in Abiud; huan niman in Abiud no catca tetat de Eliaquim; huan niman in Eliaquim catca no tetat de

Azor. ¹⁴Huan in tetat Azor quiscaltij in Sadoc; huan niman in Sadoc no catca tetat de Aquim, huan niman in Aquim no catca tetat de Eliud. ¹⁵Huan in tetat Eliud quiscaltij in Eleazar; huan niman in Eleazar no catca tetat de Matán, huan niman in Matán catca no tetat de Jacob.

¹⁶Huan in tetat Jacob quiscaltij in José naquen iyoquich María. Huan María catca inantzin de Jesús, huan yejuan quitocaytijque in ioquichpilconetzin Cristo Temaquixtijque. ¹⁷Huan desde ne tonalme cuac nemico in Abraham ijcuacán peuque motetecpantihualajque ne majtactionnahui tetatme hasta ejcoc in tonalme cuac nemico in rey David. Huan no desde ne tonalme cuac nemico in rey David, ijcuacán peuque motetecpantihualajque ocsé majtactionnahui tetatme hasta ejcoc in tonalme cuac quinuiyacque in pueblojuani de Israel queme presos hasta in país de Babilonia. Huan no desde ne tonalme cuac quinuiyacque in pueblojuani de Israel queme presos ijcuacán peuque motetecpantihualajque ocsé majtactionnahui tetatme hasta ejcoc in tonalme queman yolico in oquichpilconetzin Cristo Jesús.

Nican tajtoa de queniu yolico in oquichpil Jesús

(Lc. 2.1-7)

¹⁸Ijcón yolico in oquichpil Jesucristo: María catca inantzin de Jesucristo. Yetoya ya tajtol ya de que mosennamictisque in María ihuan in José. Huan ijcuacán ayamo sen yetoyaj. Huan mochihuac que in María cocoxayetoya ya ica pili porín ica ne chicahualis de Yecticatzin Espíritu.

¹⁹Huan in José catca iyoquich in María huan catca yolmelaucatagat huan amo quinequía quipinautisquía in María senteixteno. Huan in José

quinemiliaya mosecocahuas de María huan amo quinequía ma quimatican nión ocsé pueblojuani. ²⁰Huan ijcón yejua quinemiliaya quisecocahuas in María. Huan cuac tacochitztoya in José, ijcuacán monextilijtzinoco se ángel taquehual de Dios huan quilij ijcuín:

—José titeconeu de rey David, amo ximomouti de ticselis in María queme mosihuatzin, porín in Yecticatzin Espíritu quiscaltij ya in pili ten María quipixtoc ya. ²¹Huan niman in María quiyolitis se iconetzin huan quitocaytis Jesús Temaquixtijque, porín Yejuatzin ne quinmaquixtis nochi in pueblojuani den senmanahuac de nintajtacoluan.

²²Huan nochi nijín mochihuac para ma ijcón motamichihua in tajtol ten Totecotzin quijtoja ica por ne tanahuatijque Isaías cuac quijcuiloj ijcuín:

²³Xiquitacan, se suapil ten ayamo quipía se tagat, yejua ne mopilcuis huan quiyolitis se oquichpil huan quitocaytis Emanuel,

ten quijtosnequi “Totajtzin Dios tohuan yetica”.

²⁴Huan cuac in José xipetanic den nicochilis, ijcuacán quichiuhac ijcón queme quinajnahuatico in ángel taquehual de Dios. Huan José quiselij in María queme nsihuatzin. ²⁵Pero ayamo sen yetoyaj queme namicuani hasta in tonal cuac in María quiyolitis in tayecancaoquichpil. Huan yejuan quitocaytijque in oquichpil Jesús.

Nican tajtoa de queniu ne tamatinime magos quicalpanotoj in oquichpilconet Jesús

2 Huan Jesús yolico tech in pueblo den monotza Belén ten de itatilanal in Judea tech in tonalme cuac Herodes catca tayecanque rey itech nojón país. Ijcuacán ejcotihualayaj tech ne pueblo de Jerusalén sequi taca semi

tamatinime den hualayaj iquisayampa in tonal; huan nijinques tamatinime catcaj in magos. ²Huan in magos matajtantihualajque ijcuín:

—¿Can yetoc in tayecanque den judíos ten yequin yolico? Tejuan tiquitacque nepa iquisayampa in tonaltzin se hueyi sitalin de Yejuatzin ten techualnextiliaya campa yetoc in oquichpil Jesús. Huan tejuan tihualajque nican para ticmohuistilisque Yejuatzin.

³Huan cuac in rey Herodes quicayic nijín tajtolme, ijcuacán pehuac moyolcuejmoloa. Huan hasta nochi in tagayot den Jerusalén no moyolcuejmolojque. ⁴Ijcuacán in tayecanque Herodes tanahuatij ma mosentilican nochi in tayecanani tiopixcame huan in tanextiliani den tanahuatil de Moisés. Huan de ompa in Herodes quintajtanilij ijcuín:

—¿Xe ipa nanquimatocque ya can yolis in oquichpil ten monotza Cristo Tamaquixtijque?

⁵Huan yejuan quinanquilijque ijcuín: —Tech ne pueblo de Belén ten itatilanal Judea, ompa yolis. Porín in tanahuatijque de Dios quijcuilojca ya ijcuín:

⁶Huan tejua pueblo de Belén, tipohui campa in Judá, tejua amo titziqitzin.

Ta, tihueyichiuque ya itech in tayecanani de ne pueblo de Judá.

Porín motzalan ehuas se tayecanque naquen quinyecanas nochi nopueblojcahuan de Israel.

⁷Ijcuacán Herodes quinichtacanotzac in tamatinime in magos huan quinyectajtoltiaya catijyejua tonal monextij ne hueyi sitalin. ⁸Huan de ompa in rey Herodes quintitanic in magos hasta ne pueblo de Belén. Huan quinilij ijcuín:

—Xiyacan ompa xicyectemocan xicyecmatican toni chicahualis

cualcui ne oquichpil ten yequin yolico. Huan cuac nancajsisque ya ne oquichpil, ijcuacán nechnejmachtican para ma nejua no niyás huan para nicmohuistilitiu.

⁹Huan cuac ijcón quicaquilijque in rey, ijcuacán yajque in tamatinime in magos. Huan in sitalin ten quitacque de ne iquisayampa tonal ijcón quinyecanaya in magos huan quinaixxitij huan quinnextilij campa huetztoya in oquichpil Jesús. ¹⁰Huan cuac in tamatinime in magos ejcotihualayaj ya, huan cuac quitacque ya in sitalin, ijcuacán semi moyolpacticque. ¹¹Huan cuac calactiyaj ya calijitca, ijcuacán quitacque in oquichpil ihuan inantzín María. Huan motancuaquetzatoj huan motentocatoj iixpantzinco para quimohuistiliayaj in oquichpilconet. Huan de ompa niman quitapojque in cajones tenica cualcuafaj ninricojyo. Huan quitayocolijque yejua nijín taman; in oro ten cajcahuanía, huan in copal, huan sequi ajuiyacachoquilot ten monotza mirra. ¹²Huan niman Totajtzin Dios quinnejmachtij huan quinmatiltij in tamatinime in magos itech nincochilis ma amo monequía ma panocan campa yetoya in rey Herodes. Ijcuacán in magos quitachicopahuijque in pueblo de Jerusalén huan ijcón yajque itech ninpueblo.

Nican tajtoa de queniu mocholotij José ihuan María huan Jesús hasta país de Egipto

¹³Huan satapan cuac yajque ya in tamatinime magos, ijcuacán se ángel taquehual de Dios quionmonextilij cuac tacochiltzoya in José huan quilij ijcuín:

—Ximoquetza, José, huan xicui mooquichpilconeu ihuan ninantzín huan xiyacan xicholocan huan xiyetotiu tech ne país de Egipto. Huan ompa xiyetotiu hasta cuac nejua ocsepa namechnejmachtis que ximocuepacan,

porín in rey Herodes quiyolnemilijtoc que quitemos in moconeu para quimictis.

¹⁴Huan in José ixpetanic huan moquetzac huan quincuic iconetzin ihuan ninantzin huan yajque cayohual huan ajsicque tech ne pueblo Egipto.

¹⁵Huan ompa yetoyaj hasta in tonal cuac miyic in rey Herodes. Huan ijcón mochihuac ten quijtojca ya Totajtzin Dios itencopa itanahuatijcau cuac ne queman ya quijcuilojca ya ijcuín: “Tech ne país Egipto nicnotzac noconetzin”.

**Nican tajtoa de queniu rey
Herodes tanajnahuatía ma
quinmictican in coneme**

¹⁶Huan cuac in rey Herodes momacac cuenta que in tamatinime magos quicajcayauque ya, ijcuacán yejua mohueyicualantij huan quintitanic soldados ma quinmictican nochi in telpocame de ome xihuit para tani ten calyetoyaj tech ne pueblo Belén huan no tech ne pueblos ten quiyehualojtoyaj Belén. Porín in rey Herodes quimatic que ayamo panoaya ome xihuit desde cuac quilijcay in tamatinime in magos que yolic ya in Jesucristo. ¹⁷Ijcuacán mochihuac ten quijtojca Dios itencopa itanahuatijcau Jeremiás cuac quijcuilojca ijcuín:

¹⁸Mocayic se tajtolis tech ne pueblo Ramá, ten mocaquí huan chocayaj huan yolnejsihuáj huan moyolcocotinémáj.

Yejua ne in tenan Raquel ten chocaya porín momiquilijque ya niconehuan. Huan amo quinequí que acsá quiyoltalisquí porín poliuque ya niconehuan.

¹⁹Huan niman miyic ya in rey Herodes; huan de ompa se ángel taquehual de Dios quimonextilij ocsepa tech icochilis José, cuac in José ompa yetoya tech pueblo de Egipto, huan quilij ijcuín:

²⁰—Ximoquetza, xiquincui moconetzin ihuan ninantzin huan ximoquepacan tech ne pueblo Israel porín micque ya nochi ten quinequíaj quimictisque moconeu Jesús.

²¹Ijcuacán moquetzac José huan cuiyac icones Jesús ihuan inantzin huan yajque ajsicque tech in pueblo Israel. ²²Huan in José quimatic que in tayecanque Arquelao yetoya rey tech ne tal ten pohuí Judea huan yejua tayecantoya iixpatca nitat Herodes. Huan ica ya nojón José momoutiaya huan amo quinequí calyetos ompa tech in pueblo de Judea campa yetoya ne tayecanque Arquelao. Huan Dios quinejmachtij in José ocsepa itech nicochilis ma yohui ma ompa calyetoti tech ne tal ten pohuí Galilea. ²³Huan cuac José ajsito ya tech ne tal de Galilea, ijcuacán ompa calyetoto ya ne pueblo monotza Nazaret. Huan ijcón mochihuac ten quijtojca ya itanahuatijcau de Dios cuac quijcuilojque de Jesús in Temaquistijque ijcuín: “Yejua ne yesqui se pueblojcat de Nazaret”.

**Nican tajtoa de queniu Juan
in Taahuijque quipehualtij ne
nitanojnotzalis ne campa tayiucan
(Mr. 1.1-8; Lc. 3.1-9, 15-17; Jn. 1.19-28)**

3 Huan tech ne tonalme in Juan Taahuijque ajsic tech in Judea tech se tamanisyo campa tayiucan huan quitetapohuijthualaya in yancuic Tajtoltzin de Dios ten cualcui ne nemaquixtilis. ²Huan Juan quiniliaya in tacaquini ijcuín:

—Ximoyolnemilican de namotajtacoluan porín motoquijtoc ya Dios den eluiyactzinco huan quimonequiltis quinyolyecanas huan momasoutos ica ihueyichicahualis nochi itaneltocacahuan.

³Isaías yejua itanahuatijcau de Dios quijcuilojca de nijín Juan Taahuijque cuac quijtojca ya ijcuín:

Mocaquiti se tagat ten
tanajnahuatía campá tayiucan
huan quijtoj ijcuín:

“Xitayectalijtiyacan ninemilispán
den Totecotzin.

Huan xicmejmelauiyacan niojuan
campa hual panotihualas”.

⁴Huan ne Juan motaquentiaya ica
camellojtoymit den taijqutil, huan
tajcuilpitoya ica se cuetax huan
quicuaya chapolinme huan cuoutajnecti.

⁵Huan hualayaj miacque pueblojuani
quicaquiquij in Tajtoltzin de Dios
den Juan quintetapohuiaya. Huan no
hualajque nochi pueblojuani ten pohuíaj
ne Jerusalén huan ten pohuíaj ne Judea,
huan nochi ten calyetoyaj campá panoaya
in hueyíat Jordán. ⁶Huan ijcón in Juan
quinahuía in tacaquini ica at tech in
hueyíat den monotza Jordán como yejuan
moyolnemiliyaj den nintajtacoluan.

⁷Huan ijcón in Juan quitac que
hualajque miacque fariseos ihuan
in saduceos huan yejuan quinequíaj
ma quinhui yejua. Ijcuacán in Juan
quinilij ijcuín:

—iNamejuan nantacajcayahuani
san queme in cohume! ¿Aconí
namechnejmachtij ya que monequi
nanmochololtisque de ne hueyi
tatzacuilitis ten hualajtoc ya?

⁸Xichipaucanemican para ijcón ixnesis
senteixteno que nanmoyolnemilijque ya
de namotajtacol huan nanyolchipaque
ya iixpantzinco Dios. ⁹Huan ma

amo ximoyolueyichihuacan san
namejuan cuac nanquinemilíaj que
namejuan nanteixuihuan den ne
hueyi tanahuatijque de Dios Abraham.
Porín xicmatican que amo teyica
namechpalehuis ica nojón tajtólme.
Porín namechyequilía que Dios cuali
hueli quinchihuas ica nijín teme
ocsequin teixuihuan de Abraham ten
tacautamatinemij ihuantzinco Dios.

¹⁰Huan no in Juan quinilij in
tacaquini ijcuín:

—Huan axcan ya como amo
nanmoyolnemilíaj de namotajtacoluan,
ijcuacán namejuan nanyesque
queme cuoume ten amo teyi taquij.
Huan nochi cuoume ten amo cuicaj
taquilot ten cuali, ijcón in tequitini
quinnaluayojtequisque ica hacha, huan
quitamotasque tech tit ma chichinahui.

¹¹Huan nejuatzin de yec melau,
namechahui ica at queme se nexcuitil
que nanmoyolnemilijque ya den
namotajtacol huan nanyolchipaque
ya. Huan naquen nechualtojtoca,
Yejuatzin ne namechquemilos
huan namechylpepexocaltis
ica in Yecticatzin Espiritu
huan namechylchipahuas de
namotajtacoluan ijcón queme in tit
quichipahua tensá. Huan Yejuatzin
cachi quipía hueyi chicahualis, huan
nejua niamoteyi nichiuque, huan amo
nechnamiquis ma nicuica nitegac.

¹²Huan ne Temaquixtijque quichihuati
ijcón queme tejuan ticchihuaj cuac
ticchipahuaj in trigojtet ica ne
tapipitzaloni. Huan ticololoaj in
trigojtet huan tiquehuaj campá trigojcal
huan in tajsol ticchichinoaj. Huan
tejuan como titacautamatij ihuan ne
Temaquixtijque, ijcuacán Yejuatzin
techsepantalía ihuantzin seco san.
Huan neques ten amo tacautamatij
ihuantzin, yejuan nojonques
quintamotasque campá tatzacuilitis de
tit de amo queman sehuís.

Nican tajtoa de queniu Jesús Temaquixtijque moteahuilij

(Mr. 1.9-11; Lc. 3.21-22)

¹³Ijcuacán Jesús hualehuac de ne
Galileajcopaca huan ejcoco campá Juan
in Taahuijque tech ne atteno den
hueyíat Jordán. Huan Jesús quinequíá
ma in Juan ma quiahuini in Jesús mismo.
¹⁴Huan cuac pehuac quilía, ijcuacán
Juan amo quinequíá quiahuis in Jesús.
Ica ya nojón in Juan quilij ijcuín:

—¿Queyé Tejuatzin tihuala para ma nimitzonahuis? Ta, monequía ma Tejuatzin xinechahui.

¹⁵Ijcuacón in Jesús tananquilij ijcuín:

—Xicsecocahua ten tejua ticnemilíá porín semi quinamiqui ma ticchihuacan Dios itahuelitalis nochi queme Dios quimonequiltíá.

Huan de ompa in Juan motemactij de que quiahuis in Jesús. ¹⁶Huan cuac quiahui ya Jesús, ijcuacón nimantzin Yejuatzin ajcopanquisac den hueyíat. Huan ijcón tatapohuic tech eluiyac huan Jesús quitac in Yecticatzin Espíritu de Totajtzin Dios ten hual temoaya queme se tototzin paloma huan calayic itech Jesús. ¹⁷Huan no ijcón no mocaquic se tajtolis den eluiyactzinco ten Yejuatzin quijtoaya ijcuín:

—Yejuatzin nijín Notasojconetzin tenica semi nimoyolpaquiltíá.

Nican tajtoa de queniu in amocuali Satanás quichihuac ma motajtacolmacani Jesús

Temaquixitjque

(Mr. 1.12-13; Lc. 4.1-13)

4 Huan de ompa in Yecticatzin Espíritu quiyecanac Jesús ne campa tayiucan huan ompa in amocuali Satanás quielehuisuij ica tajtacol in Jesús para ma motajtacolmacani. ²Huan in Jesús mosahuaya nochi ne omepoal tonal huan omepoal yohual huan niman Yejuatzin quimachilij que mayanaya. ³Huan in amocuali Satanás motoquij campa Yejuatzin para quielehuisuij Jesús ica tajtacol ma motajtacolmacani; huan in Satanás quilij ijcuín:

—Como melau Tejuatzin tion Teconetzin de Dios, xicnahuati nijín teme ma mocuepacan panes.

⁴Ijcuacón in Jesús tanaquilij ijcuín:

—Quijtoa in Tajcuilolamatzin de Dios ijcuín: “In taca ma nemican amo

sayó ica in tacualis san. Ta, no ma yolpepexocatinemican ica nochi in tajtolme ten Dios techmactilijtinemi”.

⁵Ijcuacón in amocuali Satanás cuiyac Jesús tech ne mohuistic pueblo de Jerusalén. Huan quitejcoltij itech se tepeyo den tepepan. ⁶Huan in amocuali Satanás quilij Jesús ijcuín:

—Como melau Tejuatzin tion Teconetzin de Dios, ximosencahua xihuetziti de nican hasta talixco. Porín no quijtoa in Tajcuilolamatzin de Dios ijcuín:

Dios quinuaititanis in ángeles taquehualme de Dios ma mitzycpalehuican.

Huan no quijtoa in Tajcuilolamatzin ijcuín:

Ma mitzmatzacuilican in ángeles ica ninmahuan para ma amo ximometzcojcoco ica in teme.

⁷Huan Jesús tanaquilij ijcuín:

—No quijtoa in Tajcuilolamatzin de Dios ijcuín: “Amo xictelpanoltis in tapalehuilis in Totecotzin Dios moyectencahuac de techmactilis”.

⁸Huan ocsepa in amocuali Satanás cuiyac Jesús tech se hueyi tepepan, huan ompa ocsepa in amocuali quinextilij Jesús nochi in pueblojme campa tayecanaj hueyi chihuanime de nican talticpac. Huan no quinextilij nochi ninueyipanchihualisme huan ninricojoyo. ⁹Huan in amocuali Satanás quilij Jesús ijcuín:

—Tacán timotancuaquetzas huan timotentocas noixpan huan tacán tinechmohuistilis, ijcuacón nochi nijín ten tiqiztroc nimitzmactilis tejuatzin.

¹⁰Ijcuacón in Jesús tananquilij ijcuín:

—Niman xiyó ya, tejua tiamocuali Satanás, porín quijtoa in Tajcuilolamatzin de Dios ijcuín: “Ma xicmohuistiliti in Totecotzin to Dios huan sayó Yejuatzin xicmohuiscatequitilijtinemi”.

¹¹Ijcuacón in amocuali Satanás majchihuac; huan de ompa hualajque

in ángeles taquehualme de Dios huan
quipalehuicoj in Jesús.

**Nican tajtoa de queniu Jesús
Temaquixtijque quitzinpehualtij
nitequiu**

(Mr. 1.14-15; Lc. 4.14-15)

¹²Huan cuac in Jesús quicayic ya
que in Juan Taahuijque tzactoya ya
tech in carcel, ijcuacán yajqui Jesús
Galileajcopaca. ¹³Pero Jesús amo
mocahuac tech ipueblo Nazaret. Ta,
yajqui mocaltalito tech in pueblo
Capernaum campa in mar de Galilea
nochi itatilanal de Zabulón huan
Neftalí. ¹⁴Huan ijcón mochiuac
ten quijtojca ya itanahuatijcau de
Dios Isaías cuac quijcuiltojca in
Tajcuilolamatzin de Dios ijcuín:

¹⁵Oncas tanex para in pueblojuani
ten pohuij ihuan Zabulón huan
Neftalí.

Huan oncas tanexilot para in
pueblojuani campa yohui ojme
marcopa huan campa sentapalpa
de ne iquisayampa in tonal den
hueyíat Jordán.

Huan no oncas tanex para in
calyetoni de Galileajcopaca ten
amo pohuíaj judíos.

¹⁶Huan nochi in pueblojuani ten
calyetoyaj tech in tayohuayanilot
den tajtacol, yejuan quitacque ya
se hueyi tanex.

Huan se cualtzin tanexilot
quintahuilij ya nochi pueblojuani
ten calyetoyaj campa
quinmajpachojtoya in yecahuil
de miquilis.

¹⁷Huan de ompa pehuac Jesús
quinnextiliaya huan quiniliaya in
tacaquini ijcuín:

—Ximoyolnemilican de
namotajtacoluan porín motoquijtoc
Dios den eluiyactzinco para ma
quinyolyecanas itaneltocacahuan ica
nihueyichicahualis.

**Nican tajtoa de queniu Jesús
quinnotzac nahuin tamaajsini de
pescados ma quitoctilican huan ma
quitacamatican Jesús**

(Mr. 1.16-20; Lc. 5.1-11)

¹⁸Nejnentiaya ya Jesús
martenojcopaca de Galilea huan
quinitac ome icnime, in Simón ica
cojpatocaytijque in Pedro, huan in
ocsé icniu Andrés. Huan yejuan catcaj
pescadojquitzquiani huan quitamotayaj
ninmatau tech in mar de Galilea.

¹⁹Huan Jesús quinilij ijcuín:

—Xihuiqui nohuan, xinechtocilican.
Huan ijcón queme nantaquitzquiani
ica pescados, no ijcón Nejuatzin
namechchihuas que nanquintemosque
tagayot para ma nechtoctilican nejua.

²⁰Ijcuacán nimantzin in Simón huan
in Andrés quicauque ninmatau huan
quitocetilijque Jesús. ²¹Huan queman
panoc ya de ompa huel nepacatzin,
ijcuacán Jesús no quinitac in Jacobo
huan iicniu Juan, teconehuan de
Zebedeo. Huan ne icnime yetoyaj
ihuan nintat tech se barco, huan ompa
quittajtasaluijtoyaj ninmatau. Huan in
Jesús quinnotzac ne teconehuan ma
quitocilican para quitacamatiyasque.
²²Huan nimantzin Jacobo huan in Juan
quicauque nintetat tech in barco huan
quitocetilijque Jesús.

**Nican tajtoa de queniu Jesús
Temaquixtijque quinmachtiaya in
tacaquini**

(Lc. 6.17-19)

²³Huan Jesús nentiaya nochi
Galileajcopaca huan quinnextiliayaj
in tacaquini ica in Tajtoltzin de
Dios tech ne tiopanne de judíos.
Huan campa hueli ajsía Jesús
quinmachtiaya den yancuic Tajtoltzin
de que Dios motoquijtoc para ma
quinyolyecanas itaneltocacahuan
ica nihueyichicahualis. Huan Jesús

quinpajtijtiaya ya nochi cocoyani de m'íac tataman den quincocoaya in tagayot.

²⁴Huan ijcón momoyahuac ne chichahualis de Jesús nohuiyampa tech in pueblojme ten itatilanal Siria. Huan quihualcuiliayaj campa Yejuatzin nochi cocoyani ten mococoayaj ica m'íac tatamanocolisme, nochi cocoyani ten tajyohuiyaj ya ica m'íac tataman hueyi tetzaucacocolis huan yoltequipacholis. Huan no quihualcuiliayaj campa Yejuatzin nochi cocoyani den quip'íaj ya ninyolijtic amocuali ejecame huan den vojyolpolihuaj huan den motojtocotzoayaj. Huan Jesús quinpajtij nochi nijín cocoyani. ²⁵Huan ijcón quitoctiliayaj Jesús m'íac tagayot den pohu'íaj Galilea huan den pohu'íaj Decápolis, inuan no ten pohu'íaj de Jerusalén huan ten pohu'íaj sentapalpa den hueyíat Jordán.

Nican tajtoa den tanojnotzalis de ne tepepan

5 Huan cuac Jesús quinitac que yetoyaj miacque tagayot, ijcuacán tejcoto tech ne talcuatipan huan ompa motalij. Huan imomachtijcahuan motoquijque ihuantzin huan quiyehualojtoyaj Jesús.

Jesús Temaquixtijque quinmachtij imomachtijcahuan de ne taca ten tatiochihualme ya de Dios

(Lc. 6.20-23)

²Huan ijcón in Jesús pehuac quinnextiliaya imomachtijcahuan ijcuín:

³—Tatiochihualme de Dios ne taneltocani ten cajsicamatij que ninyolojuan iuque, ten amo quip'íaj ne yolchipahualis ten Dios quimonequiltía. Porín como ijcón quichihuaj, ijcuacán yejuan pohuitihue campa Dios quinyolyecanas ica ihueyichicahualis.

⁴Tatiochihualme de Dios ne taneltocani ten moyolcocoaj porín cajsicamatij que

tajtacolejque. Porín como ijcón quichihuaj, ijcuacán yejuan Dios quinyoltalis.

⁵Tatiochihualme de Dios ne taneltocani ten icnome tech ninyolojuan. Porín como ijcón quichihuaj, ijcuacán Dios quintayocolis se yancuic talticpac nemilis. ⁶Tatiochihualme de Dios ne taneltocani ten quimachil'íaj que yolmayanaj huan yolamiquij porín quiyolnejnequij chipaucanemisque. Porín como ijcón quichihuaj, ijcuacán yejuan Dios quinyecolpexontis ica ne chipaucanemilis. ⁷Tatiochihualme de Dios ne taneltocani ten teyolicnel'íaj. Porín como ijcón quichihuaj, ijcuacán yejuan Dios no quinyolicnelis.

⁸Tatiochihualme de Dios ne taneltocani ten yolchিপauque. Porín como ijcón quichihuaj, ijcuacán yejuan yec melan quixitatihue in Totajtzin Dios. ⁹Tatiochihualme de Dios ne taneltocani ten quinyolyecmelahuaj ne motehuiani. Porín como ijcón quichihuaj, ijcuacán yejuan Dios quinpohuas iconahuan. ¹⁰Tatiochihualme de Dios ne taneltocani ten tajyohu'íaj porín acsame quinquejqueloaj de ninchipaucanemilis. Porín como ijcón quichihuaj, ijcuacán Dios quinyolyecana ipan yejuan ica ihueyichicahualis. ¹¹Nantatiochihualme namejuan cuac namechuijuicaltisque huan cuac namechtajyohuiltisque huan cuac namechijtohuilisque m'íac xolopijyot porín nantacuaumatij itech Nejuatzin notocay. ¹²Ijcuacán ximoyolpactican huan ximohuelitacan porín se tonal nanquiselisque se hueyi ne tetayocolil nepa eluiyactzinco. Huan ijcón queme namechtahuelitaj axcan, no ijcón quintahuelitatihualajque nitanahuatijcahuan de Dios ten nemicoj ne achtopa ya que namejuan.

Nican tajtoa de queniu Jesús Temaquixtijque quinmachtij in tacaquini de ne istat huan de ne tanex den talticpac

(Mr. 9.50; Lc. 14.34-35)

¹³Huan ocsepa Jesús quinmachtij imomachtijcahuan ijcuín:

—Huan namejuan nanyesque queme istat nican talticpac; nantapoyeliani den talticpacuani ica namochipaucanemilis para ma amo ongac sayó in chichicayot de tajtacol. Huan tacán in istat quipoloa nichicahualis, ¿ijcuacón quenín huelis ocsepa poyeyas, como amo quipía nipoyecayot? Huan ijcón amo teyi cualtía oc. Ta, sayó cualtía para quitamotasque calan huan quitzojtzonicsasque san.

¹⁴Huan ocsepa Jesús quinmachtij imomachtijcahuan ijcuín:

—Huan namejuan nanyesque queme in tanexilome para in talticpacuani, porín namejuan nanquinyoltahuilisque ica ne namochipaucanemilis. Namejuan nanyesque queme se pueblo ten yetoc talcuatipan ten amo hueli motatía. ¹⁵Huan cuac se quixotaltía se tanex, ijcuacón amo se quipantalilía se cajon. Ta, cachi cuali se quitatía campa tasempayan, huan ijcón nochi quintahuilis ne ten yetocque calijtic. ¹⁶Huan ijcón no namejuan xiquintanextilican nijín talticpacuani ica namochipaucanemilis. Huan cuac yejuan quitasque ya den namocualitachihualisuan, ijcuacón yejuan no quimohuistilisque Namohueyitajtzin ten yetica ne eluiyactzinco.

**Nican tajtoa de queniu Jesús
Temaquixtijque tanextiliaya
ica in tanahuatil de Dios**

¹⁷Huan ocsepa Jesús quinmachtij imomachtijcahuan ijcuín:

—Amo xicnemilican que nejua nihuala para namechxejxeloco ten Moisés namechmachtijca ya, nión no namechxejxelos den namechnextilijque ya in tanahuatiani de Dios. Nejua amo nihuala para nicuejuelos ne tanahuatil de namohuejcatatuan. Ta, sayó nicnequi namechyecajscamatiltis

de nochi ne tanahuatilme. ¹⁸Porín de yec melau ten namechilía que mientras yetoc oc in eluiyac huan in talticpac amo mosecocahuas nión se letra de nochi den tanahuatilme. Ta, ma motamichihua nochi in tamachilis ten cuica in tanahuatilme, ijcón queme Dios quimonequiltía.

¹⁹Ica ya nojón xicmatican, tacán acsá quisecotalía senme de nijín tanajnahuatilis, masqui tzictzin san in tanahuatil, huan tacán quinnextilía in tagayot ma amo quitacamatican, ijcuacón yejua ne quipohuasque amo teyi chiuque intzalan neques ten Dios quinyolyecanas ica ihueyichicahualis. Huan tacán acsá quitacamati ne tanahuatil huan no quinmachtía in tagayot ma no quitacamatican, ijcuacón yejua ne quipohuasque se hueyi chiuque intzalan neques ten Dios quinyolyecanas ica ihueyichicahualis.

²⁰Ica ya nojón no namechilía que tacán amo nanquipíaj se nemilis ten cachi chipactzin huan que ne ten cuicaj nojón fariseos huan nojón tanextiliani den tanahuatil de Moisés, ijcuacón xicmatican que amo queman huelis nanopohuitihue intzalan neques ten Dios quinyolyecanas ica ihueyichicahualis.

**Nican tajtoa de queniu Jesús
Temaquixtijque quinyecajscamatiltij
in tacaquini de ne cuálanti**

(Lc. 12.57-59)

²¹Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcatatuan namechnajnahuatijque ijcuín: “Amo xitemicti. Huan ijcón naquen temictis, yejua ne quitajyohuiltisque ica ne hueyi tatzacuultis”. ²²Pero Nejuatzin namechnajnahuatía ijcuín: Nochi naquen mocualantis ihuan se icnitzin, masqui amo temictía, pero no ijcón ne tahuel quitajyohuiltisque

ica ne hueyi tatzacuultilis. Huan naquen quijitos se icnitzin huan quilis ijcuín: “Semi tixoxo”, ijcuacán yejua ne ten quijtoj ne ejitolis in hueyi tayecanani quitajyohuiltisque ica por ne itejitolis. Huan naquen quiquejuelos se icnitzin huan quilis ijcuín: “Semi timijmiquilot”, yejua ne ten quijtoj ne tejitolis in tayecanani quitelchihuasque ma tajyohui tech ne tit den mictan. ²³Ica ya nojón cuac ticuicas ne motetayocolil tenica ticnemilía ticmohuistilitiu Totajtzin Dios huan santajma tiquelnamiquis que mocni mitzyolcualantía, ²⁴ijcuacán xicahua ompa ten ticuiyac tenica ticmohuistilisquía Totajtzin Dios. Ta, xiyó achto xiquitati ne mocniu huan xiquiliti ma mitztapojpolui para ijcón nanmoyecahuasque. Huan de ompa cuali timocuepas huan ticmohuistilitiu Totajtzin Dios ica ne motetayocolil.

²⁵Huan tacán acsá mitzteluilía huan quinequi mitzuicas iixpan in juez, ijcuacán nimantzin xiyó huan xitajtaniliti tech ne ojti ma mitztapojpolui para ijcón nanmoyecahuasque, huan para ma amo mitztemacti imaco ne juez. Huan tacán amo nanmoyecahuaj tech in ojti, ijcuacán in juez mitztemactis imaco in policía huan mitzcalaquitui tech ne cárcel. ²⁶Huan de yec melau ten namechilía que amo huelis tiquisas den ne cárcel, como amo tictemaca nochi ten mitztajtaníaj.

**Nican Jesús Temaquixtijque
quinajsicamatiltij in tacaquini
de ne ahuilnemilis quem
suapapatalis huan de tagapapatalis**

²⁷Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ijcuín: “Amo xitasihuapapata”. ²⁸Pero Nejuatzin

namechnajnahuatíaj ijcuín: Tacán se tagat quinixuelitzinemi sihuame san, ijcuacán ne tagat moteltajtacolmacac ya itech italnamiquilis ihuan ne sihuame. ²⁹Huan tacán moixtololo den moyecmacopaca mitztepótamisquía tech in tajtacol, ijcuacán ximoquixtili ne moyequixtololo huan xictamota huejca. Porín cachi cuali sayó xicpolo se moixtololo, huan ma amo xicpolo nochi motacayo tech ne tit de mictan. ³⁰Huan no tacán se moyecmay mitztepótamisquía tech in tajtacol, ijcuacán xicotona huan xictamota huejca. Porín cachi cuali sayó ma polihui se moyecmay san, huan ma amo xicpolo nochi motacayo tech ne tit de mictan.

**Nican Jesús Temaquixtijque
quinajsicamatiltij in tacaquini de ne
cacahualis den namicuani**
(Mt. 19.9; Mr. 10.11-12; Lc. 16.18)

³¹Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ijcuín: “Nochi naquen quinequí quiseccahuas se isihuau, ma quimacti se amat campa ixnesi que mosesecocauque ya”.

³²Pero Nejuatzin namechnajnahuatía ijcuín: Tacán se tagat mocacahuaj ihuan nisihuatzin huan nisihuau amo ahuilnenque, ijcuacán ne tagat quichihua que nisihuau yesquía se sihuahuilnenque. Huan naquen ihuan monamictis ne sihuat ten namique catca, ijcuacán ne ocsé tagat motajtacolmacas ya porín ne sihuat pohui oc ihuan ne achtopa yoquich.

**Nican Jesús Temaquixtijque
quinajsicamatiltij in tacaquini
de ne tajtolis: “Quitztica Dios”**

³³Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ijcuín: “Ma amo queman xiquijto: Quitztica Dios, huan de ompa amo ticchihuas ten timoyectencahuac ya. Ta, cuac timoyectencahuas ya de que ticchihuas tensá, huan tictematiltis ica nijín tajtolme, Quitztica Dios, ijcuacán yec melau xicchihuati ten timoyectencahuac ya”. ³⁴Pero Nejuatzin namechnajnahuatía ijcuín: Amo queman xiquijto: “Quitztica Dios”, cuac ticnequi timoyectencahuas ihuan acsáme. Amo queman xiquijto: “Quitztica Dios”, nión ica teyi taman tanemililis. Huan amo no xiquijto: “Quitztica ne eluiyactzinco”, porín ompa yetica Dios imohuiscachicahualispan. ³⁵Huan amo no xiquijto: “Quitztica in talticpac”, porín nican talticpac Dios mometzmejmelauc. Huan amo no xiquijto: “Quitztica ne chipactzin pueblo Jerusalén”, porín ne pueblo pohui ihuan ne hueyi tayecanque Totajtzin Dios. ³⁶Huan amo no xiquijto: “Quitztica notzontecon”, den quijtosnequi: “Quitztica nejuatzin”, porín amo hueli ticchihuas ma mocuepa istac nión se motzontzin ten tiltic ica motajtolis san. ³⁷Pero cuac ticnequis tiquijtos “quema”, sayó xiquijto “quema”. Huan cuac ticnequis tiquijtos “amo”, sayó xiquijto “amo”. Porín cuac ticnequis ticmajmaxitis motajtolis ica ne tajtol: “Quitztica Dios”, ijcuacán nenca san tictenehuas itocaytzin de Totajtzin Dios. Xicmati que nojón motajtolis huitza den amocuali Satanás.

**Nican Jesús Temaquixtijque
quinajsicamatiltij in tacaquini de
que ma tiquintasojtacan naquen
techtahuelitaj**

(Lc. 6.29-30)

³⁸Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ya ijcuín: “Tacán acsá mitzchihuilis mal queme yesquía mitzquixtilía se moixtololo, ijcuacán tejua no timomacuepas huan tiquixtilis se iixtololo. Huan tacán acsá mitzquixtilía se motan, ijcuacán tejua no timomacuepas huan no tiquixtilis se itan”. ³⁹Pero Nejuatzin namechnajnahuatía ijcuín: Amo ximomacuepacan cuac se tagat namechchihuilia tensá ten amo cuali. Huan tacán acsá mitzcamatatzinía moyecmacopaca, ijcuacán amo ximomacuepa. Ta, xicuepa moixco ma mitzcamatatzini ocseco. ⁴⁰Huan tacán acsá quinequi mitzteluilis iixpan in juez huan no quinequi mitzcuilis mocamisa, ijcuacán xicahuili ma cuica no motaquen. ⁴¹Huan tacán acsá mitzfuerzajuía de que xicuica se tamamal se huan tajco kilómetro, queme yesquía tajco hora de ojti, ijcuacán xicuica ne tamamal ocsé tanto, yesqui se hora tech in ojti. ⁴²Huan tacán acsá quinequi mitztajtjanilis tensá, ijcuacán xicmacti. Huan tacán acsá quinequi mitztanehuilis tensá, ijcuacán amo no xiquixtopehua. Ta, xictaneuti.

**Nican Jesús Temaquixtijque
quinajsicamatiltij in tacaquini de
que ma tiquintasojtacan neques ten
techtahuelitzinemi**

(Lc. 6.27-28, 32-36)

⁴³Huan no Jesús quinmachtij imomachtijcahuan ijcuín:

—Huan namejuan nanquicacque ya que ne namohuejcautatuan namechnajnahuatijque ijcuín: “Xictasoja mocni huan xictahuelita naquen mitztahuelita”.

⁴⁴Pero Nejuatzin namechnajnahuatía ijcuín: Xictasojtacan naquen namechtahuelitasque, huan xiquintapojpoluican ne naquen

namechuijuicaltisque. Huan xiquinpalehuican naquen namehcualancaitasque. Huan ximotatautilican ica por yejuan ne naquen namechquejquelosque huan ten namechtajyohuiltisque.

⁴⁵Huan ijcón ixnesis que namejuan nanteconehuan de Namohueyitajtzin ten yetica ne eluiyactzinco. Porín Yejuatzin quichihua ma panquisa in tonaltzin para quinpalehuis nochí naquen yolcualime huan naquen amo yolcualime. Huan Yejuatzin no cualtitani in quioutzin para quinpalehuis naquen yolchipauque huan naquen amo yolchipauque.

⁴⁶Huan como sayó nanquintasojtaj ne naquen namechtasojtaj, ¿ijcuacán toni tetayocolil nanquiselisque? Pues hasta in tatopaluiani yejuan ijcón quichihua.

⁴⁷Huan tacán sayó nanquittajpaloaj namocnihuan, ¿ijcuacán toni cuali chihualis nanquichihua ten amo quichihua in ocsequin? Porín hasta ne taca ten amo pohuij ihuan Dios, yejuan nojonques no ijcón quichihua.

⁴⁸Huan namejuan xiyecyolmajsitocan ica ne tetasojtalis ijcón queme Namohueyitajtzin ten yetica ne eluiyactzinco ten no yec yolmajsitoc ya ica ne tetasojtalis.

Nican Jesús Temaquixtijque quinajsicamatiltij in tacaquini de quenín titapalehuáj in pobres

6 Huan Jesús ocsepa quinmactij imomachtijcahuan ijcuín:

—Huan amo xicchihuacan namocualitachihualis de namotaneltocalis senteixteno para ma sayó namechitacan in tagayot. Porín como ijcón nanquichihua, xicmatican que Namohueyitajtzin den yetica eluiyactzinco amo teyi namehmactis de ne tetayocolil. ²Pero cuac tiquinpalehuis in pobres, ijcuacán amo xictematilti nohuiyan de ne motaehuil.

Porín ijcón quichihua ne naquen ixcuecuepme de nintamachilis campa in tiopanme de judíos huan campa ojme sayó para ma quinhueyichihuacan in tagayot. De yec melau ten namechilía que yejuan quipfaj ya ne nintetayocolil. ³Pero cuac teja tiquinpalehuis in pobres ica ne ten ticpía, ijcuacán ma amo aquen quimati toni ticchihuas. Amo xictematilti nohuiyan huan nión no ma quimati moopochmay ten quichiutoc moyecmay. ⁴Ta, teja cuac tiquinpalehuis in pobres ica ne ten ticpía, ijcuacán cachi cuali xiquichtacachihua. Huan ijcón Mohueyitajtzin quitztoc ya ten tiquichtacachiutoc, huan ijcón Yejuatzin mitzmactilis ne hueyi tetayocolil senteixteno.

Nican Jesús Temaquixtijque quinajsicamatiltij in tacaquini queniu timotatautilisque

(Lc. 11.2-4)

⁵Huan Jesús ocsepa quinmactij imomachtijcahuan ijcuín:

—Huan cuac namejuan nanmotatautilisque, ijcuacán amo xicchihuacan queme ne naquen ixquecquepme de nintamachilis. Porín yejuan cuelitaj moquetzasque huan motatautilisque itech in tiopanme de judíos huan tech ojme den calnacastan, para ma ijcón quinitacan in tagayot. Huan yec melau ten namechilía que yejuan quiselijque ya ne tetayocolil de hueyipanchihualis ten quinmactilijque ya in tagayot. ⁶Pero cuac teja timotatautilis ihuan Dios, ijcuacán xicalaquí tech mochantzin huan xictzacua in puerta huan ximotatautili ihuan Mohueyitajtzin Dios ten mohuan ichtaca yetica. Porín Mohueyitajtzin Dios quitztoc ya ten tiquichtacachiutoc huan ijcón Yejuatzin satepan mitzmactis ne tetayocolil senteixteno. ⁷Huan cuac

namejuan nanmotatatautilisque ihuan Dios, ijcuacán amo yejua san xicquejqueptocan san namotajtoluan porín ijcón nenca san namonetatatautilis. Porín ne naquen amo pohuij ihuan Dios, yejuan quiquejqueptocque san nintajtoluan tech ninnetatatautilis. Huan ijcón yejuan quiyolnemilfaj que Dios cachi quincacuis porín miacpa quichihuaj ninnetatatautilis. ⁸Huan namejuan amo xiquinnejnehuilican queme yejuan motatatautilíaj porín xismatican que Namohueyitajtzin Dios ipa cuali quimatoc ya toni namechpoloa achtopa ya que namejuan nanquitajtanisquíaj.

⁹Pero namejuan ximotatatautilican ijcuín:

Tohueyitajtzin ten tiyetica eluiyactzinco, ma timitzonmohuistilican ica in chichahualis de motocaytzin.

¹⁰Huan ma xionuiqui huan ma xiquinyolyecana ica mohueyichichahualis motaneltocacahuan.

Huan ma mochihua nochi ten Tejuatzin ticonmonequiltía nican talticpac ijcón queme mochiutoc ne eluiyactzinco.

¹¹Xitechonmaca axcan totaxcaltzin ten techpoloa.

¹²Huan xitechontapojpolui den totajtacoluan ijcón queme tejuan no tiquintapojpoluique ya naquen techmohuispoloayaj.

¹³Huan amo xitechonuica tech in ohuijcaoyot.

Ta, xitechonajchihuili den chichahualis den amocuali. Huan timitzonhueyimohuistilíaj porín Tejuatzin san ticonpía in hueyitayecanalis, in hueyichichahualis huan Tejuatzin san Tionueyichiuque porín nesi mocualtzinyo para nachipa ijcón. Amén.

¹⁴Porín como namejuan nanquintapojpoluíaj naquen namechmohuispoloaj, ijcón no Tohueyitajtzin Dios ten yetica eluiyactzinco namechtapojpoluis.

¹⁵Huan como amo nanquintapojpoluíaj ne naquen namechmohuispoloaj, no ijcón Namohueyitajtzin amo no namechtapojpoluis de namotajtacoluan.

Nican Jesús Temaquixtíjque quinajscamatiltij in tacaquini de ne sahuális

¹⁶Huan no Jesús quinmactij imomachtijcahuan ijcuín:

—Huan cuac nanmosahuasque, ijcuacán ma amo xiyetocan xiixcocoyani ijcón queme quichihuaj in taca ten ixucuecpe de nintamachilis. Porín yejuan ixcocoxcatijtinemij para ijcón quinnextilisque in tagayot que yec melau mosahuaj. De yec melau ten namechilía, yejuan quiselijque ya ne tetayocolil de hueyipanchihualis ten quinmactilijque ya in tagayot. ¹⁷Pero tejua, cuac timosahuas, ijcuacán cuali ximocuatzcacahuasui huan cachi ximoixami, ¹⁸para ma amo quimatican tagayot que timosautoc. Ta, sayó para ma quimati Mohueyitajtzin ten ichtaca yetica. Huan Mohueyitajtzin cuali quimatoc ya de que toni tiquichtacachiutoc huan ticselitiu senteixteno ne tetayocolil ten Totajtzin Dios mitzmactilis.

Nican Jesús Temaquixtíjque quinajscamatiltij in tacaquini de ne melau ricojyot, de ne tech eluiyac (Lc. 12.33-34)

¹⁹Huan Jesús no quinmactij imomachtijcahuan ijcuín:

—Amo xicsentilican namoricojyo nican talticpac campa namotilma quitetectocque in ocuulinme huan namotomin poxcautoc huan campa in tachtequini tecalijtic calaquij

huan cuicaj ten nesi. ²⁰Ta, cachi cuali xicsentilican namoricojoyo tech ne eluiyactzinco campa in ocuulinme amo hueli quitejtequisque, nión no poxcahuis den namoaxca, huan nión no tachtequini huelis mitzcalijticcalauisque huan cuicasque ten moaxca. ²¹Porín campa yesqui yetos nochi in namoricojoyo, ne eluiyactzinco oso nican talticpac, sayó ompa itech ne moricojoyo nanyoltanemilijtsque.

**Nican Jesús Temaquixtijque
quinajsicamatiltij in tacaquini den
quenín toixtololohuan techtahuilíaj**
(Lc. 11.34-36)

²²Huan Jesús cachi oc quinmachtij imomachtijcahuan ijcuín:
—Namoixtololohuan nicnejnehuililtía queme se tanex ten techtahuilía tech tonacayo. Huan tacán namoixtololohuan yec tequitij queme se cuali tanex, no ijcón cuali namechtahuilía tech nochi namonacayo. ²³Huan tacán namoixtololohuan amo yec tequitij porín tensá quitzajtzacuilía namoixcocone, no ijcón amo huelis calauis in tanex huan ijcón nochi namonacayo mocahuas tech in tayohuayanilot. Huan como ne tanex ten nanquiplasquíaj ijcón mocuepas tayohuayanilot, ijcuacán yec melau nanmocahuasque tech se tayohuayanilot ten semi tiltic.

**Nican Jesús Temaquixtijque
quinajsicamatiltij in tacaquini den
ome patrones, Yejuatzin Dios oso in
tomin**
(Lc. 16.13)

²⁴Huan Jesús quinmachtij imomachtijcahuan ijcuín:
—Amo aquen huelis quinquetilis ome patrones, porín como ijcón quichihua, ijcuacán yejua quitahuelitas se patrón huan quitasojtas in ocsé, oso

quimohuistilis se patrón huan amo quihueyichihuas in ocsé. Amo aquen huelis quinquetilis nijín ome patrones sepa san, ijcón queme Totajtzin Dios huan in ricojyot de nican talticpac.

**Nican Jesús Temaquixtijque
quinajsicamatiltij in
tacaquini de que ma amo
timoyolnemilijtinemican huan ma
amo timoyolcuejmolojtinemican**
(Lc. 12.22-31)

²⁵Huan Jesús no quinmachtij imomachtijcahuan ijcuín:
—Ica nijín tanejmachtilis namechilía que amo ximoyolcuejmolojtinemican de namonemilis, de namotacualis, de namoatilis. Huan amo no ximoyolcuejmoloacan de namotaquen. ¿Xe cachi amo tayecantoc namonemilis huan que nijín namotacualis? Pues quema. ¿Xe cachi amo tayecantoc namotacayo huan que nijín namotilma? Pues quema. ²⁶Xiquitacan san in tototzitzin ten patantinemij ejecaixco. Yejuan amo no tatocaj, nión no cajocuij taquilot, nión no quiehua in taquilot tech sincal. Huan Namohueyitajtzin ten yetica ne eluiyactzinco, Yejuatzin quintamacatoc. ¿Xe cachi amo nantayecantocque namejuan ihuan Dios huan que nijín tototzitzin? Pues quema. ²⁷¿Aconi de namejuan huelis momajxitis se molic oc para cachi huejcapantíyas, masqui cachi moyolcuejmos? Pero amo aquen huelis. ²⁸Huan, ¿queyé nanmoyolcuejmolojtinemij por namotilma? Xiquitacan quenín moscaltíaj ne milajxochime. Yejuan amo motequitilíaj nión no tajquitij. ²⁹Huan namechyequilía que nijín xochit semi cualtzin xochiyohua. Huan ne hueyi rey Salomón ica nochi nicualtzinyo motaquentiaya pero amo queman huelic quinejnehuilis cualtzin queme nijín xochit. ³⁰Huan Dios

quicualnextía nijín milajxochime ten axcan moscaltijtoc huan mosta quitatis campa tachinoa. Huan namejuan, ¿xe cachi amo namechpalehuis Dios huan que ne milajxochime? Pues, quema. Huan namejuan, ¿queyé amo majsitoc namotacuautamatis?

³¹Huan no Jesús quinmachtij imomachtijcahuan ijcuín:

—Amo xicnemilijtinemican toni nanquicuasque mosta, huan toni titayisque, huan tonica timotaquentisque. ³²Porín in tagayot ten amo pohuij ihuan Dios, yejuan nojonques quitemoaj sayó de nijín taman. Huan namejuan nanquipíaj se Namohueyitajtzin ten yetica ne eluiyactzinco huan Yejuatzin nochi quimatoc ya ten namejuan namechpoloaj. ³³Pero namejuan ximofuerzajuican huan xictemocan achto para ma Dios namechyolyecana ica ihueyichicahualis huan no xictemocan ne yecchipaucanemilis ten Dios cuelita. Huan ijcón Yejuatzin namechyolmajxitis huan nanquiselisque nochi ten monequis ijcón queme in tacualis huan in atilis huan namotaquen. ³⁴Ica ya nojón amo ximoyolcuejmolocan den toni mochihuas mosta, porín ne tonal den mosta cualcuis ocsé ne cuejmololis. Cada se tonal quipía ne ohuijcyot. Huan ijcón queme hualajtoc ne cuejmololis de mosta huan mosta, no ijcón ximotatautilican mosta ihuan Totajtzin Dios ma namechpalehuijtiu.

**Nican Jesús Temaquixtijque
quinajsicamatiltij in tacaquini de
que ma amo se quinixcomaca huan
ma amo se quintelchihua acsame**

(Lc. 6.37-38, 41-42)

7 Huan no Jesús quinilij imomachtijcahuan ijcuín:

—Huan amo xiquinixcomactinemican huan amo no xiquintelchiutinemican

acsame, queme nanyesquíaj jueces, para ma Dios amo no namechixcomas huan amo namechtelchihuas.

²Porín Dios namechixcomacas huan namechtelchihuas ica ne tamachiu tenica namejuan nanquicuij para nanquixcomacaj huan nanquintelchihuaj acsame. Huan ne taixcomacalis tenica namejuan nanquintelchihuaj acsame, no ijcón Dios quicuis para namechixcomacas huan namechtelchihuas. ³Huan como tejua amo timomaca cuenta de que mitzixtazjtzacuilijtoc se hueyi cuoutzontet, queme yesquí se hueyi tajtacol, ijcuacán amo huelis ticyequitilis se teuti actoc ixtololoco ne mocnitzin, huan ne teuti queme yesquí se tajtacol ten amo semi mota.

⁴Huan no, ¿quenín huelis tiquilis ne mocniu: “Ma nimitzquixtili ne teuti ten ticpía moixtololoco”, cuac no ticpía se hueyi cuoutzontet ten no mitzixtazjtzacuilijtoc? Pues amo huelis.

⁵Porín como amo ticmachilía ne ten mitzixtazjtzacuilijtoc, ijcuacán tejua tiixcucueptoc san de motamachilis. Ta, cachi cuali achto ximoquixtili ne cuoutzontet ten mitzixtazjtzacuilijtoc huan ijcón huelis ticyequitas ya ne teuti ten quipía mocniu ne ixtololoco huan ijcón huelis ya tiquitilis.

⁶Huan Jesús quinnextiliaya in tagayot ica se nexcuitil de se itzcuinti huan se pitzot huan quiniliaya ijcuín:

—Amo xiquinmactilican itzcuinme ne chipactzin Tajtoltzitzin de Dios, huan amo no xiquintamacacan pitzome den tanextililis de Dios queme yesquí perlas ten semi telpatio. Porín nijín oculinme queme yesquíaj in taca ten yolchichique ten quixtopehuasque in Tajtoltzin de Dios. Huan huelis yejuan quitzojtzonicsasque in Tajtoltzin de Dios huan no mocuepasque para namechquejquetzomasque.

**Nican Jesús Temaquixtijque
quinajsicamatiltij in tacaquini de ne
tatatautilis huan in tanahuatil cachi
chipactzin**

(Lc. 11.9-13; 6.31)

⁷Huan Jesús quinnextiliaya
imomachtijcahuan ica se nexcuitil huan
quiniliaya ijcuín:

—Xitajtaniclan Dios huan
namechmactis ne ten monequi. Ijcón
queme tensá se quiyectemoa de se
quipolaa, no ijcón xictatatautilican
Dios huan Yejuatzin namechseliltis.
Huan no ijcón cuac se tacacalatza ma
tatapoucan, no ijcón xicsentocacan
xiquilican Dios ten monequi huan
Dios namechmacas. ⁸Porín nochi
tocnihuan ten tajtanilisque, yejuan
nojonques Dios quinseliltis. Huan
nochi tocnihuan ten quitemosque tensá
tatiochihualis, yejuan nojonques Dios
quinpalehuis para ma cajsican. Huan
nochi tocnihuan ten tanotzasque,
yejuan nojonques Dios quintatapohuilis.

⁹¿Xe acsá de namejuan huelis
nanquimactilisque namoconeu se tet
cuac namechtajtanilis xicmacacan
taxcal? Pues amo. ¹⁰Huan, ¿xe
no acsá de namejuan huelis
nanquimactilisque namoconeu
se cohuat, cuac namechtajtanis
xicmacacan tzictzin pescadojnacat?
Pues amo. ¹¹Porín masqui namejuan
amo nanyolchipauque, pero no cuali
nanquimatocque toni nanquimactisque
namoconeuhuan ten cuali huan den
huelic. Pues cachi oc Namohueyitajtzin
ten yetica ne eluiyactzinco
namechmactis ne mactil ten cuali para
nochi naquen quiyectajtanisque.

¹²Huan ijcón ipa xiquinchihuilican
tocnihuan ijcón queme
nanquinequij que in tocnihuan ma
namechchihuilican. Porín yejua nijín
in tamachilis ten technajnahuatíaj
in tanahuatil de Moisés huan in

Tajcuilolamatzin ten quijcuilojque in
tanahuatiani de Dios.

**Nican Jesús Temaquixtijque
quinajsicamatiltij in tacaquini de ne
calten ten amo patahuac**

(Lc. 13.24)

¹³Huan Jesús quinmacthij
imomachtijcahuan ijcuín:

—Xicalaquican itech ne ojtzin de
Dios campa ne calteno amo patahuac.
Porín ne calten huan ne hueyi ojti semi
patauque campa yajtocque in tagayot
para ajsitihue tech ne xpolihuilis,
huan miacque tagayot yohue tech ne
patahuac ojti campa amo ongac ne
nemaquixtilis. ¹⁴Huan amo patahuac
ne calteno huan semi pitzahuac ne ojti
campa yajtocque in taneltocani para
ajsitihue tech ne yec nemilis. Huan
amo miacque moajsitihue tech nijín ojti
de ne maquixtilis.

**Nican Jesús Temaquixtijque
quinajsicamatiltij in tacaquini
de ne cuohuit ten moixmati ica
itaquilohuan**

(Lc. 6.43-44)

¹⁵Huan Jesús quinmacthij
imomachtijcahuan ijcuín:

—Ximoyecpiacan den ne tanahuatiani
tacajcayahuani ten teilijtinemij
que yejuan tajtoaj itencopa Dios.
Porín yejuan hualasque sayó para
namehcajcayahuasque san. Huan
yejuan motasque yolcualime queme
se cuali ichcat ten amo tetehuía.
Pero ne iyolijtic ne tanahuatiani
cualcuij yoltacajcayahualis queme
in piotecuani ten ichtacayohui para
tachtequisque. ¹⁶Huan ijcón namejuan
cuali nanquinyequixmatisque nijín
tanahuatiani ica ne tachihualis ten
yejuan quichiutinemij. Porín amo
huelis se quitocas huitzti huan ma
taqui uvas xocot ten tzopec. Pues amo
no huelis se quitocas tzitzicascuohuit

huan ma taqui higos xocot. ¹⁷Huan ijcón nochi in cuohuit ten cuali, yejua ne quitemaca cuali taquilome. Huan nochi in cuohuit ten amo cuali, yejua ne quitemaca taquilome ten amo cualtía. ¹⁸Huan in cuohuit ten cuali, yejua ne amo huelis quitemacas itaquilohuan ten amo cualtía. Huan no in cuohuit ten amo cuali, yejua ne no amo huelis quitemacas itaquilohuan ten cualtía. ¹⁹Huan nochi in cuoume ten amo quitemaca taquilot ten cualtía, in tequitini quimayohuisque huan quitamotasque tech in tit. ²⁰Ijcuacán namejuan cuali nanquinyequixmatisque ya nojón tacajcayahuaní ica ne tachihualis ten yejuan quichiutinemij, ijcón queme cada se cuohuit moixmati ica itaquilohuan.

**Nican tajtoa de que Jesús
Temaquixtíjque quinilis ne naquen
amo yec tacuautamatque ihuantzin
ijcuín: Amo queman namechixmatic**
(Lc. 13.25-27)

²¹Huan Jesús quinajsicamatiltij imomachtijcahuan ijcuín:
—Totajtzin Dios de eluiyactzinco amo quinyolyecanas ica ihueyichicahualis nochi ne ten nechnotzasque sayó ica nintexipal san que Nejuatzin ni Nintecotzin. Ta, sayó Dios quinyolyecana ica ihueyichicahualis neques ten quichihuaj queme Notajtzin Dios ipaquilis ne eluiyactzinco. ²²Huan cuac ne tonal de tatzacuilitis ejcos ya, ijcuacán miacque nechilisque ijcuín: “Notecotzin, Notecotzin, tejuan tictanextiliayaj ica in chichahualis de motocaytzin. Huan no ica motocaytzin tiquincalanquixtiayaj in amocuali ejecame. Huan ica motocay ticchihuayaj miacque huejueyi mohuiscatequit”. ²³Pero ijcuacán Nejuatzin niquinyecquilis ijcuín: “Amo queman namechixmatic;

niman ximajchihuacan, namejuan nantachihuani ica ten amo cuali”.

**Nican Jesús Temaquixtíjque
quinajsicamatiltij in tacaquini in
ome taman tatzinehualonime**
(Lc. 6.46-49; Mr. 1.22)

²⁴Huan in Jesús quinnextiliaya imomachtijcahuan ica se nexcuitil ijcuín:

—Naquen nechcaquilía huan quichihua nochi ten nicnajnahuatía, yejua ne nicnejnehuilitía queme se tagat ten yec yolmajsitoc ya. Huan ne tagat ten yolmajsitoc quichijchihuac ichan huan quichijchihuac in tatzinehualoni itech se hueyi tesohuil. ²⁵Huan huala se hueyi tetzaucaquiohuit huan hueyiacque in hueyame huan elihuis taejecaya hasta quihuijuixohuaya in cali. Pero in cali amo huejuelihuic porín yec tzinijcatoya itech se hueyi tesohuil. ²⁶Huan no ijcón naquen amo nechcaquilía huan amo no quichihua den Nejuatzin nicnajnahuatía, yejua ne nicnejnehuilitía queme se tagat den ayamo yec yolmajsitoc. Huan yejua ne quichijchihuac nichan huan quitzinpehualtj campá yoca xal san. ²⁷Huan huala se hueyi tetzaucaquiohuit huan hueyiacque in hueyame huan elihuis taejecaya hasta quihuijuixohuaya in cali, ijcuacán ne cali cacapaxhuetzito.

²⁸Huan cuac Jesús quintaminojnotzac ya, ijcuacán in tagayot quimoucamatíaj de ne tanextililisme. ²⁹Porín Jesús quinnextiliaya in tacaquini ica chicaucatanahuatil huan amo queme ne tanextiliani den tanahuatil de Moisés.

**Nican tajtoa de queniu Jesús
Temaquixtíjque quipajtij se cocoxque
den cocotocatoya ninacayo**
(Mr. 1.40-45; Lc. 5.12-16)

8 Huan cuac temoc ya Jesús tech ne tepelomo, ijcuacán quitoctiliayaj

Yejuatzin huel m'ac tagayot. ²Huan motoquij campa Jesús se cocoxque den inacayo cocotocatoya. Huan yejua motancuaquetzaco iixpampa Jesús huan quilij ijcuín:

—Totecotzin, ta como ticonmonequiltía, cuali tionuelis tinechonchipahuas de nijín pitzotic cocolis.

³Huan Jesús momatilanac huan quimatocac in cocoxque huan quilij ijcuín:

—Nicnequi ma tejua xichipahuac de mococolis.

Huan cuac Jesús ijcón quilij, ijcuacón nimantzin quisac ne cocolis den inacayo cocotocatoya huan mocahuac chipactzin ne tagat. ⁴Huan Jesús quilij ijcuín:

—Xiquita, amo aquen teyi xictapohui. Ta, sayó xiyó ximotenextiliti ihuan ne tiopixcame den judíos de que tichipahuac ya. Huan no xiquinmactiti ne tetayocolil in tiopixcame den judíos, ijcón queme Moisés tanahuatiaya para ne cocoyani ten tapajtilme ya de ne cocotoca ninacayo. Huan ijcón ixnesis ninuan mopueblojcahuan de que tichipahuac ya.

**Nican tajtoa de queniu Jesús
Temaquixtijque quipajtij se
taquehual de capitán romano**

(Lc. 7.1-10)

⁵Huan cuac Jesús calayic tech ne pueblo Capernaum, ijcuacón se tayecanque soldado romano motoquij campa Jesús huan quitatautilij ijcuín:

⁶—Totecotzin, notaquehual semi mococoa huan huetztoc ichan mocahuac melaxtic, huan tajyohuía ica ne tonehuilis telsenca ya.

⁷Huan Jesús quilij ijcuín:

—Najua niyás nicpajtitu.

⁸Ijcuacón in tayecanque soldado romano tananquilij ijcuín:

—Totecotzin, nejua amo nechnamiqui ma ticalaquí tech nochantzin. Ta, sayó xihualtanahuati campa tionyetoc, huan ijcón notaquehual pajtis. ⁹Huan nejua no nitatacamati ten nechnajnahuatía. Huan nejua niquinnajnahuatía nosoldados ma nechtaacamatan. Huan nicnahuatía se soldado ma xiyó, huan yejua yohui. Huan nicnahuatía ocsé ma xihuiqui, huan yejua huitza. Huan nicnahuatía notaquehual ma xicchihuati tensá, huan yejua quichihuati.

¹⁰Huan cuac Jesús quicayic nijín tajtolis, ijcuacón Yejuatzin quimoucacayic huan quinilij in tagayot ten cualtoctiliayaj:

—De melau ten namechilía que intzalan nochi ne pueblojuani de Israel amo aquen nicajsic ten quipía in yec tacuautamatilis queme nijín tayecanque soldado romano. ¹¹Huan no namechyequilía que hualasque de nohuiyan m'ac taneltocani ten amo judíos. Huan yejuan hualasque de campa iquisayampa in tonal huan de ipolihuiyampa tonal huan calaquisque huan tacuasque ihuan in huejcautetatme judíos, in Abraham huan in Isaac huan in Jacob. Huan ompa yejuan calaquisque campa Dios momasoutoc ipan itaneltocacahuan ica ihueyichicahualis huan namejuan amo nancalaquisque. ¹²Huan namejuan in tagayot judíos ten nanpohuisquíaj campa Dios momasoutoc ica ihueyichicahualis, namejuan Dios namechcalantamotas tech ne tayohuayanilot campa nanchocatosque huan nantannanatzocatosque tech ne tajyohuilis.

¹³Huan Jesús quilij ne tayecanque de soldados ijcuín:

—Xiyó ya mochan huan ijcón mochihuas queme tejua titacuautamatic que pajtis motaquehual.

Huan ijcón nitaquehual pajtic ya tech ne momento.

**Nican tajtoa de queniu Jesús
Temaquixtijque quipajtij imonan in Pedro**

(Mr. 1.29-31; Lc. 4.38-39)

¹⁴Huan huala Jesús huan calayic ichan in Pedro huan ompa quitac imonan in Pedro que huetztoya ica hueyi totonic. ¹⁵Ijcuacán in Jesús quimaquitzquij in cocoxque huan ijcón niman quisac in totonic. Huan niman imonan in Pedro moquetzac huan quintamacac icalpanocahuan.

**Nican tajtoa de queniu Jesús
Temaquixtijque quinpajtij mías cocoyani**

(Mr. 1.32-34; Lc. 4.40-41)

¹⁶Huan cuac ne tapoyahuito ya, ijcuacán Jesús yetoya oc ichan nimonan in Pedro huan ompa cualcuiliayaj mías tagayot ten quipiayaj inyolijtic amocuali ejecame. Huan Jesús quincalanquixtilij in amocuali ejecame sayó ica se tajtol, huan ijcón no quinpajtij nochi in cocoyani. ¹⁷Huan melau ijcón mochihuac ten quijcuilojca ya ne tanahuatijque Isaías cuac quijtojca ijcuín: “Yejuatzin tajyohuico para techpajtis den tocolisuan huan tajyohuico para techajchihiuilis de nochi totoneucayohuan”.

**Nican Jesús Temaquixtijque
quinnejmachtij in tagayot ten
quinequiayaj quitoctilisque huan
quitacamitiasque Jesús**

(Lc. 9.57-62)

¹⁸Huan cuac Jesús quitac que mías tagayot quiyehualojtoyaj, ijcuacán Yejuatzin quintitanic imomachtijcahuan ma panocan sentapalpa den hueyíat in mar de Galilea. ¹⁹Huan se tanextilijque den tanahuatil de Moisés motoquico campa Jesús huan quilij Yejuatzin ijcuín:

—Tamachtijque, nicnequi nimitztoctilis huan nimitztacamatiyás campa yesqui tiyás.

²⁰Ijcuacán in Jesús tananquilij ijcuín:

—In cuectzitzin quipíaj in téchanti campa cochij huan in tototzitzin den patantinemij ejecaixco quipíaj in tepajsoluan, pero Nejuatzin ni Yectagatzin amo nicpía can nimocuatecas.

²¹Huan senme den imomachtijcahuan de Jesús quilij ijcuín:

—Totecotzin, pero achtopa de que nimitztoctilis huan nimitztacamatiyás, pues nechcahua ma niyó nictalpachoti nopapá ten momiquilij ya.

²²Huan Jesús quinanquilij ijcuín:

—Xihuiqui nohuan xinechtoctili huan xinechtacamatiyás. Huan xicahuacan ma quitalpachocan in ánimajme: ne naquen mictocque tech ninyolo ten amo quinequij nechtoctilisque.

**Nican tajtoa de queniu Jesús
Temaquixtijque quitamatilij in hueyi
tetzaucaejecat**

(Mr. 4.35-41; Lc. 8.22-25)

²³Huan de ompa Jesús calayic tech in barco huan imomachtijcahuan quisehuicayaj. ²⁴Huan pehuaco se hueyi tetzaucaejecat huan chicahuac taejecaya huan in at mocuentecaya huan calaquía tech in barco. Huan Jesús Yejuatzin cochtaya. ²⁵Huan imomachtijcahuan yajque quijxititoj huan quilijque ijcuín:

—Totecotzin, xitechonmaquixti porín tejuan tipolihuitij ya.

²⁶Ijcuacán nimantzin in Jesús ixpetanic huan quinilij ijcuín:

—¿Queyé semi nanmoutiaj? Namejuan amo yec majsitoc de namotacautamatilis.

Huan ijcón in Jesús moquetzac huan quitacahualtij ne tetzaucaejecat huan in hueyíat. Huan in hueyíat mocahuac ijcón amanis.

²⁷ Ijcuacán in imomachtijcahuan semi quimoucaitacque huan moyolnojnotzayaj se huan ocsé ijcuín:
—¿Toni taman nijín tagat? Porín in ejecat huan in hueyíat no quitacamati.

**Nican tajtoa de queniu Jesús
Temaquixtijque quinpajtij in taca
de pueblo Gadara ten quiapiayaj
ninyolijtic in amocuali ejecame**

(Mr. 5.1-20; Lc. 8.26-39)

²⁸ Huan ajsic Jesús sentapalpa den hueyíat in mar de Galilea, campa calyetocque in pueblojuani de Gadara. Huan de ompa quinamiquitoj Jesús ome taca ten quiapiayaj ninyolijtic in amocuali ejecame. Huan ne taca hualquisque itech ne ánimajtecochme, huan catcaj semi yoltahuelme. Huan amo aquen huelía panohuaya itech ne ojti. ²⁹ Huan in omen peuque tzajtzi ijcuín:

—¿Toni ticpía tohuan, Jesús, Teconetzin de Dios? ¿Xe tihuala nican para titechtajyohuiltis tejuan achtopa que hualasquía ne tonalme de tatzacuilitis?

³⁰ Huan amo huejca yetoyaj semi míc pitzome ten tacuajtoyaj huan ixtahuanentoyaj. ³¹ Huan in amocuali ejecame quitatautijque Jesús ijcuín:

—Como titechcalanquixti de nijín tagat, xitechcahua ma ticalaquican tech ne pitzome.

³² Ijcuacán in Jesús quinnahuatij ijcuín:

—Xiyacan pos.

Huan ijcón in amocuali ejecame quisque itech ne taca huan calacque tech ne pitzome. Ijcuacán in pitzome peuque motalojtinemij huan motaquesuijque tech ne hueyíat huan ijcón nochi in pitzome moaelsimijque tech in marijtíc. ³³ Huan ne naquen tapiayaj ica ne pitzome, yejuan moucacholojque huan yajque tech innpueblo huan ompa peuque

quitetapohuiyaj nochi ten mochihuac ica por ne ome taca ten quiapiayaj in amocuali ejecame. ³⁴ Ijcuacán in pueblojuani yajque quinamiquitoj Jesús. Huan cuac quitacque ya, ijcuacán quitatautijque Jesús de que ma quisa de ne inpueblojcopaca.

**Nican tajtoa de queniu Jesús
Temaquixtijque quipajtij se cocoxque
de ninacayo sepoutoc**

(Mr. 2.1-12; Lc. 5.17-26)

9 Huan ijcón in Jesús calayic itech in barco huan panoc sentapalpa de hueyíat den mar de ne Galilea, huan ajsito tech ne ipueblo. ² Huan ijcón mochihuac ne tonal que sequi taca cualcuilijque campa yetoya Jesús se cocoxque den nochi ninacayo tamisensepoutoc, huan amo huelía nejnemía, huan ne cocoxque huetztihualaya tech se petatzin. Huan cuac Jesús quitac nintacuautamatis de nojón nahui taca, ijcuacán in Jesús quilij in cocoxque ijcuín:

—Ximoyolchicahua, noconetzin, porín motajtacoluan nimitztinapojpoluía ya.

³ Huan ijcón sequi tanextiliani den tanahuatil de Moisés ten ipa yetoyaj ya calijtic, yejuan quiyolnemiliayaj ijcuín: “Nijín tagat quimohuispoloa Dios ica itajtoluan”.

⁴ Ijcuacán in Jesús nimantzin quinixmatilij nintalnamiqulis de ne tanextiliani huan quinilij ijcuín:

—¿Queyé nanquiyolnemilíaj ten amo cuali? ⁵ ¿Catiyejua tajtol cachi amo ohui cuac niqulis ne cocoxque? Ma niqijto: “Nimitztapojpoluaj ya motajtacoluan”, oso ma niqijto ijcuín: “Ximoquetza huan xiyó mochan”.

⁶ Huan nejua namechyecmatiltía que Nejuatzin ya ni Yecagatzin de Dios. Huan nicpía tanahuatil nican talticpac para niquintapojpoluis naquen motajtacolmacac ya.

Huan de ompa Jesús quilij in cocoxque ijcuín:

—Ximehua huan xicui motapech huan xiyó mochan.

⁷Huan ijcón in cocoxque ten amo huelía nenemía, yejua ne moquetzac huan yajqui ichan. ⁸Huan cuac in tagayot quitacque ya toni mochiuac, ijcuacán semi quimoucaitacque huan quimohuistilijque Dios porín Dios quimactilij ya senme den talticpacuani de ne chichahualis de tapajtía ica chicaucahuelilis.

**Nican tajtoa de queniu Jesús
Temaquixtijque quinoztac in Mateo
ma quitoctili Yejuatzin**

(Mr. 2.13-17; Lc. 5.27-32)

⁹Huan queman Jesús panotiaya ompa, ijcuacán Yejuatzin quitac se tagat ten monotzaya Mateo tocotziutoc caltteno campa quintopaluiaya in pueblojuani. Ijcuacán in Jesús quilij ijcuín:

—Xinechtoctili huan xinechtacamatiyás.

Ijcuacán in Mateo moquetztiquisac huan yajqui quitoctilito Jesús ma momachtiti de Yejuatzin.

¹⁰Huan ijcón cachi satepan yajqui Jesús tacuato ichan Mateo. Huan no hualajque miacque tatopaluiani ihuan in taca ten amo quitacamaque in tanahuatil de Moisés. Huan ijcón sen tacuajtoyaj ihuan Jesús huan imomachtijcahuan. ¹¹Huan cuac in fariseos quitacque que in Jesús sen tacuajtoya ihuan in tatopaluiani, ijcuacán yejuan quintajoltijque ne imomachtijcahuan de Jesús ijcuín:

—¿Queyé namotamachtijcau tacuajtoc ihuan ne tatopaluiani huan in taca ten amo taticamatinemij den tanahuatil de Moisés?

¹²Huan queman in Jesús quicayic ijcón nijín matájtanti, ijcuacán Yejuatzin tananquilij ijcuín:

—In tagayot ten mopohuaj yolpactocque, yejuan nojonques amo

monequij tepajtijque. Ta, namechilía que sayó in cocoyani monequij tepajtijque. Ica ya nojón ninuan nisentacujtoc nijín tatopaluiani.

¹³Xiyacan huan xicyecajsicamatican toni quijosnequi nijín tajtol de Tajtoltzin de Dios: “Nicnequi xiteyolicnelican huan amo nicnequi sayó xinechtayocolican tapialme para ica nannechmohuistilisque”. Nejuatzin amo nihuala niquintemoco naquen mopohuaj yolchipauque. Ta, sayó niquintemoco tajtaclejque para ma yejuan ma moyolnemilican den nintajtacoluan.

**Nican tajtoa de queniu
quitajoltijque Jesús Temaquixtijque
cox monequi mosahuasque**

(Mr. 2.18-22; Lc. 5.33-39)

¹⁴Huan ijcón hualajque imomachtijcahuan den Juan Taahuijque huan quitajtanilicoj Jesús ijcuín:

—Tejuan huan in fariseos timosahuaj miacpa. Huan momomachtijcahuan, ¿queyé amo no mosahuaj?

¹⁵Huan Jesús tananquilij ijcuín:

—Amo huelis moyolcoscosque nochi in taijitalme ten hualajque para moyolpactisque tech in iluit de ne namictilis, como yetoc oc in teyoquich. Pero queman hualas ne tonal cuac in teyoquich cajchihuasque, ijcuacán tech ne tonalme huelis mosahuasque nochi in taijitalme.

¹⁶Huan ijcón in Jesús quinnextilij in tacaquini ica nijín nexcuitil huan quinejnehuililtij in yancuic nemilis ihuan in yancuic tasal huan yancuic vino:

—Huan no ijcón amo aquen quijtzoma se yancuic tasal tech se tasalsol. Porín cuac se quipacas, ijcuacán yejua ne mismo in yancuic tasal motocotzos huan ijcón cachi quixcocototzas in tasalsol huan cachi hueyi tzayanis.

¹⁷Huan amo no aquen quipanteca

in yancuic vino tech in cuetaxsolme. Porín in yancuic vino, yejua ne mochicahualtía huan atzitzicasquisa. Huan ijcón quitzayanas in cuetaxsol huan mimilahuis nochi in vino. Huan ijcón ijta cahuis in cuetaxsol. Pero in yancuic vino se quitequilía tech in yancuic cuetaxme huan ijcón in vino huan in cuetaxme yejuan nojonques amo ijta cahuisque.

**Nican tajtoa de queniu Jesús
Temaquixtijque quipajtij isuapil den
tayecanque Jairo, huan no quipajtij
in sihuat ten quinalmatocac Jesús
itasal**

(Mr. 5.21-43; Lc. 8.40-56)

¹⁸Huan cuac Jesús quinnextiliaya oc in tagayot de nijín tajtolme, ijcuacán huala se tayecanque den judíos huan motacuaquetzaco huan motentocaco iixpantzinco Jesús huan quilij ijcuín:

—Nosihuapiltzin yequin momiquilij, huan como Tejuatzin tiyás huan ticsohuas momatzin ipan nosihuapiltzin, ijcuacán yejua ocsepa quipías nemilis.

¹⁹Huan ijcón moquetzac Jesús huan yajqui ihuan in tayecanque den judíos huan quitocitlijque Jesús imomachtijcahuan.

²⁰Huan no yetoya se sihuat naquen mococoaya esmeyaya majtactiomome xihuit huan motoquij icampa Jesús huan quinalmatoquilij itilmajtzin in Jesús. ²¹Porín sihuat moyolnemiliaya ijcuín: “Ta sayó nicnalmatocas itilmajtzin, ijcuacán nejua nipajtis”.

²²Huan Jesús mocuitapancuepac huan quisenitac in sihuat huan quilij ijcuín:

—Ximoyolchicahua, tejua sihuatzin, ica por nojón motacuaumatilis ten ticpía, tejua tipajtij ya.

Huan ijcón tech ne momento pajtic ya in sihuat.

²³Huan cuac calayic Jesús tech ichan den Jairo, yejua in tayecanque tagat den judíos, ijcuacán in Jesús quinitac in

tatzotzonani ten tapitzayaj huan mías tagayot mocuejmolojtoyaj. ²⁴Ijcuacán in Jesús quinilij in tagayot ijcuín:

—Xiquisacan de nican, porín in sihuapil amo miyic. Ta, sayó coctoc.

Huan in tagayot quiquejqueloayaj san de Jesús. ²⁵Huan cuac quisque ya in tagayot, ijcuacán in Jesús calayic huan quimaquitzquij in sihuapiltzin huan yejua moquetzac. ²⁶Ijcuacán tech ne pueblojcopaca nimantzin motetapohuij itech in pueblojuani de nijín chichahualis de Jesús por lo que ten quichihuac Yejuatzin.

**Nican tajtoa de queniu Jesús
Temaquixtijque quintachialtij
ome ixpojpopoyome**

²⁷Huan cuac quisac Jesús de ne ichan in Jairo, ijcuacán quitocitlijque ome taca ixpojpopoyome huan quitzajtzilijtiyayaj huan quiliayaj Jesús ijcuín:

—Xitechonyolicneli, Tejuatzin Temaquixtijque tion Teconetzin de rey David.

²⁸Huan queman Jesús calayic ya itech ichan, ijcuacán motoquijque in taca ixpojpopoyome, huan Jesús quinilij ijcuín:

—¿Xe namejuan nanquineltocaj que nihuelis namechpajtis?

Ijcuacán yejuan tananquilijque ijcuín:

—Quema, Totecotzin.

²⁹Ijcuacán in Jesús quinxmatocac huan quinilij ijcuín:

—Ma ijcón mochihua porín namejuan nanquipíaj ya in yec tacuaumatilis.

³⁰Huan niman ixpajtijque. Huan Jesús quinnajnahuatíj ijcuín:

—Xiquitacan, amo aquen xictapohuican aconí namechpajtij.

³¹Huan quisque in taca huan peuque quitetapohuiayaj nohuiyan tech in pueblojuani de nochi in pueblos nochi ten quichihuac Jesús.

**Nican tajtoa de quenín Jesús
Temaquixtijque quipajtij se
tagat ten amo huelía tajtoaya**

³²Huan cuac yequin quisque nojón taca ten catcaj ixpojpayome, ijcuacón cualcuilijque campa Yejuatzin se tagat ten amo huelía tajtoaya huan no quipiaya iyolijtíc se amocuali ejecat.

³³Huan cuac Jesús quicalanquixtilij ya in amocuali ejecat, ijcuacón ne tagat ten amo huelía tajtoaya, yejua ne pehuac yec tajtoa ya. Ica ya nojón in tagayot semi quimoucaitacque huan quijtoayaj ijcuín:

—Amo queman ijcón tiquitayaj se hueyi mohuiscatequit queme nijín itzalan in pueblojuani de Israel.

³⁴Huan in fariseos no quijtoayaj ijcuín:

—Nijín tagat Jesús quincalanquixtía in amocuali ejecame ica ichicahualis den tayecanque den amocuali ejecame.

**Nican tajtoa de queniú
Jesús Temaquixtijque
quinyolicnelij in tacaquini**

³⁵Huan Jesús nentiaya tech nochi ne pueblójme campa ne milajyetoni huan quinnextilijtiaya itech in tiopanme de judíos, huan quinnójnotzaya ica in yancuic Tajtoltzin de que Dios momasoutoc ica ichicahualis para quinyolyecantiyás itaneltocacahuan. Huan no Jesús tapajtiaya ica nochi de míac tataman cocolisme huan nochi de míac tataman tonehuilisme ten quipiayaj in pueblojuani. ³⁶Huan cuac Jesús quintitac in huel míac tagayot, ijcuacón Yejuatzin semi quinyolicnelij porín in tagayot tajyohuijtoyaj huan tayocoyayaj queme ichcame ten cuamoyautocque huan queme ne ichcame ten amo quípaj in tapixque. ³⁷Ica ya nojón in Jesús quinilij imomachtijcahuan ijcuín:

—Yec melau míac ongac milajtapixcalis huan amo miacque

naquen tequitisque. ³⁸Ica ya nojón xictatanilican Namohueyitajtzin Dios ten niaxca in tapixcalis, ma Yejuatzin quinqualtitani míac tequitini para ma quisentilican nochi nijín taquilome.

**Nican Jesús Temaquixtijque
quinnotzac in majtactionome
imomachtijcahuan ma quitoctilican
Yejuatzin**

(Mr. 3.13-19; Lc. 6.12-16)

10 Huan Jesús quinnotzac in majtactionome imomachtijcahuan huan quinxexelohuilij cada se in tanahuatil para ma yejuan ijcón huelis quincalanquixtisque in amocuali ejecame, huan para ma ijcón huelis tapajtisque ica nochi den tataman cocolisme huan toneucayome den quípaj in pueblojuani. ²Yejuan nijín tocayme den majtactionome itatitaniluan de Jesús. Achto Simón ten no cojpatocaytijque Pedro, ihuan niicniu Andrés, huan Jacobo ihuan niicniu Juan, nijín omen iteconeahuan de Zebedeo. ³Huan no catcaj itatitaniluan de Jesús in Felipe, huan Bartolomé, huan Tomás, huan Mateo in tatopaluijque, huan Jacobo yejua iteconeu Alfeo, huan in Lebeo ten no quitocajtijque Tadeo. ⁴Huan no catcaj itatitaniluan de Jesús in Simón ten pohúa ihuan in taca poltícos ten yolchicaque; huan no in Judas Iscariote naquen quitemactij Jesús ma quimictican.

**Nican tajtoa de queniú Jesús
Temaquixtijque quinmactilij
nintequiú imomachtijcahuan**

(Mr. 6.7-13, Lc. 9.1-6)

⁵Huan ijcón in Jesús quintitanic nijín majtactionomen huan quinyecmatiltij ijcuín:

—Amo xiyacan campa calyetocque in pueblojuani ten amo judíos, nión

no xicalaquican tech in pueblos
 campa Samariajcopaca. ⁶Ta, xiyacan
 achto tech ne campa pueblojuani
 de Israel campa in tagayot nemij
 queme ichcame ixcuamoyautocque.
⁷Huan xiyacan xiquinmatiltican
 que Totajtzin Dios motoquijtoc ya
 huan quimonequiltía quinyolyecanas
 itaneltocacahuan ica in chichualis
 den eluiyactzinco. ⁸Xiquinpajtican
 cocoyani, huan xiquinchipahuacan
 naquen inacayo cocotocatoc, huan
 xiquinyolitan miqueme, huan no
 xiquincalanquixtican in amocuali
 ejecame. Huan ijcón queme Dios
 namechtayocolij ya nijín chichualis,
 no ijcón xictequitiltican huan amo
 teyi xiquintopaluican. ⁹Huan amo no
 xicuiyacan tomin de istac nión tomin
 de plata nión de cobre, nión ocsé
 taman oc. Huan amo no xicuiyacan ne
 tominehualoni ten mitzpalehuisquía
 tech in ojti. ¹⁰Ta, xicuiyacan se
 panti san namotilma; huan amo no
 xicuiyacan ocsequin tegacme huan nión
 namotopil. Porín tacaquini quinamiquij
 ma quintamacacan nijín tequitini ica
 ne tacualis porín tanojnotztinemij ica
 in Tajtoltzin de Dios.

¹¹Huan no Jesús quinilij nijín
 majtactionmomen ijcuín:

—Huan cuac nancalaquisque tech
 se pueblo oso milajpa, ijcuacón
 xictemocan se tagat ten nanquitasque
 que namechtasojta, huan ompa
 ichan ximocahuacan hasta cuac in
 tonal cuac namoquepasque. ¹²Huan
 cuac nancalaquisque tech se cali,
 ijcuacón xiquintajpalocan huan
 xiquinilican ijcuín: “Xiyolpactocan
 tohuanme”. ¹³Huan tacán ne calyetoní
 namechselfaj, ijcuacón ma yetoti
 ninpan ne paquilis de Dios. Huan tacán
 ne calyetoní amo namechselfaj ica
 paquilis, ijcuacón xiquincautehuacan
 huan xiquinchicaucanajnahuatican que
 Dios amo quinmacas ne yolpaquilis.

¹⁴Huan tacán cansica acsames
 amo namechselfaj huan amo no
 namechcaquilíaj namotanojnotzalis,
 ijcuacón xiquisacan de ne cali oso de
 ne pueblo huan ximometztzejzelocan
 ma huetzi nochi ne talnex ten mopiloj
 namometztampa para ma ijcón
 ixnesis que Dios quintatzacuiltis nijín
 pueblojuani porín yejuan quixtopeuque
 ya in Tajtoltzin de Dios. ¹⁵De yec melau
 ten namechilía que tech ne tonal cuac
 huetzis in hueyi tatzacuiltis de Dios,
 ijcuacón cachi oncas tajyohuilis tech
 nijín pueblojme ten quixtopeuque in
 Tajtoltzin de Dios. Huan amo quipías
 hueyi tatzacuiltis in ome pueblojme
 de Sodoma huan Gomorra, masqui
 Dios quintajtamij ica tit nojón ome
 pueblos ne queman ya ica porín pitzotic
 nintajtacoluan.

**Nican Jesús Temaquixtijque
 quinajsicamatiltij in
 majtactionmomen den tajyohuilis
 ten hualas para in taneltocani**

¹⁶Huan no Jesús quinnnextiliayaj in
 majtactionmomen ijcuín:

—Xiquitan, Nejuatzin namechtitani
 xiyacan queme ichcame yolcualime
 huan xitequititij intzalan ne
 tagayot majyá tecuanime. Huan
 xitequititij ica cuali tanemililis
 queme cohuat ten quimati quenín
 mopalehuis. Huan xitequititij ica
 ne yolcualtagayot ijcón queme in
 paloma ten sayó quinchihuilía ten
 cuali. ¹⁷Huan no ximoyecpiacan
 den ne tagayot ten amo taneltocani.
 Porín yejuan namechtemactisque
 para ma namechtelchihuacan
 ihuan ne tequihuanime huan
 namechuijutequisque itech in
 tiopanme den judíos. ¹⁸Huan no
 namechuicasque ninixpan huejueyin
 chihuanime, gobernadores huan
 in rey sayó porín namejuan
 nantacuatamatij ica notocay. Huan

masqui nanmoquetzatihue inixpan ne tequihuani, pero namejuan nanquinnextilisque de notajtoluan. Huan ijcón nochi huelis nantajtosque de notajtoluan ninixpan in huejueyin chihuanime huan ninixpan in tagayot ten amo pohúfaj ihuan Dios. ¹⁹Huan ne cuac namechtemactisque inmaco in tequihuani, ijcuacán amo ximoyolcuejmolocan de quenín nantanankuilisque oso toni nanquijtosque. Porín cuac ejcos ne momento, ijcuacán Dios Yejuatzin namechmacas toni ica nantajtosque. ²⁰Ijcuacán amo namejuan nantajtosque. Ta, tajtos Yejuatzin in Yecticatzin Espíritu namotech ten Totajtzin Dios cualtitanis.

²¹Huan no Jesús quinilij in majtactionmomen ijcuín:

—Huan ijcuac in icniú quitemactis iicniú ma quimictican; huan in tetat quintemactis niconehuan ma quinmictican. Huan no in teuan moajocuisque huan quitehuisque nintat; huan no ijcón quinmictisque.

²²Huan ijcón nochin in talticpacuani namechtahuelitasque porín nantacautamatij ica notocay. Huan naquen yec tacuautamati hasta cuac in miquilistempa, yejua ne maquisas.

²³Huan cuac namechtajyohuiltisque tech se pueblo, ijcuacán xicholocal huan xiyetotij ocseco tech ocse pueblo. Yec melau ten namechilía que Nejuatzin ni Yectagatzin amo nihualas achtopa de ijcuac nantaminemisque ya huan nantamitanojnotzasque ya inpan in pueblojuani de Israel.

²⁴Huan se momachtijque amo huelis mochihuas cachi hueyi chiuque huan que nitamachtijcau. Huan no ijcón se taquehual amo huelis mochihuas cachi hueyi chiuque huan que nipatrón. ²⁵Porín monequía de que se momachtijque ma no tajyohuis queme itamachtijcau tajyohuí. Huan

no ijcón monequi de que se taquehual ma no quijyohuis ijcón queme ipatrón tajyohuí. Huan Nejuatzin nechtocaytijque ni amocuali Beelzebú, huan Nejuatzin ya nitetat den nochi in taneltocani. Huan no ijcón namejuan no cachi oc namechtocaytisque nanamocualime porín nanpohuij nohuan huan nannechtocitláj para nechtacamatisque.

**Nican tajtoa de queniu Jesús
Temaquixtijque techmachtij de aconí
monequis ticmoucatocasque**

(Lc. 12.2-9)

²⁶Huan ijcón in Jesús quinnextiliaya in majtactionmomen ijcuín:

—Huan cuac nanquinnojanotzasque in tacaquini ica notajtoluan, ijcuacán xiquinequilican huan amo xiquinpinahuilican. Porín nochi tanemililis ten motatijtóc, yejua ne quipía de que monextis. Huan nochi in tachihualis ten mopachojtóc, yejua ne quipía que momatis. ²⁷Huan nochi ten namechiliaya cuac tisenolochyetoyaj campa ne yecahuila, yejua ne namejuan xiyacan xictentelican senteixteno campa ne tonala ya. Huan nochi ten namechichtacailijca ya namonacastenteno, yejua ne xitanojnotzatij senteixteno desde ne mercado. ²⁸Huan amo no xiquinmohuilican ne naquen ten temictía den se inacayo, porín yejua ne amo huelis quimictisque se italnamiqilis. Ta, cachi cuali ma xicmoucatocacan Totajtzin Dios, porín Yejuatzin melau huelis quitajtamis namonacayo huan no namotalnamiqilis tech in mictan campa tajyohuilis den tit.

²⁹Huan ome tototzitzin, ¿canachica huelis tiquinnamacasque? Pues sayó ica se quinto. Huan Totajtzin Dios quinyecpíxtoc nijín tototzitzin huan amo quincahuas ma huetzican como

amo quimonequiltía. ³⁰Porín Dios Yejuatzin cachi namechueyichihuas huan que namotzonuan, huan Totajtzin Dios quinpohua namotzonuan huan Yejuatzin cuali quimati canachi ongac. ³¹Ica ya nojón amo ximomoutican cuac in tagayot namechchihiuifaj tensá ten amo cuali. Porín Dios cachi namechueyichihuas namejuan huan que ne tototzitzin.

Nican tajtoa de neques tacaquini ten quiequilij senteixteno que yejuan pohuij ihuan Jesús Temaquixtijque

(Lc. 12.8-9)

³²Huan no Jesús quinilij ijcuín:
—Huan nochi ne naquen quiequilifaj senteixteno que yejuan yec tacuautamatij nohuantzin porín Nejuatzin ni Cristo, Nejuatzin ya nicyequiliti Notajtzin Dios ten yetica nepa eluiyactzinco de que yejuan melau poutocque nohuan. ³³Huan nochi naquen teilisique senteixteno que amo nohuan tacuautamatij, Nejuatzin nicyequiliti Notajtzin Dios ten yetica nepa eluiyactzinco de que yejuan amo nohuan pohuij.

**Nican Jesús Temaquixtijque
quinajsicamatiltij in
majtactionmomen de que cuac se
taneltoaca de Dios, ijcuacán huelis
ongas cualanyot tech se icalyetolis**

(Lc. 12.51-53; 14.26-27)

³⁴Huan no Jesús quinilij in majtactionmomen ijcuín:
—Huan amo xicnemilican que Nejuatzin nihuala para namechualcuilis sayó in yec yetolis nican talticpac. Porín melau amo nihuala para namechualcuilis sayó ne yec yetolis. Ta, namechualcuilis ne tehuilis huan ne xexxelolis. ³⁵Huan no nihuala para ma in teconeu de se calyetoni quixnamiqui itat, huan para ma in teichpoch moxexelos de inan, huan para ma

in tesihuamon ma amo quiequitas imonan. ³⁶Huan cuac se tagat tacuautamatis nohuan, ijcuacán yejua quitahuelitasque ichancahuan. ³⁷Huan amo quinamiquis de que ma pohisque nohuan ne teconejuan taneltocani como cachi quintasojtaj itat huan inan huan como amo nechtasojtaj Nejuatzin. Huan amo no quinamiquis de que ma pohuis nohuan ne tetat taneltocacque como cachi quintasojta ne itelpochuan huan como amo nechtasojta Nejuatzin.

³⁸Huan Jesús quinnextiliaya in majtactionmomen nijín nexcuitil ijcuín:
—Nicjnehuililtía ne cruz queme se tajyohuilis. Huan como in taneltocani amo taxicojtiyasque ica nijín tajyohuilis cuac nechtoctilisque, ijcuacán yejuan amo quinamiquis pohisque nohuan. ³⁹Huan nochi ne naquen quinejnequisque quieyecpiasque ninemilis nican talticpac, yejuan nojón quipolosque san. Pero nochi naquen quisecocahuasque huan quipolosque inemilis nican talticpac porín nohuan yec tacuautamati, yejuan nojonques quiselisque ne yec nemilis ten amo queman tamis.

**Nican Jesús Temaquixtijque
quinajsicamatiltij in
majtactionmomen de ne
tetayocolilisme**

(Mr. 9.41)

⁴⁰Huan Jesús quinnextiliaya ijcuín:
—Nochi naquen namechselisque, no nechselisque Nejuatzin. Huan nochi ne naquen nechselisque, no quiselisque Notajtzin Dios naquen nechualtitanic. ⁴¹Huan nochi taneltocani ten quiselisque se itanahuatijcau de Dios porín yejua huitza itencopa de Totajtzin Dios, yejuan nojón no quiselisque ne tetayocolil de Dios ijcón queme in tanahuatijque. Huan nochi taneltocani ten quiselisque se yolchipaucatagat porín yejua no

volcualtagat, yejuan quiselisque ne cuali tetayocolil de Dios, ijcón quemé ne tagat ne volcualtagat. ⁴²Huan nochi taneltocani ten quimacasque tzictzin sesecat ma quiyolsehui senme de nijín nomomachtijcatzitzin sayó porín yejuan notanahuatijcatzitzin, de yec melau namechilá que yejuan nojonques quiselisque ne tetayocolil de Dios.

**Nican tajtoa de queniu
imomachtijcahuan in Juan
Taahuique yajque quinojnotzatoj
Jesús Temaquiuxtijque**

(Lc. 7.18-35)

11 Huan Jesús quintamitequimactij ya ne majtactionome imomachtijcahuan. Huan de ompa Jesús quincateu imomachtijcahuan huan yajqui tanojnotzato huan quitenextilito in Tajtoltzin de Dios itech ne pueblojuani campa ninpueblojuan imomachtijcahuan. ²Huan in Juan Taahuique tzactoya cárcelijtic huan quimatiltijque Juan den tachihualisme de Jesus in Cristo Temaquiuxtijque. Ijcuacán Juan quintitanic ome imomachtijcahuan huan yejuan yajque, ³huan quitajtoltitoj Jesús ijcuín: —¿Cox melau Tejuatzin ya ti Cristo tanahuatijque de Dios ten hualasquía? Oso, ¿cox ticchiasque oc ma huiqui ocsé tanahuatijque de Dios?

⁴Ijcuacán in Jesús tananquilij ijcuín: —Xiyacan huan xicmatiltitij ne Juan de nochi notachihualisuan ten nanquicactocque ya huan ten nanquitztocque ya. ⁵Xictapohuican ne Juan de que in xipojpayome Nejuatzin niquintachialij ya. Huan in coxojme, axcan niquinnejnemiltij ya. Huan nochi cocoyani ten cocotocatoyaj ninacayo, axcan Nejuatzin niquinchipahuac ya huan niquinpajtij ya. Huan nochi naquen amo tacaquíaj, axcan niquintacaquiltij ya. Huan in taca ten

momiquilijcay ya, yejuan nojonques niquinpanquixtij yoltocque. Huan no xictapohuican ne Juan que neques ten ixnestinemij que pobres huan amo teyi chihuanime, yejuan nojonques niquinnextilijtoc in yancuic Tajtoltzin de Dios ten cualcui ne nemaquixtilis. ⁶Huan tatiochihual ya nochi naquen amo quitahuelcaquij huan amo no moyolxocolíaj oc cuac quicaquij notajtoluan.

⁷Huan cuac imomachtijcahuan den Juan Taahuique yajque ya, ijcuacán Jesús pehuac quinojnotzac in tacaquini de toni chiuque ne Juan Taahuique. Huan Jesús quiniliaya ijcuín:

—¿Huan toni nanquitatoj campa ne Juan tanojnotztoya nepa campa tayiucan? ¿Xe nanquisque para nanquitatoj se tagat ten yolmoucat ten quinejnehuilá quemé acaselot ten nepa huan nepa cuihuica in ejecat?

⁸Huan como amo ijcón nancajsicque, ¿toni nanquitatoj? ¿Xe nanquisque para nanquitatoj se tagat de que taquentoc ica tilma ten semi cualtzin? Xiquitacan san, nanquimatij ya namejuan que ne naquen motaquentía huan mocualnextíaj ica tilma cualtzin, yejuan nojonques yetocque sayó ichanuan den hueyueyinme tayecanani reyes. ⁹Huan como amo ijcón nancajsicque, ¿toni nanquisque nanquitatoj? ¿Xe nanquisque para nanquitatoj se itanahuatijcau de Dios? Quema, ijcón melau nanquitatoj. Huan no namechilá que ne Juan Taahuique, yejua ne in cachi hueyi chiuque huan que nochi in osequin tanahuatiani de Dios ten nemicoj ya. ¹⁰Huan tajtoa de Juan tech in Tajcuilolamatzin de Dios campa quijtoja ijcuín:

Xiquitacan, Nejuatzin nictitanic se notanahuatijcau huan yejua mitzyecanas, huan mitzachtohuijtiyás para mitzyejectalijtiyás moojpan.

¹¹ Huan de yec melau no namechilía ijcuín:

—Amo aquen ongac ocsé cachi hueyi chiuque de nican talticpacuani. Ta, sayó ne Juan Taahuijque. Pero axcan se tagat ten amo hueyi chiuque huan motemactis imaco Cristojesús ma Yejuatzin quiyolyecana inemilis, yejua ne cachi hueyi tatiochihualis quiselijtiyás huan que ne Juan Taahuijque quiselij. Huan axcan ne Juan Taahuijque amo hueyi chiuque oc.

¹² Huan ijcón Jesús quinnextiliaya imomachtijcahuan ijcuín:

—Itech ne tonalme cuac Juan Taahuijque achtopa nemico tohuan hasta axcan, Totajtzin Dios naquen tayecana ne eluiyactzinco, Yejuatzin quimonequiltij de que ma in tagat taneltocacque ma moyojvolchicahua huan ma mofuerzajuí para ma Dios quiyolyecana ica ichicahualis. Huan nochi naquen moyojvolchicahuas itech Cristo, yejua ne huelis calaquis campa Dios quinyolyecanas imomachtijcahuan ica ichicahualis. ¹³ Huan nochi nijín tanahuatiani de Dios huan tanahuatilme de Moisés, nochi yejuan tatetapohuijtihualayaj ica ne chicaucatajtolis de que Dios quimonequiltis quinyolyecanas itaneltocacahuan ica ichicahualis. Huan in Juan Taahuijque no tajtojtihuala ica nijín tajtolis.

¹⁴ Ijcuacón no Jesús quinilij ijcuín:

—Como nanuelij nancajsicamatij nijín tajtol, namechyequilisque que in Juan Taahuijque, yejua ne tanahuatijque de Dios monotza Elías den achtopa quijtojca ya in tanahuatiani que hualasquí. ¹⁵ Huan ijcón nochi naquen quipías inacasuan para tacaquis, ma yec tacaqui huan cajsicamatis.

¹⁶ Huan Jesús quinmachtij in tacaquini ica nijín nexcuitil:

—Huan, ¿tonica niquinnejnehuililtis in tagayot ten nijín tonalme nemij?

Niquinnejnehuililtía queme coneme ten motalijinemij tech in plaza huan tzajtzitinemij ihuan ocsequin coneme ten ninuan mahuiltijtinemíaj. ¹⁷ Huan sequin de ne coneme quilisque ocsequin ijcuín: “Tejuan ticnequíaj namohuan timahuiltisque huan tejuan tamechtatzotzoniliayaj huan tejuan no tamechtapichiliayaj, pero namejuan amo nanquinecque nanmijtotisque. Huan no tamechcantarohuiliayaj ica ocsequin canciones ten tetayocoltíaj, pero namejuan amo no nanchocacque”.

Huan no in Jesús quinilij in tagayot ijcuín: Huan ijcón queme nijín coneme sayó teijtojtinemíaj, namejuan sayó nantatejtenehuani san. ¹⁸ Pero cuac huala Juan Taahuijque, ijcuacón yejua ne amo teltacuaya huan amo no tayaya ne vino queme namejuan. Huan ijcón namejuan nanquijtojque que Juan quiapiaya iyolijtic se amocuali ejecat. ¹⁹ Huan cuac Nejuatzin nihuala, Nejuatzin ni Yectagatzin, ijcuacón nitacuaya huan nitayaya ne vino, huan no ijcón namejuan nannechijtohuiliayaj ijcuín: “Xiquita san nijín tagat Jesús de Nazaret, yejua ne teltacua huan tayitinemi ne vino huan no motasojtatinemi ihuan ne tatopaluiani huan no motasojtatinemi ihuan neques ten amo quitacamatque itanahuatil in Moisés”. Huan in Tajtoltzin de Dios technextiliaya ijcuín: “Huan Dios itanemililis monextijtiyás tech in chipaucanemilis den naquen melau yec tacuautamati ihuan Dios”.

**Nican Jesús Temaquixtijque
quinmachtij in tacaquini de ne taca
amo tatacamatini que yejuan melau
tajyohuisque**

(Lc. 10.13-15)

²⁰ Huan ijcón in Jesús pehuac quinchicaucanajnahuatía ne pueblojuani campa Yejuatzin quichihuac ne cachi huejueyin

mohuiscatequime. Porín ne pueblojuani melau amo moyecyolnemiliayaj den nintajtacoluan. ²¹Huan Jesús quinilij ijcuín:

—Nantelteicneltiani namejuan, pueblojuani de nanpohuij de ne pueblo monotza Corazín. Huan no ijcón nantelteicneltiani namejuan, nanopueblojuani de Betsaida, porín amo nanmoyecyolnemiliayaj de namotajtacoluan. Huan in pueblojuani de Tiro huan Sidón cachi moyecyolnemilisquíaj ya de nintajtacoluan como ijcón quitasquíaj queme namejuan nanquitacque ya nijín mohuiscatequime ten nicchihuac ya. Quema, in pueblojuani de Tiro huan Sidón, yejuan cachi moyecyolnemilisquíaj ya huan motaquentisquíaj ya ica ne tilma den tzastic huan moixcuounexuisquíaj ya para ixnesisquía que yejuan quiyecajsicamatisquíaj ya que yejuan tajtacolejque.

²²Huan ijcón no Jesús quinilij:

—Huan ne tonal cuac namopan huetzis ne hueyi tatzacuilitis, ijcuacán yec melau cachi hueyi tatzacuilitis nanquiselisque namejuan. Huan ne tagayot campa pueblos de Tiro huan Sidón amo cachi hueyi tatzacuilitis quiselisque. ²³Huan namejuan, pueblojuani de Capernaum, nanmoyolcajcayahuaj san porín nanmoyolueyinectinemij huan nanquinequij nanajsisque hasta ne eluiyactzinco. Pero xicmatican que Dios namechtajyohuiltis huan namechtalpantalis hasta ne tani campa in ánimajme tajyohuijtocque. Huan in pueblojuani de Sodoma cachi moyecyolnemilisquíaj ya den nintajtacoluan como quitasquíaj ya ijcón queme namejuan nanquitacque ya nijín mohuiscatequime ten Nejuatzin nicchihuac namohuan, huan ijcón yejuan ne pueblojuani yetosquía

tohuan oc hasta axcan. ²⁴Ica ya nojón namechilía que ne tonal cuac namopan huetzis ne hueyi tatzacuilitis, ijcuacán melau cachi hueyi tatzacuilitis nanquiselisque namejuan huan que ne pueblojuani ten quiyehualojtoyaj Sodoma.

Nican Jesús Temaquixtijque quinilij in tacaquini ijcuín: “Xihualacan nohuan huan namechyolsehuis”

(Lc. 10.21-22)

²⁵Huan tech nojón tonalme Jesús quilij Itajtzin Dios ijcuín:

—Nimitzonueyimohuistilía, Notajtzin Dios, tion Tecotzin den eluiyactzinco huan den nican talticpac. Porín Tejuatzin tiquintatilij ya nijín taixmatilis para ma amo quimatican in taixmatini huan in tamachilejque. Huan Tejuatzin tiquinnexilij ya in yec taixmatilis de nijín moyancuicataneltocacahuan ten yoltanemilijtinemij queme coneme ten ayamo yec yolmajsi. ²⁶Huan ma ijcón ticonchiutica, Notajtzin Dios, porín Tejuatzin ijcón ticonmonequiltía. ²⁷Huan Tejuatzin Notajtzin tinechonmactilij ya nochi nijín chicahualisme huan tanemililisme. Huan amo aca nechixmatis nejua nimoconetzin. Ta, sayó Tejuatzin ti Notajtzin tinechonixmati. Huan amo no aquen mitzoneyeximatis Tejuatzin Notajtzin. Ta, sayó Nejuatzin nimoconetzin nimitzyequixmati ya. Huan no Nejuatzin nimoconetzin niquinyecnextilis de que aconi Tejuatzin Notajtzin para nochi naquen niconmonequiltía niquinnexililis.

²⁸Huan no Jesús quinilij in tacaquini ijcuín:

—Xihualacan nohuan, nochi namejuan naquen nanmotequitiltijtocque huan nantamamatocque ica ne tajyohuilis de namotajtacoluan. Xihualacan

namejuan nohuan, huan Nejuatzin namechmacas ne yolsehuilis. ²⁹Huan nicnequi xicselican notamachilis itech namonemilipan, queme se yugo ten huelis namechyecantinemis tech moojpan. Huan ica cuali ximomachtican de nejua, porín Nejuatzin niyolyemancatagat; huan niyolcualtagat huan ijcón nancajsisque ne yolsehuilis tech namoyolojuan. ³⁰Porín in yugo de namechtalilis, yejua ne semi amo etic. Huan in tamamal ten Nejuatzin namechmacas, yejua ne semi amo no tesiouti.

**Nican tajtoa de queniu
imomachtijcahuan Jesús**

**Temaquixtijque cajocuicque trigojtet
tech ne tonal de nesehuilis**

(Mr. 2.23-28; Lc. 6.1-5)

12 Huan tech nojón tonalme Jesús panotiaya campa tatocala ica trigo tech se tonal de nesehuilis. Ijcuacán imomachtijcahuan peuque mayanaj. Huan de ompa yejuan peuque cuijuitiyáj huan quiyolcopinayaj nijín trigo huan quicuayaj. ²Huan cuac in fariseos quinitacque ton quichiutiayaj imomachtijcahuan, ijcuacán quilijque Jesús ijcuín:

—Xiquita, momomachtijcahuan quichiutocque ten amo monequía quichihuasquía tech nijín tonal de nesehuilis.

³Huan Jesús quinilij ijcuín:

—¿Xe namejuan amo queman nanquileerojque ten quichihuac in rey David huan itapalehuijcahuan cuac mayanque? ⁴Pos in rey David calayic ichantzin Dios huan quincua ne panes ten quitilijcay ya iixpantzinco Dios para ica quimohuistilisque Dios. Huan nojón panes Dios amo quimonequiltiaya ma acsá quicuanij nión in rey David nión nitapalehuijcahuan. Ta, sayó ma quicuanij in tiopixcame judíos. ⁵Huan, ¿xe amo no nanquileerojque tech in

tanahuatil de Moisés que ne tiopixcame judíos tequitij tech in tiopan de Dios masqui tech in tonal de nesehuilis? Pero yejuan amo motajtacolmacaj cuac tequitij tech in tonal de nesehuilis.

⁶Huan Nejuatzin namechyequilía que nican niyetoc huan cachi nihueyichiuque que ne tiopan de Dios. ⁷Huan, ¿xe namejuan amo nanquimatij toni quijtosnequi nijín tajtol?, ten Dios quijtoj ijcuín: “Nicnequi xicpiacan ne teyolicnelilis, huan amo nicnequi sayó xinechtenilican tapialme san para ica nannechmohuistilisque”. Huan tacán namejuan nanquimatisque ya toni quijtosnequi nijín tajtol, ijcuacán amo nanquintelchihuasque oc nomomachtijcahuan ten amo teyi quichiuque ten Dios amo quimonequiltía.

⁸Huan ijcón in Jesús quinyecajsicamatilij ijcuín:

—Xicmatican ca cuali que Nejuatzin ni Yectagatzin huan ni Tayecancatzin de ne tonal de nesehuilis. Huan Nejuatzin nicpixinemi tanahuatil para niteilis toni cualtías se quichihuas tech ne tonal de nesehuilis.

**Nican tajtoa de queniu Jesús
Temaquixtijque quipajtij se cocoxque
mamijmiquilotic**

(Mr. 3.1-6; Lc. 6.6-11)

⁹Huan ijcón in Jesús panotiaya huan yajqui calayic tech in tiopan de judíos. ¹⁰Huan ompa tocotzyetoya se cocoxque den imay mamijmiquilotic. Huan in tagayot judíos sayó quipijpixinemíaj Jesús para quenín huelis quiteluilisque. Huan ijcón yejuan quitajtolitijque Jesús ijcuín:

—¿Xe Dios quimonequiltía ma onga tapajtilis de cocoyani tech nijín tonal de nesehuilis?

¹¹Ijcuacán in Jesús tananquilij ijcuín:
—Nican yetoc se nexcuitil: Tacán namejuan nanquipiasquíaj se ichcatzin

huan huetzisquía tech se amel tech in tonal de nesehuilis, ¿xe amo nanyasque nanquixtitihue in tapialtzin? Pues quema. ¹²Huan cuali nanquimatij que cachi valeroa se tagat huan que se ichcatzin. Ica ya nojón Dios melau quimonequiltía ma ticchihuacan ten cuali tech in tonal de nesehuilis.

¹³Huan ijcón in Jesús quilij in cocoxque ijcuín:

—Ximomamelahua.

Huan cuac in cocoxque momamelahuac ya, ijcuacón ne imay pajtic ya ijcón queme ne ocsé imay. ¹⁴Huan de ompa quisque in fariseos den tiopan huan peuque quiyolnemiliayaj quenín huelis para quimictisque Jesús.

**Nican tajtoa de queniu Jesús
Temaquixtijque quinmachtis
de ne taquehualtzin ten
Totajtzin Dios quinoztac ya**

¹⁵Huan cuac in Jesús quimatic que in fariseos quinequáj quimictisque, ijcuacón Yejuatzin yajqui huan quitociltiayaj mías tagayot. Huan ijcón Jesús quinpajtiaya mías cocoyani.

¹⁶Pero Jesús quinyecnajnuhuatiya ma amo teyí quijtoanij aconí catca Yejuatzin. ¹⁷Huan Jesús quiniij ijcón para ma mochihua ten quijcuilojca ne huejcautanahuatijque de Dios monotza Isaías cuac yejua tanojnotzaco ijcuín:

¹⁸Dios quijtoj que nican yetoc

Notaquehual ten Nejuatzin

nicnotzac ya.

Yejuatzin ne Notasojconetzin huan nechypactía.

Huan Yejuatzin ya ne nicyolpepexocaltij ya ica Noyecticatzin Espíritu.

Huan Yejuatzin quinajsicamatilts in tagayot ten amo pohuij ihuan Dios de quenín para yec chipaucanemisque.

¹⁹Huan Notaquehual amo elihuistiquiu huan amo

motehuijtinemis nión no tzajtztinemis campa ojmخالمة.

Huan amo aquen quicaquisque nitajtolis tech in hueyi ojme.

²⁰In tajtacolejque ten yolcuetocque niquenejnehuilitía queme in acat ten quimatetziloa in ejecat.

Huan Notaquehual huala para quinyolmelahuaco huan para quinyolchipahuaco neques den tajtacolejque huan amo para quintzojcuilojtiquiu.

Huan ijcón quichihuati

Notaquehual hasta ne tonal cuac nochi tamis ya in tajtacolnemilis.

Ijcuacón motamichihuas in yec chipaucanemilis.

²¹Huan in talticpacuani ten amo pohuij ihuan Dios quichixtosque Notaquehual ma quinmaquixtiqui.

**Nican quiteluilijque Jesús
Temaquixtijque que yejua
cuicatinemi in chichahualis den
amocuali Satanás**

(Mr. 3.19-30; Lc. 11.14-23; 12.10)

²²Huan cualcuilijque campa Jesús se tagat ten quipiaya iyolijtic se amocuali ejecat, se tagat nontzin ten amo tachiaya nión tajtoaya. Pero Jesús quipajtij huan ne tagat huelic tachíac ya huan huelic tajtoj ya. ²³Ijcuacón nochi in tagayot quimoucaitayaj huan quijtoayaj ijcuín:

—¿Xe yejua nijín ne Temaquixtijcatzin iconetzin de ne rey David?

²⁴Huan cuac in fariseos quicacque nijín matájtanti, ijcuacón quijtoayaj ijcuín:

—Nijín tagat Jesús amo quincalanquixtía in amocuali ejecame ica ichicahualistzin de Dios. Ta, yejua quincalanquixtía in amocuali ejecame ica ichicahualis den amocuali Beelzebú naquen quinyecantoc in amocuali ejecame.

²⁵Ijcuacán Jesús
quintanemililixmatic huan quinilij
ijcuín:

—Huan tacán in pueblojuani de se
país moxexxelojtoque se huan ocsé
huan motehisque san, ijcuacán ne
país nochi mohuejuelosque san. Huan
no ijcón como in tagayot de pueblo
oso se calyetoni moxexxelojtosque se
huan ocsé ica xolojpijyot, ijcuacán
ne calyetoni amo queman huelis sen
yetosque ica paquilis. ²⁶Huan tacán
in amocuali Satanás quicalanquixtis
se amocualicniu ica yejua mismo
ichicahualis, ijcuacán yejua ne
motehuía yejua mismo san. Huan ijcón
amo huelis huejcahuas nichicahualis.
Ta, niman huejuelihuis ichicahualis.

²⁷Huan no Jesús quinilij in fariseos
ijcuín:

—Namejuan nanquijtoaj que
Nejuatzin niquincalanquixtía in
amocuali ejecame ica in chicahualis
de ne in amocuali tayecanque
Beelzebú. Pero tacán ijcón nicchihuas,
¿ijcuacán aconí oc quinmacas
chicahualis ne namoconejuan
de ne namopueblojcahuan para
ma yejua quincalanquixtican in
amocuali ejecame? ¿Xe in Satanás
quinmacas namoconejuan ne
ichicahualis? Pues amo melau.
Ta, Totajtzin Dios quinmaca ne
ichicahualis. ²⁸Ica ya nojón namejuan
namoconejuan namechtenextfaj que
nanmocajcayautocque san. Porín
Nejuatzin ya niquincalanquixtía in
amocuali ejecame ica in chicahualis den
Yecticatzin Espíritu. Huan nochi nijín
ten nicchihuac quijtosnequi que ejcóc
ya in tonal queman Dios momasoutoc
namotzalan huan quinyolyecana
itaneltocacahuan ica ichicahualis.

²⁹Huan Jesús no quinilij in tacaquini
ijcuín:

—Se tagat ten semi chicahuac
monequi ma achtopa

quitzijtzicocan para que ijcón huelis
quihuejuelohuilisque icalten huan
para huelis cuilisque ten niaxca. Porín
sayó ijcón huelis quichtequilisque ten
niaxca. Huan xicmatican que no ijcón
Nejuatzin nicuejuelos in chicahualis
den amocuali Satanás. ³⁰Huan nochi
naquen amo nohuan pohui, yejua
ne nechixnamiquis. Huan nochi ne
tequitini ten amo nechpalehisque
cajocuisque in taquilome, yejuan
nojonques sayó taijitacojtinemisque
san. ³¹Ica ya nojón namechilía
ijcuín: Nochi tajtacolme den taca
oso in ne mohuispololis ten yesqui,
Dios nochi huelis quitaipojpoluis.
Pero naquen quimohuispolos in
Yecticatzin Espíritu, yejua ne amo ica
quipías oc ne tapojpoluilis. ³²Huan
nochi naquen nechmohuispoloa
Nejuatzin ni Yectagatzin, yejua
ne Dios huelis quitaipojpoluis.
Pero naquen quimohuispoloa in
Yecticatzin Espíritu, yejua ne Dios
amo queman quitaipojpoluis, nión
axcan tech nijín tonalme huan nión
no huelis mopalehuis oc campa ne
tatzacuilitoyan de mictan.

**Nican Jesús Temaquixtijque
quinajscamatiltij in tacaquini
de ne cuohuit ten moixmati ica
itaquilohuan**

(Lc. 6.43-45)

³³Huan ijcón in Jesús
quinejnehuililtij se cuohuit queme se
inemilis, huan quinilij in tacaquini
ijcuín:

—Huan como cuali selistoc in cuohuit,
no cuali tzojtopec yesqui itaquilohuan;
huan como amo cuali selistoc in
cuohuit, amo no cualtías itaquilohuan.
Ta, no xojxococ yesqui. Porín in
cuohuit moixmati ica itaquilohuan.

³⁴Huan namejuan nantacajcayahuan
queme in cohuame. ¿Quenín huelis
nantanojnotzasque ica ten cuali, como

namejuan amo nanyolcualime? Huan namejuan nanyolpexontoque ica m'ac tenesi tanemililisme de namejuan san. Huan ica nijín nantajtoaj ten amocuali. ³⁵Huan in tagat den yolchipahuac, yejua ne tajtoa ica ten cuali porín nitajtolis hualehuac tech ne iyolchipahualis. Huan in tagat den amo yolchipahuac, yejua ne tajtoa den pitzotic porín yoltzojcuilic ica tajtacol. ³⁶Huan no namechilía que tech ne tonal cuac namotech huetzis ne hueyi tatzacuilitis, nochí namejuan nanquitemactijihue iixpantzinco Totajtzion Dios nochí ten nantajtojtinenque huan nochí ten nanquichiutinenque nican talticpac. ³⁷Porín ica namotajtoluan ten cuali, Dios namechilis que namejuan nanyolchipauque ya. Huan ica namotajtolis ten pitzotic, Dios namechtelchihuas.

**Nican Jesús Temaquixtijque
quinmachtij in tacaquini den tagayot
ten amo yolcualime huan tenica
fuerza tajtani se nescayot de Dios**

(Mr. 8.12; Lc. 11.29-32)

³⁸Huan in fariseos huan in tanextilianí de tanahuatil de Moisés quilijque Jesús ijcuín:

—Tamachtijque, ticnequij xitechonnexitili se tequit tenica ticmatisque cox melau tihuala de Dios.

³⁹Huan ijcón Jesús tananquilij ijcuín:

—Namejuan nanyolchichicque huan nanyolcucuepme de namotamachilis porín nanquinequij ma nicchihua se tequit tenica huelis nanquitasque cox melau nihuitza de Dios. Huan amo huelis oc ma namechnexitili se nexcuitil porín Dios techmacac ya ne nexcuitil de huejcautanahuatijque in Jonás. ⁴⁰Huan in nexcuitil de Jonás yej nijín: Ijcón queme nijín Jonás yetoya ipoxijtic den ne hueyi pescado huan quichihuac eyi tonal huan eyi yohual,

no ijcón xicmatican que Nejuatzin no ni Yectagatzin niyetotiu ne taltampa eyi tonal huan eyi yohual satepan de ne cuac nechmictisque ya. ⁴¹Huan in tagayot ten calyetoyaj tech ne pueblo Nínive moajocusque cuac ejcos ne tonal de hueyi tatzacuilitis huan namechtelchihuasque porín ne pueblojuani de Nínive moyolnemilijque huan moyolpatacque cuac yajqui in tanahuatijque Jonás quinnojnnotzato ica in Tajtoltzin de Dios. Huan namejuan amo nanmoyolnemilijque de namotajtacoluan huan amo no nanmoyolpatacque, huan nican niyetoc Nitaquehual de Dios huan cachi nihueyi nichiuque huan que ne Jonás. ⁴²Huan in sihuat yejua tayecanque den talme de sur ten monotza Seba, yejua ne moajocus cuac ejcos ne tonal de hueyi tatzacuilitis huan namechtelchihuas. Porín ne sihuat tayecanque huala tech ne talme den sur semi huejca, huan caquico ne tamachilis cualtzin de rey Salomón. Huan namejuan amo nannechcaquilijque notamachtis huan Nejuatzin nican niyetoc huan cachi hueyi notamachtis huan que ne rey Salomón.

**Nican Jesús Temaquixtijque
quinmachtij in tacaquini de ne
amocuali ejecat ten yajqui ocsepa
tech iyolijtic ne tagat campa yetoya**

(Lc. 11.24-26)

⁴³Huan no Jesús quinilij in tacaquini ijcuín:

—Huan cuac se amocuali ejecat quisac ya tech iyolijtic de se tagat, ijcuacón ne ejecat nemi nohuiyan campa tayiucan huan quitemojtinemi can huelis mosehuis itech iyolijtic de ocsé tagat huan yejua amo cajsis.

⁴⁴Huan monemilía in amocuali ejecat huan quijtoa ijcuín: “Cachi cuali nimocuepas ocsepa campa nihualehuac”. Huan cuac mocuepa ya

campa hualquisac, ijcuacón quinquamiqui in tagat yoliuqui huan tachipahuian huan tachijchiutoc, pero amo yolpexontoc ica in Yecticatzin Espíritu.

⁴⁵Huan ijcón in amocuali ejecat yohui huan quinuica ocsé chicome amocuali ejecame ten cachi pitzoticque, huan nochi calaquitij huan mocaltalitij itech ne tagat iyolijtic. Ijcuacón ne tagat mocahuas cachi yolpitzotic huan que ne achtopa catca. Huan no ijcón quipanosque in talticpacuani ten axcan nemij, ten amo yec yolcualime.

**Nican tajtoa de queniu in
nantzin huan niicnihuan de
Jesús Temaquixtijque hualajque
quitemocoy Yejuatzin**

(Mr. 3.31-35; Lc. 8.19-21)

⁴⁶Huan cuac in Jesús quinnonotztotya oc in tagayot ne calijitica, ijcuacón ne momento ejcocque ne calampa inantzin huan iicnihuan de Jesús huan yejuan quinequíaj quinojnotzasque.

⁴⁷Huan senme den ne calan yetoya quinejmachtij Jesús huan quilij ijcuín:

—Xicaqui Tejuatzin, nepa caltenojpa yetocque monantzin huan mocnihuan; yejuan quinequij mitznojnotzasque.

⁴⁸Ijcuacón in Jesús quinquanquilij ne tagat naquen cualcuilij in tajtol, huan Yejuatzin quijtoj ijcuín:

—¿Aconi nonantzin, huan aconi nocnihuan?

⁴⁹Ijcuacón in Jesús quinnonnextilij imomachtijcahuan huan quiniilij in tacaquini ijcuín:

—Xiquinitacan nepa yetocque nomomachtijcahuan, yejuan ya ne nonantzin huan nocnihuan.

⁵⁰Porín namechilfa que nochi naquen quitacamati ijcón queme quimonequiltía Notajtzin Dios ten yetica eluiyactzinco, yejuan ya ne niquinpohuas queme nocniusihuat huan no yejuan ya ne nocniutagat huan no yejuan ya nonantzin.

**Nican tajtoa de queniu Jesús
Temaquixtijque quitalij se nexcuitil
den se tagat den tatepeutinemic ica
trigo**

(Mr. 4.1-9; Lc. 8.4-8)

13 Huan cuac ne tonal Jesús quisac tech ne cali huan yajqui motalito tech se atenteno. ²Huan ompa mosentilijque míac tagayot campá Jesús yetoya, huan Jesús calayic tech se barco de ne apanoloni huan ompa motalij tech in barco. Huan nochi in tagayot mocauque tech ne atenteno. ³Huan Jesús quinnextiliaya ica míac tataman nexcuitilme huan quiniiliaya ijcuín:

—Xiquitacan, se tonal quisac se tagat para quitepehuas in tatoc de trigojtet.

⁴Huan cuac quitepehuac ya, ijcuacón mochihuac que cansaica huetzic in tatoc ojtenteno. Huan hualajque in tototzitzin den patantinemic ejecaixco huan quicuajcoj. ⁵Huan ocsecan cansaica huetzic in tatoc de trigo itech tepetatal campá amo oncaya míac tal. Huan in xinach nimantzin ijsiucaxuac porín amo tilahuac in tal quipiaya.

⁶Huan cuac panquisac ya in tonaltzin, ijcuacón machichinahuic. Huan queme amo quipiaya míac inaluyo, niman huayic. ⁷Huan ocsecan cansaica huetzic in tatoc de trigo huitztzalan; huan in huitzti ixuac itzalan in tatoc huan quipachoj in tatoc. ⁸Huan ocsecan cansaica huetzic in tatoc de trigo itech cualital huan ompa quitemacac míac taquilome. Huan sequin de nijín tatoc de trigo motaquitij ocsé macuilpoal taquilome. Huan sequin tatoc motaquitij ocsé eyipoal taquilome; huan sequin tatoc motaquitij sempoal huan májtacti taquilome.

⁹Huan de ompa Jesús quiniilij ijcuín:

—Naquen quipía ninacas para tacaquis, ma yec tacaqui huan cajsicamati nijín tanextililis.

**Nican Jesús Temaquixtijque
quinmejmelaquilij
imomachtijcahuan queyé tamachtij
ica nexcuitilme san**

(Mr. 4.10-12; Lc. 8.9-10)

¹⁰ Huan ijcón imomachtijcahuan
motoquijque campa Jesús yetoya huan
quitajtoltijque ijcuín:

—¿Queyé tiquinnojnótza in tagayot
ica in nexcuitilme san?

¹¹ Ijcuacán in Jesús quinnanquilij
ijcuín:

—Dios namechmatiltijtoc ya
namejuan nannomomachtijcahuan de
ne ichtacatamachilisme de queniú Dios
quinyolyecana itaneltocacahuan ica
ichicahualis. Pero in ocsequin tagayot
ten amo pohuij ihuan Dios, yejuan
nojonques Dios amo quinajsicamatiltis.

¹² Huan nochi ne naquen quipíaj
tamachilisme de Dios huan
quitequitiltijtoc, yejua ne cachi oc Dios
quinmajxtilis. Pero nochi ne naquen
quipías tzictzin san tamachilisme
de Dios, yejua ne majyá amo teyi
quipiasquía porín amo quitequiltíaj
in tepitzin san ten quipíaj, huan
Dios quintamicuilis ne ten tepitzin
san. ¹³ Ica ya nojón niquinnojnótza
ica nextilme para ma in tagayot ma
quitacan notanextililis. Pero como
amo yec taneltocaj, ijcuacán yejuan
mocahuasque majyá amo queman
quitacque. Huan no namechnojnotztoc
ica nexcuitilme para ma in tagayot ma
quicaquican notajtoluan. Pero como
amo no yec taneltocaj, ijcuacán yejuan
nojonques mocahuasque majyá amo
queman quitacque nión cajsicamatque.

¹⁴ Huan ijcón mochihuac ten
quijcuilojca ya in tanahuatijque Isaías
cuac quijtojca ijcuín:

Huan namejuan cuali
nanquicactocque ya,
pero amo no nanmomacasque
cuenta.

¹⁵ Porín namejuan nanpueblojuani
semi nanyolpícticque
de namotamachilis porín
nanquithuelicaquij.

Huan nanmoixtactocque, para ma
amo xiquitacan namotajtacoluan,
Huan para ma amo xiyectacaquican
ica namonacasuan,
Huan para ma amo
xicyecajsicamatican itech
namoyoljuan.

Huan amo no nanquiyolnemilisque
que ximocuepacan de
namotajtacoluan,
para ma Dios namechypajti den
namotajtacoluan.

¹⁶ Huan Jesús no quinilij
imomachtijcahuan ijcuín:
—Tatiochihualme namoixtololohuan
porín nanquitztocque ya
namotajtacoluan; huan tatiochihualme
namonacasuan porín nanquiyeccaquij
in Tajtoltzin de Dios. ¹⁷ Huan de
yec melau ten namechilía que
miacque tanahuatiani de Dios
huan miacque tagayot yolcualime
quinequíaj quitasque ten namejuan
nanquitztocque axcan, pero yejuan amo
quitacque. Huan míac tanahuatiani
de Dios huan tagayot ten yolcualime
quinequíaj quicaquisque ten namejuan
nanquicaquij axcan huan yejuan amo
quicacque.

**Nican Jesús Temaquixtijque
quinajsicamatiltij in tacaquini in
nexcuitil den tagat tatepehua ica
trigo**

(Mr. 4.13-20; Lc. 8.11-15)

¹⁸ Huan in Jesús quinajsicamatiltij
imomachtijcahuan ijcuín:

—Xicaquican nijin nexcuitil
de se tagat tatepeuque ica
trigojtet. Huan ne trigojtet
quinejnehuilía in Tajtoltzin de Dios
de que Yejuatzin quimonequiltía
quinyolyecanas itaneltocacahuan ica

ihueyichicahualis. ¹⁹Huan cuac se in tacaquini quicaquij ne Tajtoltzin de Dios huan amo cajsicamatij, ijcuacán huitza in amocuali Satanás huan quincuilía in Tajtoltzin de Dios ten toctoc ya tech ninyolijtic. In trigojtet tamoyautoc ya huan huetzi ojtennacastan. ²⁰Huan in trigo tatoc ten huetzi itech tejteixco, yejua ne quinejnehuilía ne tacaquini naquen quicaquij in Tajtoltzin de Dios huan quiseláj ica míac paquilis. ²¹Pero nijín tacaquini amo quipáj se yec tacuautamatilis tech ninyolijtic, queme se naluat para quichicahualtis in tatoc. Ica ya nojón amo huejcahuas nintacuautamatilis. Huan no ijcón nijín tacaquini, cuac nintech huitza in tajyohuilis huan tahuijuicaltilis porín quineltocaj notajtoltzin, yejuan nojónques niman moyolxocoláj huan moyolcuejcuepaj nintaneltoocalis. ²²Huan in trigo tatoc ten huetzic huitztalan, yejua ne quinejnehuilía ne tacaquini ten quicaquij in Tajtoltzin de Dios, pero moyolcuejmoloaj ica tenesi san ten nican talcipcac. Huan no quinyoltilana oc in ricojyot. Huan nochí nijín quitajtamía in Tajtoltzin de Dios. Huan ijcón in ricojyot amo quicahua ma moscaltí in Tajtoltzin de Dios para ma cuica taquilot. ²³Huan in trigo tatoc ten huetzic tech cualital, yejua ne quinejnehuilía in tacaquini ten quicaquij in Tajtoltzin de Dios huan cajsicamatij. Huan ne tacaquini mochihuaj ijcón queme in tatoc ten quitemaca míac taquilot. Sequin tatoc motaquiltis ocsé macuilpoal taquilome; huan sequin motaquiltis ocsé eyipoal taquilome; huan sequin motaquiltis ocsé sempoal huan májtacti taquilome. Huan nochí nijín quinejnehuilía queme in taneltocani ten quitemacasque cuali taquilome.

Nican Jesús Temaquixtíjque tanextiliaya ica nexcuitil de trigo ten quinejnehuilía queme in yec taneltocani. Huan in xihuit ten tajojcocoa, yejua ne quinejnehuilía queme se tagat ten taixcaycayautoc san ica ten amocuali

²⁴Huan ijcón Jesús quinnextilía imomachtijcahuan ica ocsé nexcuitil ijcuín:

—Nícnenehuililtía se tagat ten quitocac in trigo xinach tech nimila queme ichicahualis de Dios cuac Yejuatzin quiyolyecana se iyolijtic ica ne chichahualis de ne eluiyactzinco.

²⁵Huan ne tagat patrón quitocato tech nimila. Huan cuac cochtocque ya in tequitini, ijcuacán huala huan calayic tech nimila se naquen quitahuelita ne patrón. Huan yejua quitocaco se xinach ten tajojcocoa campa ne trigo xinach ten no monejnehuilía queme in trigo. Huan quitocau huan yajqui ocseco.

²⁶Huan cuac in trigo moscaltij ya huan pehuac chichahuaya ya, ijcuacán monextij ya ne amocuali xihuit ten quinejnehuiliaya in trigo. ²⁷Ica ya nojón in tequitini yajque quilitoj in patrón ijcuín: “Xicaqui tejuatzin, ¿xe amo cualtiaya ne trigo xinach ten tejuatzin tictocac tech ne momila? ¿Huan can hualehuac ne xihuit ten quinejnehuilíaya in trigo?” ²⁸Ijcuacán in patrón tananquilij ijcuín: “Achá acsá naquen techtahuelita quichihuac ijcón”. Huan in tequitini ocsepa quitajtolitjque: “¿Xe ticnequis ma tiyacan ticuijuitatij ne xihuit ten quinejnehuilía in trigo?”

²⁹Huan in patrón quinnanquilij ijcuín: “Amo xicuijuitacan ne xihuit ten tajojcocoa. Porín como nancuijuitasque ne xihuit ten amo cualtía, achá no nancuijuitasque in trigo. ³⁰Cachi cuali ma xicahuacan ma moseniscaltican se huan ocsé hasta chichahuayas in trigo. Huan tech ne tonal cuac tachicahuayas

ya ica in trigo, ijcuacón nejuatzin niquintitanis notequiticahuan para ma achto quihuiuitacan in amocuali xihuit ten quinejnehuilijtoc nijín trigo huan ma quinmanojtztizcocan huan ma quichichinocan. Huan nimampan cajocuisque in trigo huan quiyequehuasque itech ne trigojcal”.

Nican Jesús Temaquixtijque qitalij se nexcuitil huan quinejnehuililtij in Tajtoltzin de Dios queme in cuohuit mostazajtet

(Mr. 4.30-32; Lc. 13.18-19)

³¹Huan ijcón in Jesús ocsepa quinmachtiaya in momachtijcahuan ica ocsé nexcuitil huan pehuac quinejnehuililtía se cuouxinach ten monotza mostazajtet ihuan in chicahualis de Dios cuac Dios quiyolyecana se iyolijtic ica ne chicahualis de ne eluiyactzinco. Huan Jesús quinilij in tacaquini ijcuín:

—Huan se tagat quicuic in mostazajtet huan quitocac tech ne imila. ³²Huan ne cuoumostazajtet yec melau yejua in cachi tzictzin de nochi nijín xinachme. Pero cuac moscaltis, ijcuacón mochihuas cachi hueyi huan que ocsequin xochitactzonme. Huan ne mostazajtet moscaltis huan mochihuas queme se hueyi cuohuit. Huan huitze in tototzitzin ten patantinemij ejecaixco huan ompa motapajsoltisque tech imatzacaluan.

Nican Jesús Temaquixtijque qitalij se nexcuitil huan quinejnehuilía in Tajtoltzin queme in tamajmahualis de levadura ten calaquí toyolijtic huan techtaneltoctía

(Lc. 13.20-21)

³³Huan ijcón in Jesús ocsepa quinnextilij in tacaquini ica ocsé nexcuitil:

—Nicnejnehuililtía in tamajmahualis ten quiposonaltía in pantixti queme

cuac Dios quiyolyecana se iyolijtic ica ne chicahualis de ne eluiyactzinco. Huan se sihuat quicuic tamajmahualis huan quimaneloj ne tamajmahualis ihuan eyi tamachiu de harina. Huan ica nojón ne tamajmahualis quiposonaltía nochi in tixti de harina.

Nican tajtoa de queniu Jesús Temaquixtijque quinmejmelaquilij in tacaquini queyé Yejuatzin tamachtij sayó ica nexcuitilme

(Mr. 4.33-34)

³⁴Huan ijcón in Jesús quinnextiliaya in tagayot ica nexcuitilme. Porín como amo quicuía nexcuitilme, ijcón amo quinmachtiaya in tagayot. ³⁵Huan melau ijcón mochihuac ten quijcuiljojca ya in huejcautanahuatijque de Dios cuac quijtojca ijcuín:

Niquinnextiliaya in tagayot ica nexcuitilme.

Huan niquinajsicamatiltía tamachilisme ten ichtacapachiutoyaj desde cuac ne tzinpehuac in talticpac.

Nican Jesús Temaquixtijque quinajsicamatiltij in tacaquini den nexcuitil den trigo huan in xihuit ten quinejnehuilij trigo

³⁶Huan ijcón in Jesús quinilij in tagayot ma yacan, huan Yejuatzin calayic calijtic. Ijcuacón imomachtijcahuan motoquijque campa Jesús yetoya huan quiluijque ijcuín:

—Xitechonajsicamatilti in nexcuitil de ne xihuit ten quinejnehuilía in trigo.

³⁷Huan Jesús quinilij ijcuín:

—Nejuatzin ni Yectagatzin nitatoca ica nochi ten cuali xinach. ³⁸Huan in milajtal tamati queme in talticpac. Huan ne ten cuali xinach quinejnehuilía in taneltocani neques ten tech ninyolijtic Dios quinyolyecana ica ichicahualis. Huan ne amocuali xinach quinejnehuilía in tagayot ten tepiluan den amocuali Satanás.

³⁹ Huan in amocuali Satanás, yejua ne nechtahuelita huan yejua mismo quitocac in amocuali xihuit. Huan cuac mochihuas ne tahuijuitalis de trigo, ijcuacón quinxetía que ejcotoc ya in tamilis den talticpac. Huan in ángeles taquehualme de Dios quinujiuitatinemisque huan quinsesecotalijtinemisque in taca ten taneltocani huan in taca ten amo taneltocani, ijcón queme in trigo huan in xihuit ten amo cualtía. ⁴⁰ Huan ijcón in taquehualme de Dios quihuijuitasque in amocuali xihuit huan quicuisque huan quichichinosque ya, huan no ijcón quintatzacuilitisque ne naquen amo taneltocacque. Nochi nijín mochihuas cuac ejcos ya in tamilis den talticpac. ⁴¹ Ijcuacón Nejuatzin ni Yectagatzin niquinualtitanis notaquehualuan in ángeles para quinololosque itech notequitilisan nochi de naquen sayó quintoqueque nocone huan ma motajtacolmacacan huan para no quinololosque nochi neques ten sayó quichiutinemij ten amo cuali. ⁴² Ijcuacón notaquehualuan quincuisque in tagayot ten amo taneltocacque huan quintamotasque tech ne ticonijtic campa chocatosque huan tannanatzocatosque huan tajyohuijtosque para sen nachipa. ⁴³ Huan naquen yolchিপauque ten pohuij ihuan Dios, yejuan nojonques mopaquiltisque porín tech ninyolijtic Dios quinyolyecantoc ica ihueyichichahualis. Huan yejuan calaquisque campa ne cualtzin tacacahuacatoc ijcón queme in tonaltzin cuac tanextía. Huan nochi naquen quipíaj inacasuan para tacaquis, ma yec tacaquij huan cajsicamatij.

**Nican Jesús Temaquixtijque
quinmachtij in tacaquini den ne
nexcuitil huan quinejnehuililtij
in tanahuatil de Dios queme
tomin den talpachiutoc**

⁴⁴ Huan ijcón in Jesús quinnextiliaya imomachtijcahuan ica nijín nexcuitil ijcuín:

—Nicnejnehuililtía in tomin ten talpachiutoc ne mila queme ichichahualis de Dios cuac Yejuatzin quiyolyecana se iyolijtic ica ne chichahualis de ne eluiyactzinco. Huan se tagat moajxilía ne tomin ocseco huan quiquixtía huan ocsepa seco yejua quitalpachoti. Huan ijcón yejua moyolpaquita porín cajsic ya in tomin. Ijcuacón yohui quinamacati nochi ten niaxca huan quicohuati ne tal campa in tomin talpachiutoc.

**Nican Jesús Temaquixtijque quitalij
se nexcuitil huan quinejnehuililtij in
tanahuatil de Dios queme se tetzin
ten petani cualtzin de semi patío**

⁴⁵ Huan Jesús ocsepa quinilij imomachtijcahuan ijcuín:

—Nicnejnehuililtía se tagat ten taojpacanamacacque queme ichichahualis de Dios cuac Yejuatzin quiyolyecantoc se iyolijtic ica ne chichahualis de ne eluiyactzinco. Huan yejua ne quitemojtinemi in perlas, in tetzitzin ten alaxtic huan den petanij de semi patío. ⁴⁶ Huan cuac cajsic se perla den cachi patío, yejua ne yohui huan quinamacati nochi ten niaxca. Huan de ompa quicohuati ne perla den cachi cualtzin.

**Nican tajtoa de que Jesús
Temaquixtijque quitalij ocse
nexcuitil de se matat**

⁴⁷ Huan Jesús quinilij imomachtijcahuan ocsepa se nexcuitil ijcuín:

—Nicnejnehuililtía ocsepa se tagat queme ichichahualis de Dios cuac Yejuatzin quiyolyecantoc se iyolijtic ica ne in chichahualis de ne eluiyactzinco. Ijcón yejua ne tagat catamota para quinqutzquis de míac tataman pescados. ⁴⁸ Huan cuac míac pescados moolochoa tech in matat, ijcuacón in tamaajisni quiquixtíaj in matat

huan cuicaj ne atenteno. Huan ompa yohue motalitij huan quincejpenaj in pescados huan quinyectaliáj ten cualtía tech in pescado chiquiehualoni. Huan quinatomotaj in pescados ten amo cualtíaj. ⁴⁹Huan no ijcón mochihuas queman tamis ya in talticpac. Huan in taquehualme de Dios in ángeles quisasque para tequitisque huan quinsesecotalisque in tagayot den yolcualime huan ten amo yolcualime. ⁵⁰Huan no in tagayot ten amo yolcualime quinticotamotasque campa chocatosque huan campa tannanatzocatosque campa ne tajyohuilis sen nachipa.

Nican Jesús Temaquixtijque quinmachtij in tacaquini den ricojyot den Tajtoltzin de Dios, ne den yancuic huan de huejcahuac ya

⁵¹Huan ijcón in Jesús quinnexutilij huan quinmatajtoltij imomachtijcahuan ijcuín:

—¿Xe nancajsicamatij ya nochi nijín tanexutilisme?

Huan yejuan tananquilijque:

—Quema, Totecotzin, ticmatij ya.

⁵²Ijcuacán Jesús ocsepa quinyecajsicamatiltij ica nijín nexcuitil ijcuín:

—Sequin tanexutiliani den tanahuatil de Moisés cajsicamatque ya nochi in tamachilisme de que Dios quimonequiltía quiyolyecana se iyolijtic ica ne chichualis den ne eluiyactzinco. Huan Nejuatzin nicnejnehuililtía se de nojonques tanexutiliani queme se tetat de se calyetoní. Huan nijín tetat quipía tech nican se taehualoni campa quiehua niricojyo queme yesquía yejua in Tajtoltzin de Dios. Huan in tetat yohui quinquixtiti mías tamachilisme tech ne itaehualoni ten cualtitzin yancuicque huan no den tamachilisme ten ipa achtopa ya yetoyaj.

Nican tajtoa de que Jesús Temaquixtijque tamachtij tech ne ipueblo Nazaret

(Mr. 6.1-6; Lc. 4.16-30)

⁵³Huan mochihuac que cuac Jesús quintamiajsicamatiltij ya in tacaquini de nijín nexcuitilme, ijcuacán Yejuatzin yajqui ya para ipueblo de Nazaret.

⁵⁴Huan cuac ajsic ichancopa, ijcuacán pehuac quinnexutiliaya in tagayot tech in tiopan de judíos in Tajtoltzin de Dios. Huan in tagayot semi quimoucaitayaj huan quijtoayaj ijcuín:

—¿Can cajsic nijín tagat nochi nijín tamachilis? Porín melau semi quipía tamachilis. ¿Huan quenín hueli quichihua nijín mohuiscatequit de Dios?

⁵⁵Huan no quijtojqe ijcuín:

—¿Xe amo yejua nijín Jesús iconéu den cuouxixique José? Huan in nantzin de Jesús, ¿xe amo yejua in María? Huan nicnihuan, ¿xe amo yejuan in Jacobo huan José huan Simón huan in Judas? ⁵⁶¿Huan cox amo niicnihuan suame ten calyetocque tohuanme? Pues quema.

Huan no quijtojqe in tagayot ijcuín:

—¿Can momachtij nijín tagat nochi nijín tamachilisme ten hueli ya?

⁵⁷Huan yejuan quimachiliayaj que moyolxocoliayaj ica por ne itamachtilis de Yejuatzin. Huan Jesús quininlij ijcuín:

—Huan nochi in tagayot quitasojtaj se tanahuatijque de Dios. Pero nipueblojcahuan huan nichancahuan de ne tanahuatijque de Dios, yejuan nojonques amo quitasojtaj ne tanahuatijque porín ompacayot.

⁵⁸Huan Jesús amo quichihuac mías ne mohuiscatequit de Dios ompa pueblo de Nazaret porín in tagayot amo quineltoacque de nichichualis de Yejuatzin.

Nican tajtoa de que Juan Taahuique momiquilij

(Mr. 6.14-29; Lc. 9.7-9)

14 Huan tech ne tonalme Herodes in tayecanque de Galilea quimatiltijque nichihualis de Jesús. ²Huan in Herodes quinilij itequitacahuan ijcuín:

—Yejua nijín Jesús yesqui Juan Taahuique huan Dios quiajocuic yoltoc intzalan in ánimajme. Ica ya nojón ne Juan quipía nijín chicahualis ten Dios quimactij ya.

³Huan in rey Herodes quitanahuatilijca ma quitzacuacan in Juan huan ma quimaicantzicocan ca cadenas huan ma quicárceltalican. Huan melau in Herodes quichihuac ijcón porín yejua in Herodes cuilijca ya icuñada ten monotza Herodías, yejua isihuau in Felipe, huan in Felipe yejua iicniu in Herodes. ⁴Huan Juan Taahuique quilijca ya in Herodes ijcuín:

—Dios amo quimonequiltía que xicpohua queme mosihuau den ne isihuatzin mocniu.

⁵Ica ya nojón in Herodes quinequía quimictis in Juan. Pero amo quichihuac, porín quinyolmohuiliaya in pueblojuani judíos. Huan yejuan ihuan motasojtayaj in Juan porín yejua tajtoaya itencopa Dios. ⁶Huan se tonal cuac xiumajsic in rey Herodes, ijcuacán ne isuatacpaconeu pehuac mijtotía ninixpan in Herodes huan in ocsequi hueyi chihuanime. Huan itacpaconeu yejua isihuapil de Herodías, huan semi quiyolpactij nijín Herodes de ne imijtotilis. ⁷Ica ya nojón in rey Herodes moyectencahuac ihuan isuatacpaconeu huan quitenehuac ijcuín:

—Yec melau quitztoc Dios, que nimitzmacas nochi ten tinechtajtjanilis.

⁸Huan in isuatacpaconeu ipa achtopa ya moichtacanojnotzac ya ihuan inan.

Ica ya nojón isuatacpaconeu quilij in rey Herodes ijcuín:

—Nechmaca itech se plato itzontecon ne Juan Taahuique.

⁹Huan queman quicayic ya nijín, ijcuacán in rey Herodes pehuac moyolcocoa porín quijtojca ya ijcuín:

—Yec melau quitztoc Dios, nochi ten ticnequis nimitzmacas.

Huan no moyolcocoj in Herodes porín yetoya ompa quicactoyaj nochi in tayecanani de Galilea den tacuajtoyaj ihuan. Ica ya nojón in Herodes tatitanic ma quitequilican itzontecon ne Juan Taahuique huan ma quimacacan isuatacpaconeu.

¹⁰Ijcuacán quinchicaucanahuatij ma quiquechtequican in Juan tech ne cárcel. ¹¹Huan niman cualcuilijque itzontecon de Juan ipan se caxajpas huan quimactijque in isuatacpaconeu. Huan in tacpaconeu quimactilij inanajtzin Herodías. ¹²Huan ijcón imomachtijcahuan de Juan hualajque huan cuiyacque inacayo de Juan huan quitalpachotoj. Huan cachi satepan yajque quimatiltitoj in Jesús quenín in Juan quimictijque ya.

Nican tajtoa de queniu Jesús Temaquixtijque quintamacac macuil mil tagayot

(Mr. 6.30-44; Lc. 9.10-17; Jn. 6.1-14)

¹³Huan cuac Jesús quimatic ya que quimictijque ya in Juan Taahuique, ijcuacán quistehuac Yejuatzin iselti huan calayic itech se barco huan yajqui ocsecan campa tayiucan. Huan cuac in tagayot quimatque ya can yetoya Jesús, ijcuacán yejuan quisque de ninpueblojuan huan yajque metznejenque atenojcopaca quitottilijque in Jesús. ¹⁴Huan cuac quisac Jesús de ne barco, ijcuacán Yejuatzin quinitac huel míac tagayot huan quinyolicnelij huan quinpajtij in cocoyani ten cualcuiliayaj Yejuatzin.

¹⁵Huan queman tapoyautiaya ya, ijcuacón imomachtijcahuan motoquijque campa Yejuatzin huan quilijque ijcuín:

—Amo aquen calyetoc nican huan semi tayohuati ya. Xiquinili nijín tagayot ma yacan ya ne caltempan huan ma quicohuatij ten quicuasque.

¹⁶Ijcuacón Jesús quinnanquilij imomachtijcahuan ijcuín:

—Amo monequía ma xiyacan. Ta, namejuan san huelis xiquinmacacan ten quicuasque in tagayot.

¹⁷Pero imomachtijcahuan tananquilijque ijcuín:

—Amo teyi ticpíaj nican in tacualis. Ta, sayó ticpíaj macuil panes huan no ome pescadojtztzin.

¹⁸Ijcuacón in Jesús ocsepa quinilij ijcuín:

—Xinechinualcuilican ne tacualis nican.

¹⁹Huan de ompa Jesús quinnahuatij in tagayot ma motecacan ixtahuat panían. Huan niman in Jesús quicuic in macuil pantztzin huan in ome pescadojtztzin. Huan mochihuac que cuac Jesús maactoya ya in tacualis, ijcuacón ajcotachíac huan quitatautij Dios ma quitióchihua in tacualis. Huan de ompa Jesús quixejxeloj in panes huan quinmacac imomachtijcahuan huan ijcón yejuan quinmajmacatoj in panes in tagayot. ²⁰Huan tacuajque nochi in tagayot huan ixuicque. Huan imomachtijcahuan quinsentilijque nochi pan ten tatetejtec ten mocahuac huan quipexontijque majtactionome chiquihuit oc. ²¹Huan ne naquen tacuajque catca queme macuil mil tagayot huan amo tapoucayome in sihuame nión in coneme.

**Nican tajtoa de queniu Jesús
Temaquixtijque nejnemic aixco**

(Mr. 6.45-52; Jn. 6.16-21)

²²Huan de ompa Jesús quinnahuatij imomachtijcahuan ma calaquican tech

in barco ma yajtocan ne sentapalpa de ne ocseco atenteno, huan ma quiachtohuican Jesús mientras Yejuatzin quinnajnahuatia ya in tagayot para ma yacan ninchan. ²³Huan cachi satepan cuac quinnajnahuatij ya in tagayot ma yacan, ijcuacón Jesús tejcoc campa se tal lomojtzin huan ompa iselti motatatautilito ihuan Dios. Huan ne cuac tapoyahuic ya, ijcuacón Jesús ompa yetoya ya iselti oc. ²⁴Huan queman yaya ya in barco ne tatajco ya den mar den quihuicaya imomachtijcahuan, ijcuacón pehuac mocuecuenta in mar huan quimajmagaya in barco porín ne ejecat quitzatzacuiliaya. ²⁵Huan cuac tanestihualaya ya, ijcuacón motoquijtihualaya Jesús campa imomachtijcahuan huan ijcón in Jesús nejnentihualaya aixco. ²⁶Huan cuac imomachtijcahuan quitacque Jesús nejnentihualaya aixco, ijcuacón peuque moyolmoutiayaj huan moucatzajztíaj huan quijtojqque ijcuín:

—¿Toni nojón? ¡Yesqui se ánima!

²⁷Ijcuacón niman in Jesús quinnotzac huan quintzajtzilij huan quinilij ijcuín: —Ximoyolchicahuacan porín Nejuatzin ya ni Jesús, amo ximomoutican.

²⁸Huan ijcón in Pedro quilij ijcuín:

—Totecotzin, como melau Tejuatzin, xicchihua que ma no nihueli ninejnemi aixco para nimitzajtsitiu campa tionualajtoc.

²⁹Huan Jesús quilij:

—Xihuiqui pos.

Huan ijcón in Pedro pantemoc den barco huan pehuac nejnemi aixco para cajsitiu campa Jesús hualaya. ³⁰Huan cuac moyolnemilij in Pedro quenín chicaucaejeccaya, ijcuacón pehuac momoutía huan pehuac pancalactiu ya tech in at. Huan de ompa quitzajtzilij Jesús ijcuín:

—Notecotzin, xinechpalehui huan xinechmaquixti.

³¹ Ijcuacón nimantzin momatilanac Jesús huan quimaquitzi in Pedro huan quilij ijcuín:

—Tejua tagatzin, semi tepitzin san ticpía motacuaumatilis. ¿Queyé amo tiyetauamatij nohuan?

³² Huan queman nochi in omen tejcoque ya huan calacque ya tech in in barco, ijcuacón motatamatilij ica in ejecat. ³³ Huan ijcón nochi ten yayaj tech in barco motancuaquetzacoj iixpan Jesús huan quimohuistilijque ijcuín:

—Yec melau Tejuatzin tion Teconetzin de Dios.

**Nican tajtoa de que Jesús
Temaquixtijque quinpajtij naquen
mococoayaj tech ne pueblo
Genesaretcopaca**

(Mr. 6.53-56)

³⁴ Huan cuac quipanhuijque ya in mar, ijcuacón Jesús huan imomachtijcahuan ajsitoj tech in tal ten pohuía Genesaret. ³⁵ Huan cuac quixmatque ya in tagayot que Jesús yetoya ompa ya, ijcuacón quitemaltijque nohuiyampa nochi in tagayot ten quiyehualojtoyaj Genesaret. Huan cualcuiliayaj míc cocoyani campa Yejuatzin ten mococoayaj ica míc tataman cocolis. ³⁶ Huan quitatauiayaj Jesús ma quincagua ma quimatocacan itilmajteno san. Huan nochin naquen quimatocacque Jesús, nochi pajtijque ya.

**Nican Jesús Temaquixtijque
quinmachtij in tacaquini de ne
tamachilis ten quimajmahua ica
tajtacol in tagat**

(Mr. 7.1-23)

15 Huan hualajque de Jerusalén huan motoquijque campa yetoya Jesús sequin fariseos huan sequi tanextiliani den tanahuatil de Moisés huan quitajtoltijque Jesús ijcuín:

² —¿Queyé momomachtijcahuan amo quitacamati in tanahuatilme ten quitenextilíaj in huehuentzitzin den pueblojuani judíos? Porín momomachtijcahuan amo quitacamati in tanahuatilis de que ma achtopa momajtequican huan tacuasque.

³ Huan Jesús quintajtoltij ne tayecanani ijcuín:

—¿Queyé namejuan amo no nanquitacamati in tanahuatilme de Dios? Ta, sayó nanquitacamati in tanahuatil den huehuentzitzin den pueblojuani judíos. ⁴ Huan in Tajtoltzin de Dios technahuatíla ijcuín: “Xicmohuistili motajtzin huan monantzín; porín naquen quitelchihuas itajtzin oso inantzín, yejua nojón monequi ma quimictican”. ⁵ Pero namejuan nantanahuatíaj que huelis se tagat ma quilij nitajtzin oso ninantzín ijcuín: “Amo nihuelis namechpalehuis porín nochi ten nicpía nicaxcatilij ya Dios”. ⁶ Huan nochi naquen nesi tagat ten ijcón quichihuas, yejua nojón amo monequi oc quinpalehuis nitajtzin huan ninantzín. Huan ijcón namejuan nanquisecocautocque ya in tanahuatilme de Dios huan nanquitacamatinemij sayó ten namechnextilíaj in huehuentzizín den pueblojuani judíos. ⁷ Namejuan nanixquequeptocque san de namotamachilis, ijcón queme Isaías ne huejcautanahuatijque de Dios quijcuiloj de namejuan cuac quijtojca itencopa Totajtzin Dios ijcuín:

⁸ Nochi nijín tagayot judíos nechmohuistilíaj sayó ica nintenxipal san; huan ninyolojuan huejca yetoc de Nejuatzin.

⁹ Huan nenca san nechmohuistilíaj, porín yejuan tenextilíaj in tamachtilis den taca san huan quipohuaj nijín tamachtilis queme yesquía in Tajtoltzin de Dios.

¹⁰Huan ijcón in Jesús quinnotzac in tagayot huan quinilij ijcuín:

—Xicaquican huan xicajsicamatican ten namechilía: ¹¹Huan nochi ten quicuas in tagat ica iten, yejua nojón amo huelis quimajmahuas niyolo ica tajtacol. Ta, yejua itanemililis ten quisa iyolijtic in tagat, yejua ne quimajmahua ica tajtacol.

¹²Ijcuacón imomachtijcahuan motoquijque campa yetoya Jesús huan quilijque ijcuín:

—¿Xe amo ticmati que ne fariseos quicalancacacque ten ticonijtoj?

¹³Huan Jesús quinilij ijcuín:

—Nochi tatocme ten amo itatoc Notajtzin den ne eluiyactzinco, yejua ne Notajtzin cuijuitas nochi ica inaluyo.

¹⁴Huan ijcón in Jesús ocsepa quinilij ijcuín:

—Xiquincahuacan nojón fariseos, porín yejuan ixpojpayome. Huan no quinequij quiyecanasque in ocsequin ixpojpayome. Huan como se ixpojpayot quinequi quiyecanas ocsé ixpojpayot, ijcuacón in omen sen huetzitiuhue tech in talcomit.

¹⁵Ijcuacón in Pedro quilij Jesús ijcuín:

—Xitechyecajsicamatilti nijín nexcuitil.

¹⁶Huan Jesús tananquilij ijcuín:

—¿Xe namejuan amo no nancajsicamatij nijín nexcuitil? ¹⁷¿Xe namejuan amo no nancajsicamatque que nochi in tacualis ten se quicua, yejua ne pantemoa san tech se ipox san huan de ompa quisa de tonacayo?

¹⁸Pero nochi in tajtolis ten quisa tech se iten, yejua ne hualehua tech se iyolo. Huan yejua nojón quimajmahua in tagat ica tajtacol. ¹⁹Porín itech iyolo in tagat hualeutoc ne pitzotic tanemililis, ne temictilis, ne tesuacuulilis, oso ne tagacuulilis, ne tasuapapatalis oso ne tagapapatalis, ne tachtequilis, oso ne

tacajcayahualis huan ne tahujiuicaltilis.

²⁰Huan nochi nijín tanemililis quimajmahuaj ica tajtacol in tagat. Huan in tagat amo momajmahuas ica tajtacol cuac quicuas tensá tacualis, masqui amo momajtequía.

**Nican tajtoa de queniu Jesús
Temaquixtijque quinojnotzac se
sihuat analtecocayot huan yejua
taneltoca itech Jesús Temaquixtijque**

(Mr. 7.24-30)

²¹Huan de ompa quisac Jesús huan yajqui tech ne lugar campa pueblojme den monotza Tiro huan Sidón. ²²Huan ompa se sihuatzin calyetoya ne Cananea sentapal cayot de Tiro huan Sidón. Huan ne sihuatzin tzajtzitihualaya campa Jesús huan quiliaya ijcuín:

—Totecotzin, Tejuatzin tion Teconetzin de ne huejcau rey David. Nimitzilía, xinechonyolicneli porín nochpoch quipía iyolijtic se amocuali ejecat huan tel senca ya tajyohuijtoc axcan.

²³Pero Jesús amo teyica quinanquilij. Ijcuacón imomachtijcahuan motoquijque huan quitatatautilijque Jesús ijcuín:

—Xicnahuati ma yohui ya nijín sihuat porín ijcón tzajtzitihuitz huan techualtoctilía.

²⁴Huan Jesús quinnanquilij ijcuín:

—Notajtzin Dios nechualtitanic sayó para ma niquinpalehui huan ma niquinmaquixti in pueblojuan queme ichcame ten poliutocque, yejuan ten pohui ihuan in pueblojuani de Israel.

²⁵Huan motoquij in sihuat huan quilij ijcuín:

—Totecotzin, xinechonpalehui.

²⁶Huan Jesús quinanquilij ijcuín:

—Amo cualtía ma niquincuili in tacualis den coneme judíos huan ma niquinmaca in itzcuintzitzin porín xicmati que namejuan amo nanjudíos.

²⁷ Huan tananquilij in sihuat ijcuín:

—Quema catzin, masqui tejuan queme yesquía itzcuintzitzin, pero timotaololohuiliáj mesajtampa huan ticuaj nochi den tepehui, yejua ne in Tajtoltzin de Dios den quitencajcahuaj in patrones judíos.

²⁸ Huan ijcón in Jesús tananquilij ijcuín:

—Tejua sihuat, semi hueyi motacuautamatilis; huan axcan ma mochihua ijcón queme tejua ticnequi.

Huan ijcón ne isihuapil nimantzin pajtic.

**Nican tajtoa de queniu
Jesús Temaquixtisque
quinpajtij mías cocoyani**

²⁹ Huan ijcón in Jesús quisac de ne lugar de Tiro huan Sidón huan yajqui atenteno san den hueyíat de Galilea. Huan niman tejco itech se hueyi tal lomojtzin huan ompa motocotzoj. ³⁰ Huan hualajque huel mías tagayot campa Jesús yetoya huan cualcuiliayaj mías tataman cocoayani ten amo huel moquetzaj ya, huan ten ixpojyome, huan ten amo huel tajtoayaj, huan ten macotoltisque, huan mías ocsequin ten mococoayaj. Huan quintalicoj iixpan Jesús huan Yejuatzin quinpajtij. ³¹ Ijcuacán in tagayot semi quitelmoucaitacque porín yejuan quitacque que in nontzitzin tajtoayaj ya, huan in macotoltisque motayaj que pajtijque ya, huan in coxojme huelfaj nejnemij, huan in ixpojyome huelfaj tachíaj ya. Ijcuacán nochi in tagayot peuque quimohuistilíaj Totajtzin Dios in Tayecanque de Israel.

**Nican tajtoa de que Jesús
Temaquixtisque quintamacac nahui
mil tagayot
(Mr. 8.1-10)**

³² Huan Jesús quinnotzac imomachtijcahuan huan quiniij ijcuín:

—Niquinyolicnelía de nijín tagayot porín quichihuac ya eyi tonal nohuan yetocque, huan amo quipíaj toni cuasque. Huan amo nicnequi niquintitanis ninchan ma mayantiyacan. Porín como ijcón niquintitani, ijcuacán mayancacuetahuitihue tech in ojti.

³³ Ijcuacán imomachtijcahuan quiluijque Jesús ijcuín:

—¿Quenín huelis ticajsisque tel mías tacualis para tiquintamacasque tel mías tagayot? Porín nican semi tayiucan huan amo aca calyetoc.

³⁴ Pero Jesús quintajtoltij ijcuín:

—¿Canachi panes nanquipíaj?

Huan yejuan quinanquilijque:

—Ticpíaj chicome panes san, huan no sequin pescadojncatzitzin.

³⁵ Huan de ompa Jesús quinnajnahuatij in tagayot ma motalican talpan. ³⁶ Huan ijcón in Jesús quicuic nojón panes ihuan in pescadojncat huan de ompa quitasojcamachilij Totajtzin Dios. Huan quincocotonac in panes huan quinmajmacac imomachtijcahuan. Huan yejuan quinxexelohuilijque in tagayot. ³⁷ Huan ijcón nochi in tagayot tacuajque huan ixuicque. Huan niman imomachtijcahuan de Jesús quiololojque nochi in pan cojcotol ten mocahuac huan quinpexontijque chicome chiquihuime oc. ³⁸ Huan naquen tacuajque catca queme nahui mil tagayot huan amo quinpouque in sihuame nión in coneme. ³⁹ Huan de ompa Jesús quiniij in tagayot ma yacan ninchan huan no niman Yejuatzin calaquic tech in barco huan ajsito campa pueblojcopaca de Magdala.

**Nican in fariseos quitahtanilíaj
ya Jesús ma quinnextili se
mohuiscanexcuil de Dios
(Mr. 8.11-13; Lc. 12.54-56)**

16 Huan ijcón in fariseos huan in saduceos hualajque campa

Jesús yetoya huan peuque ihuan motajtoltehuíaj porín yejuan quinequíaj quitepotamisque Jesús tech tajtacol. Huan quitajtaniliayaj Jesús ma quinnexutiliani se mohuiscañexcutil den ne eluiyactzinco. ²Huan Jesús quinnanquilij ijcuín:

—Huan cuac ne tayohuatía, ijcuacán namejuan nanquijtoaj que cualtzin tonas mosta porín nanquijtoaj cualtzin tachichileutoc nohuayan desde ne ipolihuiyampa in tonal. ³Huan cuac ne cualcampan, ijcuacán namejuan no nanquijtoaj que axcan amo tonas porín tamixtentoc. Huan nanixquequepme san de namotamachilis porín cuali nanquajscamatiltíaj quenín in tonal yesqui mosta, cox tonas oso amo, pero amo hueli nanquajscamatiltíaj in nexcutilme de toni mochihuas axcan. ⁴Nijín tagayot amo yolcualime huan nión no tacuautamatij ihuan Dios, huan tajtanij se nexcutil de que cox melau Nejuatzin ni Teconetzin de Dios. Pero amo huelis se quinnexutilis cachi oc ocséquin mohuiscañexcutilme. Ta, sayó ne nexcutil ten namechñexutilijca ya ne huejcautanahuatijque Jonás. In nexcutil de Jonás yejua nijín: Ijcón queme Jonás mocahuato ipoxijtíc ne hueyi pescado huan ipan eyi tonal panquisac yoltoc, no ijcón Nejuatzin nimocahuatíu ne taltampa huan ipan eyi tonal nipanquisas niyoltoc.

Huan de ompa Jesús quinauteu in fariseos huan yajqui ocseco.

**Nican Jesús Temaquixtijque
quinmachtij in tacuquini de ne
tamajmahualis de tajtacol ten cuica
in tamachtilis den fariseos**

(Mr. 8.14-21)

⁵Huan imomachtijcahuan ajscique sentapalpa den hueyíat mar. Pero mochihuac que yejuan quelcauque de cuicasque in tacualis de yejuan. ⁶Ica ya

nojón Jesús quinilij imomachtijcahuan ijcuín:

—Xiquitacan huan ximoyecpiacan de ne tamajmahualis de tamachilis ten quipíaj ne fariseos huan ne saduceos.

⁷Ijcuacán imomachtijcahuan monojnotzayaj se huan ocsé ijcuín:

—¿Queyé ijcón techilfa Jesús? Achá porín amo ticualicque ten ticuasque.

⁸Pero Jesús niman quinyoloximatic ne imomachtijcahuan huan quinilij ijcuín:

—¿Queyé nanquijtoaj que amo nanquipíaj ten nancuasque? Mota que namejuan amo nanyectacuautamatij nohuan. ⁹Huan namejuan amo nancajscamatque huan nión no nanquelnamiquij de ne macuil panes ten nicxejxeloj ihuan ne macuil mil tagayot. Huan amo no nanquelnamiquij canachi chiquihuime de pan den mocahuac de que nanquiolojojque.

¹⁰Huan amo no nanquelnamiquij de ne chicome pantzitzin ten niquinxejxelojuj de ne nahui mil tagayot. Huan amo no nanquelnamiquij canachi chiquihuime de pan ten mocahuac de que nanquiolojojque itech ne tonal. ¹¹¿Queyé amo nancajscamatque de nijín tamachilis tenica namechñojnotztoc de ne tamajmahualis ten quipía in pan den tacualis? Ta, nicnequi que namejuan xicyecajscamatican ne tamajmahualis de tajtacol ten quipía in tanexutilis ne fariseos huan ne saduceos.

¹²Huan ijcón imomachtijcahuan cajsicamatque ya que Jesús amo quinilíaj ya que ma moyecpiani den ne tacualis den tamajmahualis de pan san. Ta, Jesús quinilíaj ya que ma moyecpiacan de ne nintamachtilis den fariseos huan in saduceos. Porín nintamachtilis teyolmajmahua ica tajtacol ijcón queme in tamajmahualis den quiposonaltía in pan.

**Nican tajtoa de queniu Pedro
quiyequilij que Jesús yejua in Cristo
Temaquixtjique**

(Mr. 8.27-30; Lc. 9.18-21)

¹³Huan ijcón in Jesús quisque ihuan imomachtijcahuan huan ajsicque tech in pueblojme ten pohuáj Cesarea de Filipo. Huan Jesús quintajtoltij imomachtijcahuan ijcuín:

—¿Quenín quijtoaj in tagayot? ¿Aconí yesqui Nejuatzin ni Yectagatzin?

¹⁴Huan yejuan tananquilijque ijcuín:
—Sequin tagayot quijtoayaj que Tejuatzin ti Juan Taahuijque. Huan ocsequin quijtoayaj que Tejuatzin ti Elías ne huejcautanahuatijque de Dios. Pero cachi ocsequin quinemiliayaj que achá Tejuatzin ti Jeremías, oso achá Tejuatzin se den ocsequin tanahuatiani de Dios den nemicoj ya.

¹⁵Huan ijcón in Jesús ocsepa quintajtoltij ijcuín:

—Huan namejuan, ¿toni nanquixejecoaj que aconí Nejuatzin?

¹⁶Ijcuacán Simón Pedro tananquilij ijcuín:

—Tejuatzin tion Cristo Temaquixtjicatzin, ti Yecteconetzin de Dios den yoltica.

¹⁷Huan Jesús quinanquilij:
—Titatiochihual, tejua Simón teconeu de Jonás. Porín amo se tagat huelic mitzajsicamatiltisquía de nijín ten melau. Ta, sayó Notajtzin ten yetica nepa eluiyactzinco, Yejuatzin mitzajsicamatiltij ya. ¹⁸Huan nimitzyequilía que tejua ti Pedro huan motocay quijtosnequi hueyi tet, huan mohueyitacuaumatilis tamati queme in hueyi teolol. Huan ipan nijín tacuaumatilis den tamati queme se teolol, itech nijín nictzinpehualtis notequiu. Huan niquinmaquixtis huan niqinmiactiltis notaneltocacahuan. Huan ijcón amo no huelis ne chicahualis den miquilis quinxixicos

notaneltocacahuan porín quipíasque ne yec tacuaumatilis nohuantzinco.

¹⁹Huan, tejua Simón, no nimitzmacas in chicahualis queme yesquía llaves para tiquintatapohuilis in tagayot ma calaquican campa Dios momasoutoc ica ihueyichicahualis. Huan ijcón nochi ten tejua titatacahualtis nican talticpac, no ijcón motatacahualtis ne eluiyactzinco. Huan nochi ten tejua ticahuas ma mochihua nican talticpac, no ijcón ma mochihua ne eluiyactzinco.

²⁰Huan ijcón in Jesús quinnajnahuatij imomachtijcahuan ma amo aquen quilican que cox yejua ya in Cristo in Temaquixtjique.

**Nican tajtoa de que Jesús
Temaquixtjique quitetapohuij
imomachtijcahuan que ejcotoc ya
imiquilis**

(Mr. 8.31—9.1; Lc. 9.22-27)

²¹Huan desde ne tonal ya pehuac Jesús quinyectapohuía ya imomachtijcahuan ijcuín:

—Semi monequía niyás tech ne pueblo de Jerusalén. Huan ompa nechtajyohuiltisque in huehuentzitzin den pueblojuani judíos huan in tayecanani tiopixcame huan in tanextiliani den tanahuatil de Moisés.

Huan no Jesús quiniij ijcuín:

—Ompa nechmictisque, pero ipan eyi tonal nipanquisas niyoltoc itzalan in ánimajme.

²²Ijcuacán in Pedro cuiyac Jesús seco huan ompa pehuac quixajua huan quiliaya ijcuín:

—Ma amo Dios quimonequilti ma pano mopan nijín ten tiquijtoa.

²³Ijcuacán Jesús mocuepac campa yetoyaj imomachtijcahuan huan quilij in Pedro ijcuín:

—Ximijcuani de nican noixpan, Pedro, porín majyá titanemilijtoc queme Satanás in amocuali, huan tinechtajtzacuila san. Porín tejua amo

titanemilía queme Dios quimonequiltía. Ta, sayó titanemilía queme in tagayot.

²⁴Huan ijcón in Jesús quinilij imomachtijcahuan ijcuín:

—Tacán acsá quinequi nechtoctilijtiyás, ijcuacán ma quicautehua ne tanejnequilis de yejua san, huan ma quixicos in cruztzin ten cualcui tajyohuilis huan ijcón ma nechtaamatíu huan nechtoctilijtiú. ²⁵Huan nochi neques ten quinequij moyecpialtisque huan quimaquixtisque yejuan san mismo ninnemilis, yejuan nojónques nochi quipolosque ninnemilis. Huan nochi neques ten quipolosque ninnemilis por nejua huan por in cuali Tajtoltzin de ne temaquixtilis, yejuan nojonques cajsisque ninnemilis huan no ne nemaquixtilis. ²⁶¿Pero toni quihueyipías in tagat como moaxcatilis nochi in senmanahuac huan niman quipolos inemilis? ¿Pero canachi taxtahuil huelis quitemacas oc in tagat ica por niyolo cuac yejua cajsicamatís que quipoloj ya ninemilis? ²⁷Huan Nejuatzin ni Yectagatzin ni hualas ica in huelilis de Notajtzin ihuan in ángeles ne tequitini de Notajtzin. Ijcuacán Notajtzin Dios quintaxtahuis cada se tagat ijcón queme cada se tagat motequitiltij. ²⁸Huan no de yec melau ten namechilía que senme de namejuan de nican nanyetocque, amo nanmiquisque como amo achtopa nanquitasque que Nejuatzin ni hualas ya ni Yectagatzin, huan ni quinyecanas notaneltocacahuan ica nochi ichicahualis huan ihuelilis de Totajtzin Dios.

**Nican tajtoa de que Jesús
Temaquixtijque nocta mopapatac
quenín tamatic inixpan
imomachtijcahuan**

(Mr. 9.2-13; Lc. 9.28-36)

17 Huan satepan de chicuasen tonal Jesús quinuuyac Pedro

huan in Jacobo huan iicniu Juan huan yajque tejcotoj ninseltij seco tech se tepet campa huejcapan. ²Huan ompa ninixpan pehuac Jesús mopapataya quenín tamatic. Huan iixco nesía cualtzin petani ijcón queme in tonaltzin. Huan ne nitilmajtzin pehuac pepetacaya porín yec istac queme in tanex. ³Huan monextijque Elías ihuan in Moisés, yejuan nojonques huejcautanahuatiani de Dios, huan yejuan peuque monoynotzayaj ihuan in Jesús. ⁴Ijcuacán in Pedro quilij in Jesús ijcuín:

—Totecotzin, semi cualtzin para tejuan que nican tiyetocque. Tajcón ticonmonequiltisquía ma ticchijchihuacan eyi xajcaltzitzin, se para Tejuatzin, in ocsé para in Moisés huan in ocsé para Elías.

⁵Pero cuac in Pedro quinoynotztoya oc, ijcuacán quinquemiloco se mixti de semi cualtzin pepetaca. Huan mixtzalan mocaquic se tajtolis huan quijtoaya ijcuín:

—Yejuatzin nijín Notasojtzin Conetzin. Ica por Yejuatzin semi niyolpactoc; xicaquilian ca cuali Yejuatzin.

⁶Huan cuac quicacque ya nijín imomachtijcahuan, ijcuacán motapachojque hasta moixtalitoj tech in tal porín semi moyolmoutiyaj.

⁷Huan ijcón in Jesús motoquij campa imomachtijcahuan huan quinolinij huan quinilij ijcuín:

—Ximoquetzacan huan amo ximoyolmoutican.

⁸Huan cuac yejuan moixajacque huan ixnenenque, ijcuacán yejuan amo aquen quitacque oc. Ta, sayó in Jesús. ⁹Huan cuac temotiyayaj ya tech ne tepet, ijcuacán Jesús quinnajnahuatij ijcuín:

—Axcan amo aquen xictapohuican de nanquitacque. Ta, xicchiacan hasta ne tonal cuac Nejuatzin ni Yectagatzin nipanquisas ya niyoltoc itzalan in ánimajme.

¹⁰ Huan ijcón in Jesús imomachtijcahuan quitajtoltijque ijcuín:

—Nojón tanextiliani den tanahuatil de Moisés, ¿queyé yejuan quiytoaj que Elías quipía que hualas achtopa ya que hualas in Cristo Temaquixtijque?

¹¹ Pero Jesús quinnanquilij ijcuín:

—Yec melau, achtopa ya que Nejuatzin nihualasquía, hualajca ya ne Elías huan tayejectalij ya nochi para Nejuatzin. ¹² Huan Nejuatzin namechyequilía que hualajca ya ne Elías, huan in tanextiliani amo quixmatque. Ta, quichihuilijque queme yejuan in tayanani tanextiliani quinecque huan cuelitacque. Huan ijcón no nicpanos Nejuatzin ni Yectagatzin; nechchiuilisque queme yejuan cuelitasque.

¹³ Huan ijcón in imomachtijcahuan den Jesús quiyecajsicamatiltiyaj ya que Jesús quinojnotzaya de ne nemilis de Juan Taahuijque. Huan ne Juan yejua ya in Elías ten quipía de que hualasquía.

**Nican tajtoa de queniu Jesús
Temaquixtijque quipajtij se telpoch
ten quiapiaya iyolijtic se amocuali
ejecat**

(Mr. 9.14-29; Lc. 9.37-43)

¹⁴ Huan cuac Jesús huan imomachtijcahuan ajsicque campa yetoyaj míac tagayot, ijcuacán motoquij campa Jesús yetoya se tagat huan motancuaquetzac iixpan Jesús huan quilij ijcuín:

¹⁵ —Totecotzin, xiconyolicneli nooquichpil porín quimaca se cocolis de nijín yolpolihuilis huan semi tel hueyi tajyohuía. Porín miacpa ya huetzi huan moticotálía huan no miacpa ya moapisahuía ya. ¹⁶ Huan niquinualcuilijca ya momomachtijcahuan huan amo huelic quipajtijque.

¹⁷ Ijcuacán in Jesús quinanquilij ijcuín:

—Namejuan sayó nantacaquini, semi amo nanyectaneltocaj huan amo nanyolcualime. ¿Canachi tonalme quipía de que niyetos oc namohuan? ¿Canachi tonalme oc huelis nitaxicos como amo nanyectacautamatij nohuan? Xinechonualcuilican nican in oquichpil ten mococoa.

¹⁸ Huan ijcón in Jesús quichicaucanahuatij in amocuali ejecat. Ijcuacán niman calanquisac in amocuali ejecat itech ne oquichpil den yetoya iyolijtic. Huan ijcón niman moyoltalij ne oquichpil. ¹⁹ Huan ijcón niman motoquijque imomachtijcahuan campa Jesús huan quinojnotzque ocsecan huan quitajtoltijque ijcuín:

—¿Queyé amo tihuelque ticalanquixtilijque ne telpoch in amocuali ejecat?

²⁰ Huan Jesús quinilij ijcuín:

—Amo nanhuelque porín nanquipíaj semi tepitzin san namotacautamatilis. Huan de yec melau ten namechilía que como nanquipiasquíaj namotacautamatilis ma quinehuiliani tzictzin queme se mostazajtet, ijcón cuali huelis nanquilisque nijín tepelomo de que ma ximijcuani de nican huan xiyó ocsecan. Huan ijcón in tepelomo mijcuanisquía. Huan para namejuan amo teyi ongac ohui como melau nanyectacautamatij nohuan. ²¹ Huan nijín taman den amocuali ejecat ohui para se quicalanquixtis. Pero huelis se quicalanquixtis sayó ica ne tatatautillis ihuan Dios huan ica ne sahuialis.

**Nican Jesús Temaquixtijque
quinnejmachtij imomachtijcahuan
ica ojpa que ejcotoc ya imiquilis**

(Mr. 9.30-32; Lc. 9.43-45)

²² Huan cuac Jesús sen nemía ihuan imomachtijcahuan tech ne pueblojcopaca de Galilea, ijcuacán Jesús quinilij ijcuín:

—Nejuatzin ya ni Yectagatzin huan nechtemactisque imaco in tagayot, ²³huan nechmictisque, huan ipan eyi tonal ocsepa nipanquisas niyoltoc itzalan in ánimajme.

Huan cuac imomachtijcahuan quicacque nochi nijín, ijcuacán semi motayocoltijque.

**Nican tajtoa de queniu Jesús
Temaquixtijque quixtahuac
in impuesto tomin nechicolis
para in tiopan de judíos**

²⁴Huan Jesús ihuan

imomachtijcahuan ajsicque tech ne pueblo Capernaum, huan in tanechicoani para in tiopan de judíos motoquijque campa in Pedro huan quilijque ijcuín:

—¿Xe amo taxtahuas namotamachtijcau de ne taxtahuil para in tiopan de judíos?

²⁵Ijcuacán in Pedro tananquilij ijcuín:

—Quema.

Huan cuac in Pedro calaquito calijtic, ijcuacán in Jesús achto quinojnotzac huan quilij ijcuín:

—¿Toni tiquixejecoa, Simón? In huejueyi chihuanime de nican talticpac, ¿cox tatopaluijtinence den nichancahuan oso den ninpueblojcahuan san?

²⁶Ijcuacán in Pedro tananquilij ijcuín:

—Ne ten in pueblojcahuan quintopaluitinemij.

Huan Jesús quilij ijcuín:

—Inchancahuan amo monequi ma motaxtahuilcan. ²⁷Pero para ma amo tiquinyolcuejmolocan in tayecanani, xiyó tech ne hueyát den mar huan xicatamota ne teposmaxal tenica quinqutzquíaj in pescados. Huan ne ten achtopa pescado tiquitzquis, ompa ticaxilis iteno ne pescado se tomin ten cualtías ica titaxtahuasque in taxtahuil

ten monequi para Nejuatzin huan para tejua. Huan cuac ticajsis ya, ijcuacán niman xiquinuiquili in tomin huan xiquintaxtahuiliti.

**Nican tajtoa de queniu Jesús
Temaquixtijque quinmachtij in
tacaquini de aconi yesqui in cachi
hueyi tayecanque**

(Mr. 9.33-37; Lc. 9.46-48)

18 Huan tech ne tonalme imomachtijcahuan motoquijque campa Jesús yetoya huan quitajtoltijque ijcuín:

—¿Aconi in cachi hueyi chiuque como Dios techyolyecana toyolijtic ica ihueyichicahualis?

²Ijcuacán Jesús quinoztac se conetzin huan quitelij inixpan imomachtijcahuan.

³Huan Jesús quinilij ijcuín:

—De yec melau ten namechilía de que namejuan como amo nanmocuepaj queme senme de nijín coneme, ijcuacán amo huelis nancalaquisque campa Dios quinyolyecana itaneltocacahuan ica ihueyichicahualis. Ta, monequi ximochihuacan nanyectacuaumatatcataca queme nijín conet ten tacuaumatami sayó ihuan nitajtzin. ⁴Huan nochi naquen moicnotalis huan mosejsentalis san ijcón queme nijín conet ten nonahuactzinco tacuaumatami, ijcuacán yejua ne yesqui in cachi hueyi campa Dios momasoutoc ica ihueyichicahualis. ⁵Huan como namejuan nancajsicamatij huan nanquiselisque ica in huelilis de notocaytzin se de yancuic notaneltocacau, no ijcón Nejuatzin nannechselfaj, porín nancajsicamatque ya nohuelilis.

**Nican tajtoa de queniu Jesús
Temaquixtijque quinmachtij de se
tagat ten quitepotamía ocsé tagat
tech in tajtacol**

(Mr. 9.42-48; Lc. 17.1-2)

⁶Huan Jesús quinmachtij imomachtijcahuan ijcuín

—Huan tacán acsame quitepotamíaj tech in tajtacol se de nijín conetzin ten notech tacuautamati, ijcuacán cachi cuali para yejuan ne naquen tetepotamíaj ma se quinquechpilohuili se hueyi tet huan ma se quinatamota tech in hueyíat de mar campa cachi huejcatan, de nojón tet ten in tapial quitilantinemi campa molino cuac quicuechojtoc in trigo. ⁷Semi teicneltijque ne talticpacuani cuac yejuan quintepotamíaj notaneltocacahuan ica in tajtacol. Huan nachipa oncas tataman ohuicayome tenica se motepotamis tech in tajtacol. Pero semi teicneltijque nijinques talticpacuani cuac yejuan quintepotamijtinemij notaneltocacahuan tech in tajtacol nemilis. ⁸Huan tacán momay oso mometz mitztepotamíaj tech in tajtacol, ijcuacán xicotona huan xictamota huejca. Porín cachi cuali ticalaquis timacotoltic oso timetzcotoltic tech in yec nemilis campa Dios quinyolyecana itaneltocacahuan ica ihueyichicahualis. Porín como amo ticotonas momay oso mometz ten mitztepotamíaj tech in tajtacol, ijcuacán mitztamotasque tech in mictan campa ne hueyi tatzacuilitoyan, campa in tit amo queman sehuís. ⁹Huan tacán no in moixtololo mitztepotamíaj tech in tajtacol, ijcuacán xiquixti huan xictamota huejca. Porín cachi cuali para tejua ticalaquis tech in yec nemilis ica se moixtololo san huan que ticpías omen moixtololuan huan ica por nojón mitztamotasque tech in mictan campa ne tatzacuilitis huan campa ne tit amo queman sehuís.

Nican Jesús Temaquixtijque quitailij se nexcuitil de se ichcatzin ten xpoliutoya, huan quinejnehuilíá nitaneltocacahuan queme ne ichcatzitzin

(Lc. 15.3-7)

¹⁰Huan Jesús quinmachtij imomachtijcahuan ijcuín:

—Huan amo no xiquinixtopehuacan nión senme de nijín noconetzitzin ten

nohuan pohuij. Huan no namechilía que nepa eluiyactzinco in ángeles taquehualme de Totajtzin Dios yetocque nepa ixpantzinco Yejuatzin huan quinyecpistocque nijín conetzitzin ne ten nohuan taneltocacque. ¹¹Huan Nejuatzin ni Yectagatzin nihuala para niquinmaquixtis naquen xpoluitocque tech in tajtacol nemilis.

¹²Huan no Jesús quinmachtij imomachtijcahuan ica nijín nexcuitil ijcuín:

—¿Toni nanquixejeco de nijín nexcuitil? Se tagat quiapiaya macuilpoal ichcame huan senme de ne poliu. ¿Cox amo in tapixque quincagua ne cuouta in ocsequin nahuipoal huan caxtolo nahui ichcame huan yohui quitemoti in ichcatzin ten polihuic ya? Pues quema. ¹³Huan tacán hueli cajsis in ichcat ten polihuic, ijcuacán de yec melau ten namechilía que ne tapixque cachi moyolpactía porín cajsic in ichcatzin ten poliucya ya huan que ne nahuipoal huan caxtolonnahui ten amo poliucay. ¹⁴Huan ijcón queme ne tapixque quinequi ma ajstitinemican niichcahuan, no ijcón in Tohueyitajtzin Dios ten yetica ne eluiyactzinco amo no quimonequiltía de que ma xiixpolihuican senme de namejuan ten nanopohuij ihuantzinco.

Nican Jesús Temaquixtijque quinmachtij in tacaquini den monequi se quitapojpoluis se icniú

(Lc. 17.3)

¹⁵Huan Jesús quinilij imomachtijcahuan ijcuín:

—Huan tacán se mocniu mitzchihuilía tensá ten amo cuali, ijcuacán nimantzin xiyó xicnojnotzati huan xicajscamatiltiti moselti. Huan como mitzcaquilía ten tiquiluiti ne mocniu, ijcón yejua quiselía ne maquixtilis. ¹⁶Huan como amo mitzcaquilía ten tiquiluiti, ijcuacán tejua xiquinnotza se ome eyi taca taneltocani

ma yacan namohuan para que ijcón ixnesican que melau tictapojpoluij ya ne mocnitzin. ¹⁷Huan tacán nión no mocniu mitzcaquilá ten tiquiluiti ihuan ne testigos, ijcuacán xiquinilui nochi ne tocnihuan den mosentiláj tech in tiopan. Huan tacán nión no ijcón in mocniu quincacuilá in tocnihuan, ijcuacán xicpohuacan ne mocniu queme se analtecacoyot naquen amo pohui ihuan Dios. ¹⁸De yec melau ten namechilá que nochi ten namejuan nantatacahuatlani de que ma amo quichihuacan in taneltocani nican talticpac, no ijcón motatacahuatlis ya nepa eluiyactzinco. Huan nochi ten namejuan nanquicahuaj ma quichihuacan in taneltocani nican talticpac, no ijcón mochihuas ne eluiyactzinco. ¹⁹Huan no ijcón namechilá que como omen de namejuan nanmoyecyolmaxitáj huan nanmoyectencahuaj de que nanquitajtanilisque ica ne tatatauilis ihuan Dios, ijcuacán in Totajtzin Dios ten yetica nepa eluiyactzinco namechnanquilis huan quichihuas ne ten nancontajtanilijque. ²⁰Huan no namechilá de que campa mosentilisque se ome eyi den notaneltocacahuan ica in chicahualis de notocaytzin, ompa Nejuatzin niyetos tatajcoyan de yejuan.

²¹Ijcuacán in Pedro yajqui huan quitajtolitj Jesús ijcuín:

—Notecotzin, ¿canachpa huelis nictapojpoluis nocnitzin cuac tensá nechchihuilis ten amo cuali? ¿Xe monequi nictapojpoluis chicojpa?

²²Ijcuacán in Jesús quinanquilij ijcuín:

—Nimitzilá amo sayó chicojpa xictapojpolui. Ta, xictapojpolui miacpa, huan amo xicpohua canachpa tictapojpoluis mocniu.

Nican Jesús Temaquixtije quitailij se nexcuitil den se tagat ten amo quinequía quitapojpoluis iicniu

²³Huan ijcón in Jesús quinnójnotzac imomachtijcahuan ica se nexcuitil ijcuín:

—Nicnejnehuililtá se hueyichiuque rey queme ichicahualis de Dios cuac Yejuatzin momasoutoc ica ihueyi chicahualis se iyolijtic. Huan ne rey quinequi quimatis canachi quitahuililáj cada senme de nitaquehualuan. ²⁴Huan cuac ne hueyi chiuque pehuac quichihuac ya cuenta, ijcuacán cualcuilijque se taquehual ne ten quitahuililiaya mías millones de tomin. ²⁵Huan nijín taquehual amo huelía motaxtahuilis. Ica ya nojón in hueyi chiuque tanahuatij ya que ma quinaamacacan in taquehual ihuan nisihuau huan nipiluan huan nochi ten niaxa, para ma ijcón motaxtahuiliani nochi ten quitahuililiaya. ²⁶Pero ne taquehual motoquij huan motancuaquetzac iixpan ne hueyi chiuque huan quitatautij ijcuín: “Notecotzin xinechonyolicneli huan xinechonchía oc huan ijcón huelis nimitzontaxtahuilis nochi ten nimitzontahuililá”. ²⁷Huan ijcón in patrón de ne taquehual quiyolicnelij huan quitapojpoluij de nitahuicahualis huan de ompa quicahuac ma yohui. ²⁸Huan cuac yequin calanquistiaya ya de nichan ipatrón, ijcuacán ne taquehual moitac ihuan se itaquehualicniu ten no quitahuililiaya sequi tomin san, amó mías. Pero yejua nimantzín quiquechquitzquij ne itaquehualicniu huan pehuac quiquechpajpatzca huan quiliaya ijcuín: “Nechtaxtahuilía axcan ten tinechtahuililá”. ²⁹Ijcuacán ne itaquehualicniu motancuaquetzac iixpan huan quitatautiyaj ijcuín: “Xinechonchía oc se ome eyi tonal oc huan ijcón nimitzonixtahuilis nochi ten nimitzontahuililá”. ³⁰Huan ijcón ne taquehual amo quinequic quichías. Ta, cuiyac quitzacuato tech in cárcel para ma quitaxtahuiliani nochi ten quitahuililiaya. ³¹Huan in ocsequi taquehualme cuac quicacque que ijcón mochihuac, ijcuacán yejuan

semi quintelyolcocoj huan yajque quitapohuitoj in ne hueyi chiuque nochi ten mochihuac. ³²Ijcuacón in ne hueyi chiuque tanahuatij ma quicuitij in taquehual huan quilij ijcuín: “Tejua taquehual, semi amo tiyolcuali. Nejua nimitztapojpoluij de motahuicallis porín tejua tinechontajtanilij de que ma nimitztapojpolui. ³³Huan tejua no ijcón monequía xicchiuani de que xicyolicneliani ne motaquehualicniuijón queme nejuatzin nimitzyolicnelij”. ³⁴Huan ijcón in patrón semi yolcualanic huan tanahuatij ma quitzacuati tech ne cárcel huan ma amo quisasquía hasta cuac nochi quitamitaxtahuilisquía ya ten quitahuiquilíaj.

³⁵Huan Jesús quinilij ijcuín:
—No ijcón in Tohueyitajtzin Dios ten yetica nepa eluiyactzinco namechchiuulis cada senme de namejuan, como amo nanquintapojpoluisque namocnihuan ica nochi namoyolojuan nochi ne ten namechtahuiquilíaj.

**Nican Jesús Temaquixtijque
quinyecajsicamatiltij in tacaquini
de ne sihuacacahualis huan de ne
tagacacahualis**

(Mr. 10.1-12; Lc. 16.18)

19 Huan mochihuac que cuac Jesús quintaminextilij ya nijñ tajtolme, ijcuacón quisac de Galilea huan yajqui ne analcopaca de Judea huan ajsito ne iquisayampa in tonal campa in hueyíat de Jordán. ²Huan míac tagayot quitoctiliayaj Jesús huan Yejuatzin quinpajtiaya míac ten cocoxcayetoyaj ica ten míac tataman cocolis. ³Huan ijcón sequin fariseos motoquijque para quiejecosque nitanemilij de Jesús huan quitajtanielijque ijcuín:

—¿Cox quitechahuilíaj in tanahuatil de Moisés de que se tagat ma mosihuacahua tenica tenesi ohuijayot?

⁴Huan Jesús tananquilij ijcuín:

—¿Xe amo queman nanquileerojtinemij tech in Tajcuilolamatzin de Dios de que Totajtzin Dios quichihuac in ome taman cuac ne tatzinpehuac nochi? Ijcuac Yejuatzin quichihuac in tagat huan in sihuat.

⁵Huan Jesús no quinilij ijcuín:

—Ica ya nojón in tagat ma quincahua itatajtzin huan inanajtzin huan ma mosentali ihuan isihuau. Huan in ome mocahuas sansé san. ⁶Huan ijcón amo omen oc yesque. Ta, sayó se. Ica ya nojón in tagat huan in sihuat ten Dios quinsentalis namicuani ya, yejuan nojonques ma amo se tagat quinxexelos oc.

⁷Ijcuacón in fariseos quitajtolitijque Jesús ijcuín:

—¿Queyé in Moisés quitechahuilij ma se quimacas se isihuau se tajcuilolamat campa ixnesis de que mocacauque ya?

⁸Pero in Jesús quinnanquilij ijcuín:

—Moisés namechmacac ne tanahuatil de ne sihuacacahualis porín namejuan nanyolpipicticque de namotamachilis huan amo quinecque quitacamatisque Dios. Pero melau cuac Yejuatzin quichijchiuac in talticpac huan in eluiyac, ijcuacón amo ijcón catca.

⁹Ne tagat motajtacolmacas cuac yejua quinemilis de que quicahuas isihuau masqui yejua ne isihuau amo motajtacolmaca ihuan ocsé tagat. Huan ne tagat ten quicahuas nisihuau huan monamictis ihuan ocsé sihuat, yejua ne motajtacolmacas. Huan no ijcón como huitza ocsé tagat huan monamictis ihuan ne tesihuau, no ijcón yejua motajtacolmacas ya porín ne tesihuau poutoc oc ihuan ne itayecancayoquich.

¹⁰Huan Jesús imomachtijcahuan quilijque ijcuín:

—Huan tacán ijcón mochihua de que in tagat amo huelis quicahuas isihuau, ijcuacón cachi cuali ma amo monamictiani.

¹¹ Huan ijcón in Jesús ocsepa quinilij ijcuín:

—Amo nochin huelis quitacamatisque nijín tanextililis. Ta, sayó yejuan ne naquen Dios quinajsicamatiltis ya. ¹² Ongac tataman tamachilisme para ma amo se monamictis. Sequin taca amo hueli monamictíaj porín mococoaj desde cuac yolic huan ijcón amo huelis tascaltisque. Huan ocsequin taca amo hueli monamictíaj, porín acsame quintahuelitaj ya huan quincococojque; ica ya nojón amo huelis tascaltisque. Huan ocsequi taca amo hueli monamictíaj porín quinequij motequitisque itech in tanahuatil de que Dios momasoutoc ica ihueyichicahualis iyolijtíc itaneltocacahuan. Huan nochi naquen huelis quitacamatis nijín tanextililis, ma quiseli huan ma quitacamatiyás.

**Nican tajtoa de queniu Jesús
Temaquixtíjque quintiochihuac in
coneme**

(Mr. 10.13-16; Lc. 18.15-17)

¹³ Huan ijcón cualcuilijque sequin coneme para ma Jesús quintiochihua huan para ma quincuaamajpacho huan para ma motatautili ica por yejuan. Huan imomachtijcahuan de Jesús peuque quintacahualtiyaj ne naquen quinquacuiliayaj ninconehuan. ¹⁴ Huan Jesús quinilij ocsepa ijcuín:

—Xiquincahuacan in coneme ma hualacan nohuan huan amo xiquintacahualtican. Porín in coneme queme nijín, yejuan tacuautamatij notechcacopaca. Huan no namechilía que nochi naquen motemacas nohuan ma niqinyolyecana, ijcón queme ne coneme, yejuan nojonques Dios quinyolyecantiyás ica ihueyichicahualis.

¹⁵ Huan cuac quincuaamajpachoj ya nijín coneme, ijcuacán in Jesús yajqui huan quisac tech ne lugar.

**Nican tajtoa de queniu Jesús
Temaquixtíjque quinojnotzac se
telpocat rico**

(Mr. 10.17-31; Lc. 18.18-30)

¹⁶ Huan ijcón huala se tagat campa Jesús yetoya huan quitajtoltij ijcuín:
—Tejuatzin, tioncuali tiontamachtijque, ¿toni cuali chihualis monequi nicchihuas para nicpías ne yec nemilis nachipa?

¹⁷ Ijcuacán in Jesús quinanquilij ijcuín:

—¿Queyé tinechnojnotza de nicuali? Porín amo aca ocsé oc yolcuali. Ta, sayó se aquen yolcuali huan Yejuatzin ya ne in Totajtzin Dios. Huan tacán ticnequi ticalaquis tech in yec nemilis, ijcuacán monequi xictacamati in tanahuatilme de Dios.

¹⁸ Ijcuacán in tagat quitajtoltij ijcuín:
—¿Catiyejua in tanahuatilme monequi ma niqintacamati?

Huan Jesús quinanquilij ijcuín:
—Amo xitemicti, amo xisihuapapatatinemi, amo xitachtequi, amo xixolopijti ihuan ocsequin. ¹⁹ Huan ximohuiscapohua motajtzin huan monantzín; huan xictasojta mocniu ijcón queme tejua timotasojta.

²⁰ Huan in telpocat tananquilij ijcuín:
—Nochi nijín nicchiutihuitz ya desde cuac nipili oc nicatca. ¿Huan toni oc nechpoloa oc?

²¹ Huan Jesús quilij:
—Como ticnequi tiyecchipaucanemis, ijcuacán xiyó xicnamacati nochi ten moaxca huan xiquinxexeluili in taca ten amo teyi quipíaj ten cuasque. Huan ijcón ticpías in hueyi paquilis huan yec yetolis nepa eluiyactzinco. Huan xihuiqui nohuan huan xinechtotiliqui huan xinechtacamatiyás.

²² Huan cuac ijcón quicayic in telpocat de nijín tajtolme, ijcuacán mocuepteu huan yajqui moyolcocojtiyáj porín quipiaya míac ten niaxca.

²³Ijcuacán Jesús quinilij
imomachtijcahuan ijcuín:

—De yec melau de namechilía
de que semi ohui para se rico ma
motemactiyás inahuactzinco Dios
para que Yejuatzin quiyolyecantiyás
ica ihueyichicahualis. ²⁴Huan ocsepa
namechilía de que amo huelis nalpanos
se hueyi tapial ten monotza camello
campa coyotcic in acoxaj. Pues amo
no huelis motemactiyás in tagat rico
inahuactzinco Dios para que Yejuatzin
quiolyecantiyás ica ihueyichicahualis,
como yejua tacuautamatinemi itech
niricoyo.

²⁵Huan cuac imomachtijcahuan
quicacque ijcón, ijcuacán yejuan semi
quimoucacacque huan motajtoltiyaj
yejuan san se huan ocsé ijcuín:

—¿Aconi, pues, huelis maquisas de
nitajtacoluan ijcón?

²⁶Ijcuacán in Jesús quinsenitac huan
quinilij ijcuín:

—In taca amo huelis momaquixtisque
de nitajtacoluan, como amo yec
tacuautamatij ihuan Dios; porín
xicmatican de que sayó Dios huelis
nochi quichihuas nijín.

²⁷Huan ijcón in Pedro tananquilij
ijcuín:

—Xiconita, tejuatzin, tejuan
ticaque ya nochi ten ticpiyaj
huan timitztoctilíaj axcan para
timitztacayasque. ¿Huan toni tejuan
ticselisque?

²⁸Huan Jesús quinnanquilij ijcuín:

—De yec melau ten namechilía
que tech ne tonalme ten huitze
oc Dios quichihuas nochi yancuic
ya. Huan Nejuatzin ni Yectagatzin
nimotalis queme se rey huan ompa
nitayecanas ipan nochi ten ongac ica
nohueyichicahualis. Huan namejuan
ten nannechtoctilijtocque huan
nechtacamatinenque, namejuan no
ompa nanmotalitihue nonacastan
campa ne taixejecoloyan campa

yetocque in majtactiomome sillas.
Huan ompa tiquinixejecoltisque huan
tiquinixcomacasque in pueblojuani de
Israel ten pohuij de ne majtactiomome
tetatme. ²⁹Huan cuali quichihuas
se tagat taneltocque como yejua
nechyoltasojtas huan quincantiyás ya
ninchan, huan icnihuan taca, huan
icnihuan sihuame, huan itajtzin huan
inantzin, huan nisihuau, huan nipiluan
huan nitaluan ten niaxca. Huan in
taneltocani como quicauque ya nochi
nijín porín quitasojtaj notocay, yejuan
nojonques quiselisque se macuilpoalpa
tatiochihualisme, huan no quiselisque
in yec nemilis ten amo queman tamis.
³⁰Huan miacque taneltocani ten
axcan tayecanani, yejuan nojónques
yesqui tacuitapanme. Huan miacque
taneltocani ten axcan tacuitapanme,
yejuan nojónques tech ne tonalme
yesque tayecanani.

**Jesús Temaquixtijque quinmachtij
in tacaquini ica se nexcuitil huan
quinejnehuililtij in taneltocani de
Cristo queme ne milajtequitini**

20 Huan in Jesús quinnextili in
tacaquini nijín nexcuitil ijcuín:

—Nicnejnehuililtía se tagat rico
queme ichicahualis de Dios cuac
Yejuatzin den ne eluiyactzinco
momasoutoc ica ichicahualis se iyolijtic.
Huan ne tagat rico patrón quiapiya
miác taquehualme ten quitequitilíaj
ya tech ne milajuvas cuouta. Huan se
tonal quisac in patrón semi cualcan
huan quintemoto sequi tequitini
para ma cajocuican ne uvas taquilot
ten yocsic ya. ²Huan ne patrón
moyectencahuac ya ihuan in tequitini
de que quintaxtahuis ajsitoc se tonal
tatanisque ica ne tomin denario. Huan
ijcón quintitanic in tequitini tech ne
italpan para ma quitequitilitij yejuan.
³Huan ica ojpa quisac in patrón
nepa queme chicnahui hora de tajca,

huan ocsepa quinitac ocsequi taca tocotzyetoyaj san tech ne plazajteno.

⁴Huan in patrón quinilij ijcuín:

“Namejuan xiyacan no xinechtequitilitij tech ne nomila huan namechtextahuis ijcón queme monequi”. Ijcuacán in taca yajque quitequitilitoj. ⁵Huan ica expa huan ica naupa quisac in patrón nepa queme nepanta huan ocsepa quisac nepa queme eyi hora de tiotac, huan quichi huac ocsepa ijcón queme quichi huac ne cualcampa. ⁶Huan ipa queme macuil hora de tiotac yajqui in patrón tech ne plaza huan ocsepa quinajsic sequin taca tocotzyetoyaj san huan yejua quinilij ijcuín: “¿Queyé namejuan nanyetocque nican san nochi in tonal huan amo nantequitij?”

⁷Ijcuacán yejuan tananquilijque ijcuín: “Nican tiyetocque porín amo aquen techmaca tequit”. Huan ijcón in patrón quinilij: “Namejuan no xiyacan xinechtequitilitij tech ne nomila huan namechmacas in taxtahuil ajsitoc ijcón queme monequi”. ⁸Huan ne cuac pancalayic ya in tonal, ijcuacán in patrón ten niaxca den milajuvas cuouta, ne patrón quilij ne tagat ten quinyecanaya in tequitini ijcuín:

“Xiquinnotza nochi in tequitini huan xiquintaxtahui ajsitoc ijcón queme monequi. Pero achto xiquintaxtahui de ne satepan peuque tequitij, huan nimampa no xiquintaxtahui sejsé ijcón queme toni hora peutyajque tequitij in taca”. ⁹Huan ijcón mochi huac. Achtopa motenextilijque para quintaxtahisque nochi ne naquen tequitijque nepa queme macuil hora de tiotac. Huan ijcón cada se quiselij nitaxtahuil ajsitoc ijcón queme se tonal tatanilis de se tomin denario, ijcón queme quinilijca ya in patrón ne achtopa. ¹⁰Huan cuac motenextilijque ya ne naquen achto peuque tequitij, ijcuacán yejuan quiyolnemiliayaj de que quiselisque cachi míac taxtahuil. Pero amo ijcón

mochi huac queme yejuan quinemiliayaj quiselisque. Ta, no quiselijque ijcón cada se de se tonal taxtahuil, de se tomin denario, ijcón queme ocsequin quiselijque. ¹¹Huan cuac quiselijque ya ne taxtahuil, ijcuacán yejuan peuque moyolcuejmoloaj ihuan in patrón se huan ocsé. ¹²Huan quilijque in patrón ijcuín: “¿Queyé nijín tequitini ten tequitijque sayó se hora san huan no tiquintaxtahui ajsitoc ijcón queme tejuan titechtextahuij? Huan tejuan titaxicojque titequitijque nochi in tonal masqui melau ica tatotoncayot”.

¹³Ijcuacán in patrón quinnanquilij senme de yejuan tequitini ijcuín: “Nocniu, amo teyi nimitzchihuilitoc ten amo cuali. ¿Xe amo tejava nohuan timoyectencahuac de que canachi tomin denario nimitzmacasquía para se tonal tequit?” ¹⁴Huan no quilij in patrón: “Xicui nijín motaxtahuil huan xiyó. Porín nejua nicnequi niquintaxtahuis de ne tequitini masqui melau satepan ya peuque tequitij ijcón queme tejava nimitztaxtahuij ya. ¹⁵¿Xe nejua amo nihuelis nicchihuas queme nicnequis ica notomin? ¿Xe tejava tiquinyolnexcólía ocsequi in tequitini naquen nejua niquinyolicnelía?”

¹⁶Huan ijcón miacque taneltocani ten axcan tayecanaj, yejuan nojonques yesque tacuitapanme. Huan miacque taneltocani ten axcan tacuitapanme, yejuan nojonques yesque tayecanani. Huan axcan miacque tanotzalme ya de Dios, pero amo miacque taijitalme yesque tech ne tonal.

**Nican Jesús Temaquixtijque
quintetapohuij imomachtijcahuan
ica expa de que ejcotoc ya imiquilis**
(Mr. 10.32-34; Lc. 18.31-34)

¹⁷Huan cuac Jesús tejcotiaya ojtipan para Jerusaléncopaca, ijcuacán quinnotzac in majtactionome imomachtijcahuan seco de ne ojti huan quinilij ijcuín:

¹⁸—Xiquitacan, tejuan titejcotiyohue para Jerusaléncopaca huan ompa Nejuatzin ni Yectagatzin nechtemactisque inmaco in tayecanani tiopixcame huan inmaco in tanextiliani den tanahuatil de Moisés, huan yejuan nechtelchihuasque para ma nechmictican. ¹⁹Huan nechtemactisque imaco in tagayot ten amo judíos para ma nechquejquelocan, huan ma nechuijuitequican, huan ma nechcuoupampilocan. Huan niman ipan eyi tonalica Nejuatzin nipanquisas niyoltoc intzalan in ánimajme.

**Nican in nantzín de Santiago
huan in Juan quitajtanilij Jesús
Temaquixtijque tensá cualtagayot**
(Mr. 10.35-45)

²⁰Huan ijcón motoquij campá Jesús se tenan ten isihuau den Zebedeo ihuan iconahuan Jacobo huan Juan. Huan in sihuat motancuaquetzac iixpan Jesús para quitajtanilis tensá den cualtagayot.

²¹Huan Jesús quitajtoltilij ijcuín:

—¿Toni ticnequi?

Huan in sihuat tananquilij ijcuín:

—Xitanahuati que ompa

campa Tejuatzin titayecana ica mohueyichicahualis ma no noconeahuan ma no quipiacan tanahuatil para ma motalican se moyecmacopaca huan in ocsé moopochcopaca.

²²Huan in Jesús quinanquilij ne sihuat ijcuín:

—Namejuan amo nancajsicamatij ten nannechtajtaniñaj. ¿Xe huelis nantaxicosque ten Nejuatzin nitaxicos porín nicseli sayó tajyohuilis?

Huan yejuan tanaquilijque:

—Quema catzín, tihuelisque.

²³Huan Jesús quinilij ijcuín:
—De yec melau ten namechilía que namejuan nanquiselisque ne vaso den cualcui tajyohuilis ijcón queme Nejuatzin nicselis. Huan nanquiselisque de taahuilis ten cualcui tajyohuilis

ijcón queme Nejuatzin nicselis. Pero Nejuatzin amo nicipía in tanahuatil para namechnahuatis que tejua Jacobo timotalis ca chichahualis noyecmacopaca huan tejua Juan timotalis ca chichahualis noopochcopaca. Ta, sayó Totajtzin Dios quinmactis ne tetayocolil para naquen Dios quiniñtac ya.

²⁴Huan cuac in ocsequi majtactionmomen imomachtijcahuan quicacque nijín tajtolme, ijcuacán moyolcualantijque ihuan in icnime Jacobo huan in Juan. ²⁵Huan Jesús quinnotzac nochin huan quinilij ijcuín:

—Como nanquimatij, in tayecanani de tataman pueblome mohueyimatij huan mopohuaj hueyi chihuanime tech ne in pueblome huan quinmachililtíaj inchicahualis den ne inpueblójcahuan.

²⁶Pero ma amo ijcón namohuan.

Ta, naquen quinequis mochihuas tayecanque namohuan, yejua ne ma mochihua queme se tetaquehual san den nochin. ²⁷Huan tacán acsá de namejuan quinequis tayecanas, ijcuacán ma mochihua queme se tetequitilijque san den nochí. ²⁸Porín Nejuatzin ni Yectagatzin amo nihuala para ma acsame nechtequitilican. Ta, nihuala sayó para ma nitetequitilis, huan para ma nictemacas nonemilis para niquixtahuas in tajtacol, huan para niquinmaquixtis nijín talticpacuani.

**Nican tajtoa de queniu Jesús
Temaquixtijque quintachialtij ome
ixpojpyome campá pueblo de Jericó**
(Mr. 10.46-52; Lc. 18.35-43)

²⁹Huan yaya Jesús ihuan imomachtijcahuan huan queman quistiayaj ya tech ne pueblo Jericó, ijcuacán huel mías tagayot quitoctiliayaj. ³⁰Huan tocotzyetoyaj ome ixpojpyome ojtenteno. Huan cuac yejuan quicacque de que Jesús

panotiaya ompaca, ijcuacán peuque quichicaucatzajtziilayaj huan quiliayaj ijcuín:

—Totecotzin Temaquixtijque, tion Teconetzin de rey David, xitechonyolicneli.

³¹Huan in tagayot quintacahualtiayaj para ma amo cachi quitzajtziilianij oc, pero ne ixpojpopoyome cachi quitzajtziilayaj chichahuac ijcuín:

—Totecotzin Temaquixtijcatzin, tion Teconetzin de ne huejcau rey David, xitechonyolicneli.

³²Ijcuacán in Jesús moquetzac huan quinnotzac ne ixpojpopoyome huan quintajtoltij ijcuín:

—¿Toni nanquinequij ma namechihuili?

³³Ijcuacán yejuan quinanquilijque ijcuín:

—Totecotzin, ticnequij xitechontachialti.

³⁴Huan ijcón in Jesús quinyolicnelij huan quinxacualoj. Huan ijcón nimantzin ya tachiacque ne ten catcaj ixpojpopoyome; huan de ompa quitoctilijque Yejuatzin para quitacamatiyasque.

**Nican tajtoa de queniu Jesús
Temaquixtijque calayic tech pueblo
de Jerusalén huan in tagayot
quimohuistilijtiayajque**

(Mr. 11.1-11; Lc. 19.28-40; Jn. 12.12-19)

21 Huan Jesús huan imomachtijcahuan ajsitiyayaj ya ne Jerusaléncopaca, huan yajque huan calacque ya tech in pueblo de Betfagé cerca ya de se tepet den monotza Olivos. Ijcuacán in Jesús quintitanic ome imomachtijcahuan, huan quínij ijcuín:

²—Xiyacan tech ne pueblo ten ne yetoc cachi taixpampa. Huan niman cuac nancalaquitihue, ijcuacán ompa nancajsisque se tenan burrita ilpitoc ihuan se burritojtzin. Huan yej ne

xictohtomacan huan xinechualcuilican.

³Huan tacán acsá tensá namechilisquía, ijcuacán namejuan xitananquilican ijcuín: “In Totecotzin quimonequiltía quitatequiutis in tapialtzin”. Huan ijcón nimantzin namechcahuilisque in burrito.

⁴Huan nochi nijín mochihuac para ma ijcón motamijchihua ten quijcuilojteu in tanahuatijque Zacarías cuac yejua quijtojteu ijcuín:

⁵Xiquilican ne pueblojuani de Sión de Jerusalén ijcuín:

“Xiquitacan,
namohueyitayecancatzin
hualajtoc ya para
namechyecanas.

Yejuatzin yolyemanic huan cualtagat.

Huan tocotzyetihuitz ipan se burrita, tepili de se tapial”.

⁶Huan ijcón imomachtijcahuan yajque huan quichiuque ijcón queme Jesús quinnajnahuatijca ya. ⁷Huan cualcuilijque Jesús in burrita ihuan nipili huan quipanpejpechtijque ica ninayahuan, huan ijcón in Jesús mopantalij ipan in burrita. ⁸Huan tel mías tagayot quisohuayaj talixco inayahuan huan ocsequi quimatectiayaj cuoume nimayo huan quimoyautiayaj ne xihuit taixpampa de Jesús tech ne ojti. ⁹Huan mías tagayot yayaj tayecanayaj huan ocsequin cualtoctiliayaj Jesús. Huan ijcón nochi yayaj yalpactiayaj huan quijtoayaj ijcuín:

—iHosana timitzonueyichihuaj Tejuatzin Temaquixtijcatzin, tion Teconetzin de ne huejca rey David! ¡Tiontatiocihual den tihualajtoc itencopa Totajtzin Dios! ¡Ticueyichihuaj Totajtzin Dios ten yetica nepa eluiyactzinco!

¹⁰Huan cuac calayic ya Jesús tech in pueblo de Jerusalén, ijcuacán nochi in pueblojuani moyolcuejmoloayaj huan miacque motajtoltiyaj ijcuín:

—¿Aconí yejuatzin ne?

¹¹Huan miacque tagayot tananquilijque ijcuín:

—Yejuatzin ya in tanahuatijque ten monotza Jesús huan yejua ne cayot de Nazaret de Galilea.

**Nican tajtoa de queniu Jesús
Temaquixtijque quichijchipahuac in
cachi hueyi tiopan den judíos**

(Mr. 11.15-19; Lc. 19.45-48; Jn. 2.13-22)

¹²Huan cuac Jesús calayic tech in tiopan de judíos den cachi hueyi, ijcuacán Yejuatzin pehuac quincalanquixtía nochí ne tanamacani huan ne tacohuani ten tequititoyaj tech in tiopanijtíc. Huan quicuic in mesajme den tomin papatani huan ica calan tacuamotac. Huan no ne icpalme den ne sehuilonime den ne naquen quinnamacatoyaj in totome ten monotza palomas, no ijcón ica calan tacuamotac. ¹³Huan Jesús quínij in tagayot ijcuín:

—Achá amo nanquimatij de que tajcuiliutoc ya tech in Tajcuilolamatzin ijcuín: “Nijín nochan quitocaytisque se cali de ne tatatautílis ihuan Dios”. Huan namejuan nanquichiutocque nochantzin queme yesquía se tecal campa yetocque in tachtequini.

¹⁴Huan nimampa tech ne tiopanijtíc motoquij campa Jesús sequin cocoyani ixpojpopoyome, huan sequi ten amo huelíaj moquetzayaj huan Jesús quinpajtíj. ¹⁵Huan in tayecanani tiopixcame huan in tanextiliani den tanahuatíl de Moisés quitacque ne mohuiscatequit ten Jesús quichihuac, huan no quicacque nochí in telpocame cuac quimohuistiliayaj Jesús tech ne tiopanijtíc ijcuín: “Timitzonueyichihuaj Temaquixtijque, tion Teconetzin de rey David”. Huan ijcón cuac in tayecanani quicacque nijín tajtolme, ijcuacán yejuan peuque yolcualanque, ¹⁶huan quilijque Jesús ijcuín:

—Xicaqui san ten mitzilijtocque nijín telpocame.

Pero Jesús quinnanquilij ijcuín:

—Quema, niquincaquilijtoc. Pero achá namejuan amo queman nanquileerojqe in Tajcuilolamatzin campa quijtoa ijcuín:

Totajtzin Dios, Tejuatzin ticonchiutzino de que in pilime huan in coneme ten chichij oc ma mitzoncantarohuiliíaj huan mitzonmohuistilisique.

¹⁷Huan de ompa Jesús quincateu in tagayot huan yajqui campa pueblojuani de Betania huan ompa mocahuac se yohual.

**Nican tajtoa de queniu Jesús
Temaquixtijque quintelchihuac in
higoscuhuit ten amo quitemacac
itaquilo**

(Mr. 11.12-14, 20-26)

¹⁸Huan imostica cualcampa Jesús mocuepac ocsepa se viaje tech ne pueblojcopaca de Jerusalén. Huan mochihuac que cuac nejnentiaya ya, ijcuacán pehuac mayana. ¹⁹Huan Jesús quitac se higoscuhuit ijcatoc ojteno, huan yajqui quitemolito itaquilo; pero amo teyí caxilij. Ta, se cuohuit ten sayó maxoxohuixtoc san. Ijcuacán in Jesús quilij ne higoscuhuit ijcuín:

—Amo queman tictemacas oc motaquilohuan.

Huan niman ne higoscuhuit pehuac niman huaqui. ²⁰Huan cuac imomachtijcahuan quitacque de que huayic ya ne higoscuhuit, ijcuacán semi quihueyimoucaitacque huan quitajtoltijque Yejuatzin ijcuín:

—¿Quení nijín higoscuhuit tel niman huayic?

²¹Ijcuacán in Jesús quinnanquilij ijcuín:

—De yec melau ten namechilía de que xicpiacan ne ajsicatacuaumatilis huan xicneltocacan de que

melau mochihuas ya nochi ten nanquitajtanilisque Dios. Huan ijcón amo sayó huelis nanquichihuasque nijín ten nicchihuiliij nijín higoscuhuit. Ta, no huelis nanquinahuatisque se hueyi tepelomo ijcuín: “Ximijcuini de nican huan xiyó ximocalaquiti tech in hueyíat mar”, huan nochi nijín huelis mochihuas. ²²Huan como nanyecajsicatacuautamatij de nanquitajtanilisque Dios ica ne tatatautilis, ijcuacán yec melau nanquiselisque ten nanquitajtanilisque, masqui ohuicayot tzictzin queme in higoscuhuit oso se ohuicayot ten semi hueyi queme se tepet.

Nican tajtoa de queniu in tayecanani de judíos quitajtanilijque Jesús de aconí itanahuatil ten quipía

(Mr. 11.27-33; Lc. 20.1-8)

²³Huan niman Jesús calayic tech in tiopan de judíos. Huan cuac quinnexutilijtoya ica in Tajtoltzin de Dios in tagayot, ijcuacán nimantzin motoquijque in tayecanani den tiopixcame huan in huehuentzitzin den pueblojuani de judíos, huan yejuan quitajtoltijque Jesús ijcuín:

—¿Catiyejua tanahuatil ticualcui tejua para ticchihuas nijín tanextililisme? ¿Huan aconí mitzonmacac ne tanahuatil?

²⁴Pero Jesús quinnanquilij ijcuín:

—Nejua no namechtajtoltiti se matájtanti. Huan tacán nannechnanquilíaj, ijcuacán nejua no namechilis ica aconí itanahuatil nicpía para nicchihuas nochi nijín tequit. ²⁵¿Aconí quinahuatij Juan ma taahuijtinemi? ¿Xe Dios quinahuatij ma taahuijtinemi in Juan oso yejuan in tagayot quinahuatijque in Juan?

Huan yejuan moixejecoltiayaj se huan ocsé huan quiytoayaj ijcuín:

—Tacán tiquilíaj de que in Dios quinahuatij in Juan ma taahuijtinemi,

ijcuacán yejua technanquilis ijcuín: “Huan, ¿queyé amo nanquineltoquilijque ten namechiliaya in Juan?” ²⁶Huan tacán tiquilíaj de que in tagayot san quinahuatijque in Juan de que ma taahuijtinemij, amo no cualtías. Porín tiquinmoucatocaj in pueblojuani de judíos que topan yasque. Porín yejuan in pueblojuani quipohuayaj ne Juan Taahuique de que se hueyi tanahuatijque de Dios.

²⁷Huan ijcón in tayecanani quinnanquilijque Jesús ijcuín:

—Amo ticmatij aconí quinahuatij in Juan ma taahuijtinemi.

Huan Jesús quinilij:

—No ijcón nejua amo no namechilis de que aconí nechmacac in tanahuatil de nicchihua nochi nijín tanextililisme.

Nican tajtoa de queniu Jesús Temaquixitijque quinmachtij in tacaquini se nexcuitil de ome telpocame

²⁸Huan ijcón in Jesús quinilij imomachtijcahuan ocsé nexcuitil ijcuín:

—¿Toni nanconixejecoaj de nijín nexcuitil? Se tagat yajqui quitato in itayecancatelpoch huan quilito ijcuín: “Noconeu, axcan nicnequi xiyó xinechtequitiliti itech ne nomilaj uvas cuouta”. ²⁹Huan tananquilij ne iconu ijcuín: “Amo nicnequi niyás nimitztequitilitiu”. Pero cachi satepan moyolnemilij huan yajqui quitequitilito nitat. ³⁰Huan in tetat yajqui quitato ica ome itelpoch huan quilij ijcón queme ne ocsé quilijca ya. Huan ne ica ome itelpoch tananquilij ijcuín: “Quema, notajtzin, niyás nimitztequitilitiu”. Pero satepan amo yajqui.

³¹Huan in Jesús quintajtoltij in tayecanani ijcuín:

—¿Catiyejua de ne ome telpochme quichiuque queme quinequía in tetat?

Ijcuacán in tagayot tananquilijque ijcuín:

—Yej in tayecanque.

Huan ijcón in Jesús ocsepa quinilij ijcuín:

—De yec melau ten namechilía que in tatopaluiani huan in sihuaahuiltiani san namechyecantiyohue huan yejuan calaquisque campa Dios momasoutoc ica ihueyichicahualis ninyolijtic de nitaneltocacahuan. ³²Namechilía ijcón porín hualajca ya in Juan Taahuijque para namechnextilis de queniu nanchipaucanemisque huan amo nanquineltoquilijque. Huan in tatopaluiani huan in sihuaahuiltiani, quema, yejuan quineltoquilijque huan moyolnemilijque de nintajtacoluan. Huan namejuan masqui nanquitacque ya nijínques ten quineltoquilijque Juan, pero namejuan amo no nanmoyolnemilijque de namotajtacoluan para nanquineltoquilisque in Juan.

Nican Jesús Temaquixtijque tamachtij ica nexcuitil de ne tequitini ten amo yolcualime

(Mr. 12.1-12; Lc. 20.9-19)

³³Huan ijcón in Jesús quinnextiliaya imomachtijcahuan ica nijín nexcuitil huan quinilij ijcuín:

—Xicaquican ocsepa ocsé nexcuitil. Se tagat patrón quiapiaya míac ten niaxca huan quitocac sequi uvas tactzon tech ne imila, huan quichi huac se corral, huan tachcuac se tayohual campa huelis quipatzcas in uvas taquilot. Huan no quichi huac se hueyi tepamit para huelis quipanitas ne uvas cuouta para tajpías. Huan cachi satepan in patrón quitepialtijteu ica renta ihuan senme de nijín tequitini. Huan in patrón yajqui paxaloto huejca itech ocsé país. ³⁴Huan queman ajsic ya ne tonal cuac yocsic ya in uvas, ijcuacón in patrón quintitanic itaquehualuan para ma quiselitij in uvas taquilot de ne tequitini quimactilisque den pohui

ihuan in patrón. ³⁵Pero in tequitini quinquitzquijque itaquehualuan den patrón huan quinuitecque. Huan sequi quinmictijque huan ocsequi quintepoxonijque ica tet. ³⁶Ica ya nojón in patrón ocsepa quintitanic cachi míac itaquehualuan huan que ne achtopa quintitanca. Huan ne tequitini ten amo yolcualime quichiuque ocsepa ijcón queme ne achtopa quichiuque.

³⁷Huan cachi satepan in patrón quintitanilij se iyojtzin conetzin porín in patrón quiyolnemiliaya de que xa cachi quitasojtasquíaj niconetzin nojón tequitini. ³⁸Huan queman in tequitini quitacque ya ne iconeu in patrón, ijcuacón moyoliluijque se huan ocsé: “Yejua ya ne quiselis nochi ten pohui itatcopaca. Cachi cuali ximoyejyectalikan ma ticmictican huan ijcón tejua ica timocahuasque nijín uvascuoutacayot ten niaxca nitat”. ³⁹Huan ijcón quichiuque, huan quiquitzquijque ne iconetzin ne patrón huan quiquixtijque calampa de ne uvas cuouta huan ompa quimictijque.

⁴⁰Ijcuacón in Jesús quintajtolitj in imomachtijcahuan ijcuín:

—Huan cuac hualas ne patrón den niaxca ne uvas cuouta, ijcuacón òtoni quinchihuilis ne tequitini ten amo yolcualime?

⁴¹Ijcuacón imomachtijcahuan quinanquilijque ijcuín:

—In patrón hualas huan yejua amo quinyolicnelis oc. Ta, quintamimictis ya ne tequitini ten amo yolcualime. Huan quincahuilis ica renta ocsequin tequitini ne uvas cuouta para ma yejuan quimactilican ne uvas taquilot cuac ne yocsis ya nochi ten pohui ihuan in patrón.

⁴²Huan Jesús quinnojnotzac ne tacaquini huan monejnehuililtij yejua san mismo queme se tet huan quinilij ijcuín:

—Achá amo queman nanquileerojtinemij in Tajcuilolamatzin ten quijtoa ijcuín:

In tet ten quimajpeuque in
tepanchihuani, yejua ne
mochihuaco tepanchicahualoni
de tepamit.

Huan namejuan nannechixtopeuque
ijcón queme in tepanchihuani
quicauque ne tetzin ten
mochihuacaco tepanchicahualoni.

Huan in Totajtzin Dios quichihuac
nijín tequit huan para tejuan
semi cualtzin queme amo
queman tiquitayaj.

⁴³Huan no Jesús quinilij
imomachtijcahuan ijcuín:

—Huan ijcón namechilía que namejuan
Dios namechajchihuili in tanahuatil
para amo nantayecanasque ihuan
Dios campa Yejuatzin momasoutoc
ica ihueyichicahualis. Huan Dios
quinmactis ocsequin tagayot ne
tanahuatil porín yejuan quichihuasque
ten Dios itahuelital. Huan ijcón yejuan
quimactisque Dios in taquilot ten niaxca,
ijcón queme amo quichihuasquíaj in
amocuali tequitini. ⁴⁴Huan ne tet den
namechilijtoc ijcuín: “Aquen nesi tagat
ipan huetzis ne tet, yejua ne tagat
papayacas ninacayo. Huan tacán ne tet
panuetzis itech se tagat, ijcuacán ne
tagat mocahuas tacuechol”.

⁴⁵Huan ijcón in tiopixcame tayecanani
huan in fariseos cuac quicacque ne
nexcuitilme tenica quinnójnotzaya Jesús,
ijcuacán yejuan cajsicamatque de que
in Jesús tajtojtaya de yejuan. ⁴⁶Huan in
tayecanani quinequíaj quiquitzquisque
Jesús queme preso. Huan amo huelía
quiquitzquisque porín quimohuiliayaj in
pueblojuani judíos. Huan in pueblojuani
judíos quipohuayaj Jesús queme se
hueyi tanahuatijque de Dios, porín sayó
tajtoaya itencopaca Totajtzin Dios.

**Nican Jesús Temaquixtijque qitalij
se nexcuitil de se ne namictilis**

22 Huan ijcón ocsepa in Jesús
pehuac quinnextilía in

tacaquini ica nexcuitilme huan
quinnójnotzac ijcuín:

²—Nicnejnehuililtía se rey queme
ichicahualis de Dios cuac Yejuatzin
momasoutoc ica ihueyichicahualis se
iyolijtic. Huan nijín rey quichihuac
se hueyi iluit de ne namictilis por
nitelpoch. ³Huan in rey quintitanic
nitaquehualuan ma quinnotztatij
ocsequin ten ipa tanejmachtilme ya,
ma tatacuaquij ya tech ne namictilis.
Huan yejuan amo quinecque
yasque tatacuatihue. ⁴Huan ijcón
in rey ocsepa quintitanic ocsequin
nitaquehualuan para ma quinnahuatiti
ijcuín: “Xiquinilican que nochi yetoc
ya in tatacualis, porín nitanahuatij
ya ma quinmictican nocuacuejuan
huan ocsequin notapialuan ten
cachi tomauque. Huan nochi yetoc
ya nintacualis para titatacuasque.
Xiquinilican ma hualacan ma
moyolpactiquij tech nijín ne namictilis”.

⁵Huan nijín taca ten tanejmachtilme
ya catcaj, yejuan amo quinecque
yasque. Ta, quixtopeuque in tacualis.
Sequin taca yajque momilajtequitilitoj,
huan ocsequin yajque tanamacatoy
tech in plaza. ⁶Huan ocsequin taca
ten tanejmachtilme ya catcaj, yejuan
quinqitzquijque nitaquehualuan
de ne rey huan quinnijtecque huan
quinmictijque. ⁷Huan cuac in rey
quicayic de que toni mochihuac,
ijcuacán yejua semi yolcualanic
huan quintitanic nitaquehualuan
soldados para ma quinmictican
ne temictiani, huan para ma no
quintamichichinocan in pueblojuani
de ne temictiani. ⁸Huan ijcón in rey
quinilij in taquehualme ijcuín: “Nochi
yetoc ya para titatacuasque den ne
namictilis. Huan ijcón ne tagayot ten
tanejmachtilme ya catcaj, ipa amo
quinnamiquía de que hualasquíaj porín
ipa amo yolcualime catcaj. ⁹Huan
axcan xiyacan tech ojmaxalme de

ojme den pueblo huan xiquinualcuican aquí huelic nancajsisque huan xiquintatautican ma tatauacuij tohuan tech nijín ne namictilis”. ¹⁰Huan ijcón intaquehualuan yajque tech in ojme huan quinsentilijque nochi ne ten quinajsicque den yolcualime huan masqui ten amo yolcualime, pero quintatautijque de que ma tatauacuij de ne nenamictilis. Huan ijcón mosentilijque míac tagayot tech ne ichan in rey, huan ijcón moyolpactijque de ne nenamictilis.

¹¹Huan niman calayic in rey de naquen ichan para quininitas nochi ne tanotzalme ten hualajque. Pero no quitac se tagat ompa yetoya huan amo taquentoya ica ne tilma de ne nenamictilis. ¹²Ijcuacán in rey quilij in tagat ijcuín: “Tejua, ¿quenin huelic ticalayic nican? Ta, amo titaquentoc ica ne tilma de ne namictilis”. Ijcuacán in tagat sayó motentamatilij huan amo teyi quijtoj. ¹³Huan ijcón in rey quinnahuatij itaquehualuan naquen quixejxelojtoyaj ne tactualis tech ne mesa ijcuín: “Xicmetztzijtzcocan ne tagat ten amo yec taquentoc huan xicmatzicocan huan xicalantamotacan tech in tayohuayanilot campa nachipa chocatos huan campa tannanatzocatos sen nachipa tech in tajyohuilis”.

¹⁴Huan ijcón in rey quinejnehuilfa in Cristo cuac Yejuatzin hualas nican talticpac, cuac quinijsitaqui ne naquen tanotzalme de Totajtzin Dios huan no ne naquen amo tanotzalme. Porín miacque tanotzalme ya, pero amo miacque tajjitalme de Dios.

**Nican tajtoa de queniu
quitajtanilijque Jesús cox monequi
ma taxtahuacan impuestos oso amo**

(Mr. 12.13-17; Lc. 20.20-26)

¹⁵Huan ijcón in fariseos yajque moixejecoltijque huan moyectencauque para quicaquilisque Jesús xa tensá

quijtosquía ten amo cuali, para ica huelis quiteluilisque de tajtacol.

¹⁶Huan ijcón in fariseos quintitanque sequin tamatinime ten inuan pohuíaj huan no quintitanque sequin tamatinime ten pohuíaj ihuan in rey Herodes. Huan yejuan ajsicque huan motoquijque campa Jesús huan quilijque ijcuín:

—Tamachtijque, ticmatij que tejuatzin titajtoa ica nochi ten melau, huan titeyecnextilfa in ojtzin de Dios, huan amo tiquinyolmohuilfa in tagayot ten quijtoj. Huan amo no tiquinchichicotasoja san taca. ¹⁷Axcan xitechonilui toni tiquixejecoa, ¿xe Dios quimonequiltfa ma titaxtahuacan impuestos den rey César, oso amo?

¹⁸Ijcuacán in Jesús niman quinyolojixmatic que amo yec tanemiliayaj ne tayecanani huan quinnanquilij ijcuín:

—Namejuan nantacajcayahuaj san, porín nannechichtacahuisnequij san ica nijín tanemililis.

¹⁹Xinechnextilican in tomin tenica taxtahuas impuestos.

Huan ijcón in tayecanani cualcuilijque se tomin denario. ²⁰Huan cuac Jesús quitac ya in tomin, ijcuacán quintajoltij ijcuín:

—¿Aconi nijín ixayac ten ixnesi nican? Huan, ¿aconi nijín itocay ten ijcuiliutoc nican?

²¹Ijcuacán in tayecanani tananquilijque ijcuín:

—Yejua ya in rey César.

Ijcuacán Jesús quinilij:

—Xicmactilican in rey César ten quinamiqui xicmactican César, huan xicmactilican Dios ten quinamiqui xicmactican Dios.

²²Huan cuac quicacque ya nijín tajtolme, ijcuacán ne tayecanani semi quimoucaitacque den nitananquililis; huan de ompa quicauteuque Jesús huan yajque.

**Nican in saduceos quitajtanielijque
Jesús Temaquixtijque de quenín
panquisas yoltoc itzalan in
ánimajme in talticpacuani**

(Mr. 12.18-27; Lc. 20.27-40)

²³Huan tech ne mismo tonal in taca tamachilejque saduceos motoquijque campa Jesús. Pero yejuan quineltoacacque de que amo huelis se panquisas yoltoc itzalan in ánimajme.

²⁴Huan yejuan quitajtoitijque Jesús ijcuín:

—Tamachtijque, in tanahuatijque Moisés techijcuilohuilij ijcuín: “Tacán se tagat yesqui namicque huan miquisquía huan quicahuasquía nisihuau huan amo quinpiasquíaj coneme, ijcuacán ma monamicti iicniutagat de ne miquet ihuan cahual sihuat ten icuñada. Huan ma quiniscaltican coneme ihuan in cahual sihuat ten icuñada. Huan ma quinpiacan coneme den iicniutagat ten miyic ya”. ²⁵Pues oncaya chicome icnime nican topueblo. Ne icnitzin ten tayecana, yejua ne monamictij ihuan se sihuat pero niman miyic in tagat, huan amo quinpiaque coneme. Huan quicauteu ne isihuau para ocsé icniu. Huan de ompa monamictij ica ome teicniu ihuan icuñada ten miquic ya iyoquich. ²⁶Huan ijcón mochihuac queme ne achtopa, huan ne tenica ome teicniu miyic; huan satepan ica eyi teicniu monamictij ihuan in icuñada. Huan ijcón mochihuac hasta ajsic de chicome icnime; nochí sejsé monamictiyajque huan nochin mictiyajque huan amo aquen quinpiacque coneme. ²⁷Huan queme nochí tamimicque ya in chicome icnime, ijcuacán in sihuat no momiquilij ya.

²⁸Huan in saduceos quilijque Jesús ijcuín:

—Axcan xitechonili, tech ne tonalme cuac panquisasque yoltocque ne

taca den chicome icnime huan ne sihuacahual itzalan in ánimajme, ¿aconi isihuau yesqui senme de ne chicome icnime? Porín nochí in icnime quipouque queme nisihuau.

²⁹Huan ijcón Jesús quinnanquilij ijcuín:

—Nanmocajcayautocque san ica ne nexcuitil, porín amo nanquiequixmatij in Tajcuilolamatzin de Dios, nión no ichicahualis den Totajtzin Dios. ³⁰Porín cuac panquisasque yoltocque itzalan in ánimajme nojón chicome icnime, ijcuacán amo aquen huelis monamictis oc, huan nión no yoltanemilijosque oc que ocsepa monamictis. Porín ompa nochí in tagayot poutosque queme in ángeles ne taquehualme de Dios, huan yejuan amo monamictíaj huan amo no quinnamictisque.

³¹Huan cachi oc namechnextilía de ne tonal cuac panquisasque yoltocque in ánimajme: Achá namejuan amo queman nanquileerojtinemij tech in Tajcuilolamatzin de Dios ten technojnotza ijcuín: ³²“Nejuatzin ni Dios de Abraham huan ni Dios de Isaac huan ni Dios de Jacob”. Huan nijín quijtosnequi que Totajtzin Dios amo in Dios den ánimajme. Ta, Yejuatzin in Dios ten naconime yoltocque.

³³Huan cuac in tagayot quicacque nijín nexcuitil, ijcuacán yejuan semi quimoucaitacque den itanextililis de Jesús.

**Nican quitajtanielijque Jesús
Temaquixtijque catiyejua in cachi
hueyi tanahuatil de Dios**

(Mr. 12.28-34)

³⁴Huan cuac in fariseos quicacque huan quimatque de que Jesús quintentamatilij in saduceos, ijcuacán mosentilijque in fariseos huan moixejecoltijque. ³⁵Huan se fariseo no catca taixejecoque ica in tanahuatil de Moisés no quinequía quichtacahuis Jesús huan quitajtoitij ijcuín:

³⁶—Tamachtijque, ¿catijejua in tanahuatiltzin in cachi hueyi de nochi?

³⁷Huan in Jesús quilij ijcuín:
—“Xictasojta mohueyitecotzin Totajtzin Dios ica nochi moyolo, huan ica nochi motanejnequilis, huan ica nochi motanemililis”. ³⁸Yejua ya nijín in cachi hueyi tanahuatil huan de cachi cuica hueyi chichualis.

³⁹Huan ica ome tanahuatil monehuilía queme ne achtopa tanahuatil huan no quijtoa ijcuín: “Xictasojta mocniztin ijcón queme tejuatzin timotasojta”.
⁴⁰Ica nijín ome tanahuatilme tejuan ticajscamatij toni quijtosnequi nochi ne tanahuatil ten quijcuiloy in Moisés huan nochi ten tenextiliayaj ne tanahuatiani de Dios.

Nican Jesús Temaquixtijque quintajtanilij in tacaquini de ne Cristo, ¿Yeuatzin teconeu de aconi?
(Mr. 12.35-37; Lc. 20.41-44)

⁴¹Huan nijín fariseos sen yetoyaj oc ihuan in Jesús huan in Jesús quintajtolitij ijcuín:

⁴²—¿Toni nanquiyolnemilíaj de naquen monotza Cristo Temaquixtijque? ¿Ne Cristo aconi itatuan?

Huan yejuan tananquilijque ijcuín:
—Ne Cristo Yeuatzin ne teconeu de ne huejcau rey David.

⁴³Huan Jesús quinilij ijcuín:
—¿Quenín huelisquía in rey David quipiasquía in Cristo Temaquixtijcatzin queme iconeu, huan ma no quintonzasquía in Cristo queme itayecancatzin? Porín in rey David quijcuiloy tech in Tajcuilolamatzin ijcuín:

⁴⁴Huan in Totajtzin Dios quinojnotzaya Totayecancatzin in Totecotzin huan quiliaya ijcuín:
“Ximosehuijtzino nican noyecmacopaca huan niquintaliti mometzampa nochi ne naquen mitzonyoltahuelitaj”.

⁴⁵Huan no Jesús quinilij ijcuín:
—Xicmatican que ne rey David quipohuac in Cristo queme iconeu den David, huan no in rey David quimohuiscanotzaya in Cristo queme itayecancateco.

⁴⁶Huan ijcuac ne tonal amo aquen huelic oc quinanquilij ten Jesús quintajtolitaya, huan nión se moixehuij oc de que ma quitajtolitij oc Jesús ocsequi matájtanti.

Nican tajtoa de queniu Jesús Temaquixtijque quinteluliaya in tanextiliani den tanahuatil de Dios
(Mr. 12.38-40; Lc. 11.37-54; 20.45-47)

23 Huan ijcón in Jesús quinojtzac in tagayot huan no ne imomachtijcahuan huan quiniliaya ijcuín:

²—In tanextiliani huan in fariseos mopohuaj ya de que yejuan san quipíaj in chichualis huan in tamachilis para quinajsicamatiltis que in tagayot in tanahuatil de Moisés. ³Huan ica nojón xiquintacamatizan huan xicchihuacan nochi ten namechilíaj in tanextiliani. Pero amo xicchihuacan in tachihualisme ten ne tanextiliani quichihuaj, porín yejuan tanextilíaj ica se taman ten cuali pero amo quichihuaj ten cuali. ⁴Huan in tanextiani huan in fariseos quintalilíaj in tagayot in tanextililisme queme se ohuicayot ten semi etic ten amo huel quixicosque. Huan no ne quinchihualtíaj in tagayot ma no quinmamaltican nijín taman tanextililis de semi etic. Huan yejuan in tanextiliani huan in fariseos amo no quinequíaj momaolinisnequij para quinpalehuisque in tagayot den ne eticayot ten semi ohui. ⁵Huan nochi nijín quichihuaj in tanextiliani huan in fariseos sayó para ma mohueyinectinemican inixpan in tagayot. Huan yejuan sayó cuelitaj cuicasque sequin cuetaxme patauque

campa ixnesi in Tajtoltzin de Dios huan moixcuatalilíaj huan momolictalilíaj. Huan no cuelitaj motaquentisque ica nintilma sentanequistoc ten cualtzin ten xojxochiyo ica icpat, huan sayó para que ma quinitacan in tagayot.

⁶Huan yejuan no quinequij de que ma yetocan campa cachi cualtzin cuac tatacuatij. Huan no semi quinequij motalisque tech in tiopan de judíos campa ne mosehuíaj in hueyi chihuanime de ne taixpampa. ⁷Huan no semi quinequij que in tagayot ma quinmohuiscatajpalocan tech in ojme, huan ma quinpohuacan de que melau tanextiliani.

⁸Huan cachi oc Jesús quinilij nijín tacaquini ijcuín:

—Namejuan ten nechtoctilíaj, amo no ijcón xicchihuacan nión no ximotecahuilican de que ma namechpohuacan in tagayot queme tamachtiani. Porín namejuan nochi nanicnime san, huan nanquipíaj sayó se Namotamachtijcau, huan Yejuatzin ne in Cristo Temaquixtijque. ⁹Huan amo no xicpohuacan nican talticpac nión aquen queme se Namohueyitajtzin, porín namejuan nanquipíaj ya ne se Namohueyitajtzin ne ten yetica nepa eluiyactzinco. ¹⁰Huan amo no ximotecahuilican ma namechpohuacan queme nantayecanani, porín sayó in Cristo Temaquixtijque Yejuatzin in Namotayecancau. ¹¹Huan naquen quintequitilí ocsequin tocnihuan, yejua ne cachi hueyi chiuque namohuan. ¹²Huan naquen mohueyueyichihuas, yejua ne Dios quitziquitzintiltis; huan naquen motziquitzintiltis, yejua ne Dios quihueyichihuas.

¹³Huan Jesús ocsepa quinnejmachtij ijcuín:

—Semi nanteicneltijque, namejuan nantanextiliani huan namejuan nanfariseos, porín nannochin

nanixcucueptocque san de namotamachilis. Porín namejuan nanquintzajtzacuilíaj in yec ojtí para ma in tagayot ma amo calaquican campa Dios momasoutoc ica ihueyichichualis. Huan namejuan nión no nanquinequij nancalaquisque. Ta, sayó nanquintzajtzacuilijtocque san ne naquen quinequij calaquisque. ¹⁴Semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis; porín namejuan nanquincuilíaj nican ne sihuacahualme. Huan no nanmotatautilíaj ihuan Dios ica míc tajtolme para ma amo ixnesi que namejuan nantecalculiani. Ica ya nojón ya namejuan nanquiselisque ten cachi hueyi tatzacuilitis. ¹⁵Semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis. Porín namejuan nantayohualojtinemij nohuiyampa campa hueyíat, hasta nochi campa tzintami in talticpac para nanquinchihuasque ma ocsequin in tagayot ma taneltocacan ijcón queme namejuan nanmohuicaj. Huan namejuan cuac ijcón nanquichihuaj, ijcuacón ne tagat ten yequin taneltoaca queme namejuan, yejua ne quinamiqui ma ipan huetzi se chichahuac tatelechihualis ya cachi hueyi huan que namejuan nanquiselisque.

¹⁶Huan no Jesús quinilij ne tacaquini ijcuín:

—Huan semi nanteicneltijque namejuan, porín namejuan sayó nanixpojpopoyome huan nanquiyecanasnequij in ocsequin. Huan namejuan nanquinilíaj ijcuín: “Tacán acsá de namejuan moyectencahua de que quichihuas tensá huan quitenehua

que: Quitztica in tiopan de Dios, yejua ne amo monequi quichihuas ten moyectencahuac ya. Pero tacán se tagat quitenehua que: Quitztica in tomin de oro ten ne yec yetoc tech ne tiopan de Dios, ijcuacán yejua nojón monequi quichihuas”.

¹⁷Namejuan nanmijmiquilome san huan nanixpojpopoyome san. ¿Catiyejua cachi monequi, yej nijín tomin de oro, oso yej nijín in tiopan de Dios ten quimohuisyotilía ne tomin de oro?

¹⁸Huan no nanquijtoaj ijcuín: “Tacán acsá de namejuan moyectencahua de que quichihuas tensá huan quitenehua que: Quitztica in altar de ne taixpan tech in tiopan de Dios, ijcuacán yejua ne amo monequi quichihuas. Pero tacán se tagat moyectencahuas de que quitenehuas que: Quitztica in tomin ten monechicoa ipan in altar, ijcuacán yej nojón semi monequi ma quichihuas porín moyectencahuac ya”.

¹⁹Huan namejuan nanmijmiquilome huan nanixpojpopoyome san. ¿Catiyejua cachi monequi, cox yej in tomin ten monechicohuaj, oso yej nijín altar ten quimohuisyotilía ne tomin? ²⁰Huan ne naquen quitenehua ma “Quitztica in altar”, no quitenehua ma quitztica nochi ten quipía in altar. ²¹Huan naquen quitenehua ma “Quitztica ne tiopan de Dios”, amo yejua san ne tiopan de Dios. Ta, no quitenehua Totajtzin Dios ten calyetica ompa. ²²Huan ne naquen quitenehua ma “Quitztica ne eluiyatzinco”, yejua ne no quitenehua de que ma quitztica ne campa tanahuatijtoc in Totajtzin Dios; huan no quitenehua de que ma quitztica Totajtzin Dios ten ompa yetica.

²³Huan no Jesús quinilij in tacaquini ijcuín:

—Huan semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de

namotamachilis. Namejuan nanquimactilíaj Dios ne namodiesmo den xiutzitzin san ten cualtíaj para tacualis huan pajti, queme menta huan anis huan cominos. Pero nanquiseocahuaj in tanextilisme ten cachi hueyi tech in tanahuatil de Moisés. Nanquiseocahuaj in chipaucanemilis, huan ne teyolicnelilis huan ne tacuautamatilis. Huan yejua nijín monequi ma xicchiuacan huan amo xicchiuacan de que amo nanquitemactisque namodiesmo.

²⁴Namejuan nanixpojpopoyome pero nanquinequij nantayecanasnequij. Huan namejuan nanquinnejhuilíaj queme se tagat ten cuac tayi at, ijcuacán achto quiquixtilía moyotitzin nijín at huan amo momaca cuenta de que cox yetoc se caballo aijtic.

²⁵Huan semi nanteicneltijque, namejuan nantanextiliani huan namejuan nanfariseos, nanochin nanixcucueptocque san de namotamachilis. Namejuan nanquinejhueilíaj queme in vasos huan caxme ten quichipahuaj panían san huan tajtic temitoc míac pitzotic. Huan no ijcón namejuan nanmochijchipautocque san panían san, pero tech namoyolijtic nanpexontocque ica míac tenesi tanemililis den tachtequilis huan pitzotachihualis.

²⁶Namejuan nanfariseos nanixpojpopoyome, cachi cuali achtopa xicchijchipahuacan tajtic in vasos huan in caxme ten quipía míac pitzotic, huan ijcón mocahua nochi chipahuac ten panían huan ijcticpa no.

²⁷Huan no Jesús quinilij in tacaquini ijcuín:

—Huan semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis. Nanquinehuilíaj queme ne cualtzin pochicticque tepancalme

ten campa ne toctocque in ánimajme. Porín yec melau ne tepancalme campa yetocque in ánimajme motaj nochi cualtzin istacque, pero tajtic pexontoc nochi omicojcotol den ne ánimajme huan temitoc mías pitzotic. ²⁸Huan no ijcón namejuan yec melau ten nanmotaj semi nanyolcualtaca ihuan in tagayot, huan namoijticipa pexontoc de tacajcayahualis huan mías tenesi pitzotic. ²⁹Huan semi nanteicneltijque, namejuan nantanextiliani huan namejuan nanfariseos, nannochin nanixcucueptocque san de namotamachilis. Huan namejuan nanquinchijchiuilfaj ne tepanme campa talpachiutocque in ánimajme ten tanahuatiani de Dios. Huan no nanquicualnextíaj nanquioxjochiyotíaj in tepanme campa talpachiutocque in ánimajme den taca ten catcaj yolcualime den taneltocani. ³⁰Huan namejuan nanquijtoaj ijcuín: “Tacán tejuan tinemisquíaj tech ne tonalme cuac nemicoj totayecancatatuan, ijcuacán amo titapalehuisquíaj para ma quinmictianij ne tanahuatiani de Dios”. ³¹Huan ica nijín tajtolme nancajsicamatque ya namejuan mismo huan nanmoyectenextíaj ica namotajtoluan de que namohuejcautatuan quinmictijque ne tanahuatiani. Huan namejuan no nanteconejuan de namohuejcautatuan huan nanquichihuasque ijcón queme quichiuque namotatuan. ³²Ica ya nojón xictamichihuacan ya axcan ten ne achtopa quichiuque namotayecancatatuan. ³³Namejuan nantajcayahuanani san huan nannemij queme cohuame huan queme tepiluan de cohuame. ¿Quenín ijcón huelis nanmopalehuisque huan nanmomaquixtisque de ne hueyi tatlchihualis ten namechuicas mictan? ³⁴Huan ijcón ocsepa Jesús quinilij ijcuín:

—Ica ya nojón namechinualtitanilis sequin tanahuatiani de Dios, huan sequin tamachilejque de Dios, huan tanextiliani den yancuic tanahuatil de Dios. Pero namejuan nanquinmictisque huan nanquincououpampilosque, huan ocsequin nanquinitequisque tech in tiopan de judíos. Huan no nanquintahuelitasque huan nanquincalanquixtisque cada se pueblo campa ajsisque.

³⁵Ica ya nojón namotech huetzis ne tatzacuilitis de Dios, porín nanquinmictijtinenque ya nohuiyan nijín taca naquen chipaucanemíaj. Huan nanquinmictijtinenque in yolcualime desde ne achtopa tonal cuac quimictijque ne Abel ten yolchipahuac catca, huan hasta campa nemico in Zacarías teconeu de Berequías, naquen quimictijque ne tiopanijtic campa ne altar tamohuisyojcan. ³⁶De yec melau ten namechilía que in tatzacuilitis de Dios ninpan huetzis in tagayot den axcan nemij. Huan huetzis ne hueyi tatzacuilitis de Dios porín ne tajtacol de namejuan huan porín ne tajtacol de namotayecancatatuan temictiani.

**Nican tajtoa de queniu Jesús
Temaquixtijque quinchoquilía in
pueblojuani de Jerusalén**

(Lc. 13.34-35)

³⁷Huan Jesús quinilij ijcuín:
—Namejuan nanopueblojuani de Jerusalén, namejuan nanquinmictíaj in tanahuatiani de Dios, huan nanquintepoxoníaj ne itanojnotzcahuan de Dios, naquen Dios namechualtitanilij. ¿Canachpa nicnequíá namechsentilis para namehyecanas namejuan, nanopueblojuani de Jerusalén? Huan no nicnequíá namechpalehuisquíá ijcón queme in piotapachojque quinsentilía nipiluan yej tapaltampa, huan amo nanquinecque ma namechpalehuis. ³⁸Xiquitacan,

namejuan, Dios namechsencahuac ya axcan, namejuan namochancahuan huan namopueblojcahuan. ³⁹Huan no namechilá que amo queman nannechitasque oc. Ta, sayó ijcuac ne tonal cuac namejuan nanmoyolnemilisque huan nannechilisque de Nejuatzin ijcuín: “Tejuatzin Tiontatiochihual de Dios, huan tihualajtoc itencopa Tohueyitayecancatajtzin Dios”.

**Nican Jesús Temaquixtijque
quinnejmachtij in tacaquini de que
cueuelos in hueyi tiopan de judíos
de Jerusalén**

(Mr. 13.1-2; Lc. 21.5-6)

24 Huan ijcón cuac Jesús quisteu den tiopan de judíos huan yaya ocseco, ijcuacán motoquijque imomachtijcahuan huan quinequáfaj quinextilisque in hueyi mohuistic tiopan huan ne tepan calicxime ten cualtzitzin. ²Huan Jesús quinnanquilij ijcuín:

—Namejuan nanquitztocque nochi nijín, pero de yec melau ten namechilá que nican campa tiopan amo teyi mochahuas oc, nión se tet ten nanquijaj axcan sajsaliutocque huan nejnepaniutocque huan que amo huejuelihuisque oc.

**Nican Jesús Temaquixtijque
quinmachtij imomachtijcahuan
de ne nescayome cuac in talticpac
tajyohuis ya huan cuac ne
tacuitapan tonalme**

(Mr. 13.3-23; Lc. 21.7-24; 17.22-24)

³Huan ijcón in Jesús yajqui motalito tech ne tal lomojtzin ten monotza Olivos, huan imomachtijcahuan quichtacanojnotzacoj huan quilijque ijcuín:

—Xitechonili, ¿quemán huejuelihuis nijín tiopan calicxime? ¿Huan toni nescayome oncas cuac Tejuatzin

timohualuicas nican talticpac, cuac tamis ya in talticpac?

⁴Ijcuacán in Jesús quinnanquilij ijcuín:

—Ximoyecpiacan huan ma amo aquen namechyolcaycayahua tech namotaneltocalis. ⁵Porín hualasque míac tacajcayahuani huan ijcón míac quincajcayahuasque, porín yejuan quijtojtinemisque ijcuín: “Nejua ya ni Cristo Temaquixtijque”, huan ijcón miacque quincajcayahuasque. ⁶Huan namejuan cuac nanquicaquisque den ne tehuilis huan cuac ongas míac moucayot de ne tehuilis, ijcuacán amo ximoyolmoutican, porín ipa ijcón monequi ma mochihua; pero no xicmatican que ayamo yej ne in tamilis den talticpac. ⁷Huan tech ne tonalme pehuas moajocuisque pueblojuani huan motehuisque se huan ocsé pueblojuani, huan in tagayot den se país moajocuisque huan motehuisque se huan ocsé tagayot. Huan oncas míac cocolis huan míac máyanti huan talolinilis; huan nochi nijín mochihuas nohuiyampa tech in senmanahuac. ⁸Huan cuac nochi nijín mochihuas ya, yej ne quijtosnequi que yequin peutiu mochiutiu hueyi tajyohuilis para nochi in talticpacuani. ⁹Huan ijcuac ne tonal namechtemactisque para ma namechcojocan huan para ma namechmictican. Huan nochi in tagayot ten amo taneltocaj, yejuan ne namechtahuelitasque porín namejuan nanyectacuatamatij nohuan itech notocaytzin. ¹⁰Ijcuacán ne tonalme miacque taneltocani quipolosque nintacuatamatilis de Nejuatzin nohuan. Huan se huan ocsé motahuelitzinemisque, huan se huan ocsé motemactisque ihuan in tequihuani tech ne nimpueblojuan. ¹¹Huan miacque monextisque naquen xolopijtijtinemisque huan quijtojtinemisque que yejuan ya

tanahuatiani de Dios huan ijcón quincajcayahuasque miacque taneltocani. ¹²Huan ijcón momiactilis míc ten amo cuali tachihualisme, huan ica nojón miacque taneltocani quicahuasque ne tasojtalis se huan ocsé. ¹³Pero naquen quisentocas yec tacuautamatis itech Cristo, hasta ne tonal cuac tamis in talticpac, yejua ne quipías ne maquixtilis. ¹⁴Huan cuac motamitetapohuis ya tech nochi senmanahuac nijín yancuic Tajtoltzin de que Dios momasoutoc ica ihueyichicahualis, huan no cuac quintaminejmachtisque ya nochi in talticpacuani, ijcuacón ximatican que ejcotihuitz ya in tamilis den talticpac. ¹⁵Huan naquen quileeroa nijín Tajcuilolamatzin de Dios den tanahuatijque Daniel, monequi ma cajsicamatican. Porín in tanahuatijque Daniel, yejua ne queman ya quijtojca de que nanquitasque que mochihuas ya ne tetzaucapolihuilis campa amo monequía yetosquía, ten quitzojcuilotía ompa tech in tiopan de Dios.

¹⁶Huan no ijcón Jesús quinilij imomachtijcahuan ijcuín:

—Huan nochi ne naquen calyetosque tech ne Judeajcopaca, yejua nojón monequi ma cholocan, huan ma yacan huan ma motatican campa ne tepepan. ¹⁷Huan ijcón ne naquen yetosque calcuaco den nichan, ma amo temo oc para calaquis ichan huan quixtis tensá ten niaxca. ¹⁸Huan ijcón ne naquen yetosque itequitiyan, ma amo no quinemilican de que mocuepacan inchan de que ma quicuiti nintilma. ¹⁹Huan cachi teicneltijque in sihuatzitzin ne ten cocoxcayetosque ica pili; huan teicneltijque sihuatzitzin ne naquen tachijchitijtosque ica coneme itech ne tonalme. ²⁰Ica ya nojón ximotatautilican ihuan Dios que ne tonal cuac monequis nancholosque, ma amo namechajsi cuac taseseyas,

oso cuac ne tonal de nesehuilis cuac amo quitechahuiliaya ma nejnentosque.

²¹Porín ne tonalme oncas cachi hueyi tajyohuilis ten amo queman nanquitacque desde cuac tzinpehuac in talticpac. Huan amo queman oncas oc satepan ocsé tajyohuilis queme nijín ten nanquipanosque. ²²Huan queme in Totajtzin Dios amo quitocotzos oc in tajyohuilis de ne tonalme, ijcuacón amo aquen huelis maquisas. Pero Totajtzin Dios quitocotzos in tajyohuilis de ne tonalme porín Dios quintasojta naquen Yejuatzin quinijitac ya ma pohuican ihuantzin. ²³Huan tacán acsame namechilisquía ijcuín: “Xiquitacan, nepa yetoc in Cristo Temaquixtijque”, oso namechilisque: “Xiquitacan, tiyohue tiquitatij campa yetoc in Cristo Temaquixtijque”, pero amo xiquinneltoquilican ne tacajcayahuani. ²⁴Porín miacque tacajcayahuani moajocuisque huan hualasque huan quijtojtinemisque que yejuan in Cristo Temaquixtijque huan yejuan tanahuatiani de Dios. Huan yejuan quichihuasque miacque mohuiscatequit huan no quichihuasque tatiochihualisme ica mohuisyot, para que ijcón cachi huelis quincajcayahuasque in taneltocani. Huan achá no quincajcayahuasque hasta itajitaluan de Dios. ²⁵Huan nochi nijín namechilía ya achtopa que mochihuas.

²⁶Huan no Jesús quinnextiliaya imomachtijcahuan ijcuín:

—Ica ya nojón como namechilisque in tacajcayahuani ijcuín: “Tiyohue tiquitatij in Cristo, nepa yetoc campa tayiucan”, amo xiyacan. Oso no namechilisque: “Tiyohue tiquitatij ne calijitc porín ompa yetoc in Cristo”, pero amo no xiquinneltoquilican nojón tacajcayahuani. ²⁷Huan ijcón queme nanquitaj de que tapetani ica ne ticohuat nepa iquisayampa tonal huan

tamiti hasta ipolihuiyampa in tonal, no ijcón Nejuatzin nannechitasque tech ne tonal cuac Nejuatzin ni Yectagatzin nimohualuicas nican talticpac.²⁸ No ijcón campa yesqui huetztos se miquet, no ompa mosentilfaj míc tzojpilome. Porín tzojpilome cuali quimatij can huetztoc in miquet huan ompa moijsiucasentilfaj. Ximatican de que no ijcón mosentilijtihuetzisque notaneltocacahuan cuac Nejuatzin ni Cristo nimohualuicas nican talticpac.

**Nican Jesús Temaquixtijque
quinmachtij imomachtijcahuan de
ne tonal cuac mohualuicas nican
talticpac Yejuatzin in Yectagatzin de
Dios**

(Mr. 13.24-37; Lc. 21.25-33; 17.26-30, 34-36)

²⁹Huan no Jesús quinnextiliaya imomachtijcahuan ijcuín:

—Huan ijcón tech nojón tonalme nimanpa den ne hueyi tajyohuilis, ijcuacán in tonaltzin tayohuayantis huan amo tanextis oc, huan in metzti amo no tahuis oc, huan in sitalinme tepehuisse den eluiyac. Huan in chicaucatayecanani de nemij ne ejecaixco, yejuan nojonques Dios quintzetzelos.³⁰ Huan ijcón nanquitasque ne ejecaixco se nescayot den ica monextilis de que nihualajtoc ya Nejuatzin ni Yectagatzin. Ijcuacán nochi in talticpacuani mochoctisque huan nechitasque nejua ni Yectagatzin cuac Nejuatzin nihualajtos ya mixtzalan tech ne ejecaixco, huan cualtzin nipetantihualas ica in hueyi chicahualis.³¹ Huan in Dios quinqualtitanis in ángeles taquehualme de Dios ica se hueyi tzajtzilis den tapitz, huan ijcón quinsentilisque nochi ne notajitaluan nochi tech in se manahuac desde campa tzinehua in talticpac huan in eluiyac huan hasta ne campa tzintami.³² Namechilía de que ximoyecajsicamatiltican de nijín

nexcuitil den higoscuhuit. Huan cuac nanquitasque que cualtzin maxoxohuixtoc ya in higoscuhuit, ijcuacán nanquimatisque ya de que ejcotoc ya in tonalme den tatotoncayot.³³ Huan ijcón cuac no nanquitasque de que mochiutoc ya nochi nijín nescayome ten namechiluijca ya ne achtopa, ijcuacán ximatican que niyetoc ya caltenteno ya para nihualas nican talticpac.³⁴ De yec melau ten namechilía de que nochi nijín nescayome mochihuas achtopa ya de que miquisque in tagayot ten axcan nemij.³⁵ Huan masqui in talticpac huan in eluiyac tajtamis, pero notajtolztitzin amo queman tamis.

³⁶Huan no Jesús quinilij imomachtijcahuan ijcuín:

—Huan ijcuac ne tonal de nohualalis amo aquen quimatis. Hasta itaquehualuan de Dios in ángeles ten yetocque ne tech eluiyac amo no quimatij de ne tonal cuac Nejuatzin nimohualuicas. Ta, sayó quimatos Tohueyitajtzin Dios.³⁷ Huan ijcón queme ne tonal cuac nemico in tanahuatijque Noé, no ijcón mochihuas cuac Nejuatzin nimohualuicas ni Yectagatzin.³⁸ Huan tech ne tonalme cuac nemico Noé achtopa que hualasquía ne hueyi tetzaucaquihuit, ijcuacán nochi in tagayot tatacuajtoyaj san, huan ocsequin motahuantijtoyaj san. Huan in ocsequin tetatme huan tenanme quinijsantoyaj san ne teichpochuan para ma monamictican. Huan ijcón mochiutihualaya hasta cuac Noé calayic tech in hueyi barco ten monotza arca.³⁹ Huan in tagayot amo quineltoacacque de que hualasquía ne tetzaucaquihuat. Pero satepan cuac huala ya, ijcuacán nochi quiniuyac huan moaelsimijque. Huan ijcón no tech ne tonalme ijcón yesqui, cuac nimohualuicas Nejuatzin ni Yectagatzin.⁴⁰ Huan tech ne tonalme

tequititosque ome taca tech in mila, huan se tequitique Dios cajocuis huan ocsé mocahuas. ⁴¹Huan no ijcón ome sihuame yetosque campa molino tixcuechojtosque, huan se sihuat Dios cajocuis huan in ocsé mocahuas. ⁴²Ica ya nojón ya xiyecyectocan huan xitachixtocan, porín amo nanquimatij toni horas hualas Namotayecancateco Jesucristo. ⁴³Huan xicmatican nijín: Tacán quimatisquía in tetat de que toni hora hualasquía in tachteque, ijcuacán ne tetat achá moyejyectalijtosquía, huan ijsatosquía, huan amo mocahuasquía ma quicaltapocan para quitachtequisque. ⁴⁴Ica ya nojón ya namejuan no ximoyejyectalijtocan, porín Nejuatzin ni Yectagatzin nimohualuicas ya cuac namejuan amo nanyoltanemilijtosque nión no nannechchixtosque.

Nican Jesús Temaquixtijque quitalij se nexcuitil de ne taquehual ten yolcuali huan ocsequin ten amo yolcuali

(Lc. 12.41-48)

⁴⁵Huan ijcón in Jesús quinmachiya imomachtijcahuan ica nexcuitil ijcuín:

—Huan axcan namechtapohuiti de se taquehual ten yolcuali huan ten cuatamatque. Huan nipatrón de ne taquehual den tatequitiltijque den ocsequin taquehualme, huan ma yejua tanahuati ma quintamacacan cuac ne hora de tacualis. ⁴⁶Huan ijcón ne tayecancataquehual tatíochoihual yesqui porín cuac ejcos nipatrón, ijcuacán cajsiquiu quichiutoc ten quinajnahuatijteu. ⁴⁷De yec melau ten namechilía, ne patrón quicahuilis ne itayecancataquehual ma yejua quinyecana in ocsequin taquehualme huan nochi ne ten niaxca. ⁴⁸Pero no namechtapohuiti de se tayecancataquehual ten amo yolcuali. Huan moyolíaya yejua

san ijcuín: “Nopatrón huejcahuati huan amo niman ejcos”. ⁴⁹Ijcuacán ne tayecancataquehual pehuac quintajyohuiltía in ocsequin taquehualme, huan no pehuac tatacuati san, huan no pehuac tahuana ihuan in tahuhanani. ⁵⁰Huan ijcón in patrón ejcoc tech ne tonal cuac ne itayecancataquehual amo quichixtoc, porín yejua amo quimatía toni hora ejcosquía nipatrón. ⁵¹Huan ijcón in patrón quichicaucatzacuilitis ne taquehual ten amo yolcuali. Huan quitelchihuas, huan quititanis ma tajyohuiti ihuan ne taca ten ne yolcucuepme san. Huan ompa chocatosque huan tannanatzocatosque tech ne tajyohuilis.

Nican tajtoa de que Jesús Temaquixtijque quitalij se nexcuitil den májtacti ichpochme

25 Huan ijcón in Jesús quinilij imomachtijcahuan ocsepa se nexcuitil ijcuín:

—Nicnejnehuililtía májtacti ichpochme queme ichicahualis de Dios cuac Yejuatzin momasoutoc ica ihueyichicahualis se iyolijtic. Huan nijín májtacti ichpochme quicuicque ne nintahuiluan huan quisque para quinamiquito ne teyoquich ten monamicititi ya. ²Huan macuilime ichpochme catcaj yec tanemiliayaj, huan in ocsequin macuil ichpochme amo yec tanemiliayaj. ³Huan in macuilime ichpochme ten amo yec tanemiliayaj, yejuan quicuicque nintahuiluan huan yajque huan amo cuiyacque míac gas para ocsepa quinpexontisquíaj nintahuiluan cuac tamisquía in gas. ⁴Huan in macuil ichpochme naquen yec tanemiliayaj, yejuan nojonques quicuicque nintahuiluan huan no cuiyacque míac gas para ocsepa quinpexontisquíaj nintahuiluan. ⁵Huan in teyoquich

semi huejcahuac para ejcos; huan ne ichpochme yejuan mocuahuihuicayaj ica cochilis huan niman ixcojcochíaj.

⁶Huan ijcón ne tajcoyohuan ya cuac mocayic se tzajtzielis, ijcuacán quijtoayaj ijcuín: “Pon huitza ya in teyoquich; niman xiquisacan xiyacan huan xicnamiquitij porín Yejuatzin hualajtoc ya”. ⁷Huan ijcón nochí ne ichpochme meuque huan moquetzque huan peuque quixotaltía nintahuiluan.

⁸Huan in macuil ichpochme ten amo yec tanemiliayaj, yejuan quinilijque in ocsequin ichpochme ijcuín:

“Xitechonmacacan sequin namogas porín tejuan totahuiluan sehuisnequij porín tamíc ya in gas”. ⁹Ijcuacán in macuil ichpochme ten yec tanemiliayaj, yejuan tananquilijque ijcuín: “Amo huelis tamechmacasque porín tacán tamechmacaj, ijcuacán amo no ajsis para tejuan. Cachi cuali xiyacan campa quinamaca huan ompa xicohuacan para namejuan”. ¹⁰Pero cuac yajque ya quicohuatoj ya ne in gas ne macuil ichpochme ten amo yec tanemiliayaj, ijcuacán ejcóc ne teyoquich. Huan in macuil ichpochme ten yec tanemiliayaj huan ten moyejyectalijque ya, yejuan calacque ihuan ne teyoquich campa nenamictilis. Huan niman quitzacuacque in puerta. ¹¹Huan cachi satepan ejcócque ne ocsequin macuilime ichpochme ne ten amo moyejyectalijtoyaj huan quijtoayaj ijcuín: “Totecotzin, Totecotzin, xitechontatapohuili”. ¹²Huan ne teyoquich quinnanquilij ijcuín: “Yec melau ten namechilía que amo namechixmati aconí namejuan”.

¹³Huan ijcón in Jesús quintaminojnotzac ya in tagayot huan quinilij ijcuín:

—Amo xicchihuacan queme ne ichpochme ne ten amo yec tanemiliayaj. Ta, xijsatocan huan xitatachixtocan porín amo nanquimatisque

catijejua tonal nión catijejua hora nimohualucas Nejuatzin ni Yectagatzin.

Nican Jesús Temaquixtijque quitilij se nexcuitil de ne huelilisme ten quinejnehuilía queme in tomin

¹⁴Huan Jesús quinilij imomachtijcahuan ijcuín:

—Nicnejnehuililtía se patrón queme ichicahualis de Dios cuac Yejuatzin momasoutoc ica ihueyichicahualis se iyolijtic. Huan ne patrón quinemilijtoc de que paxolotiu tech ocsé pueblo. Huan cuac ejcóc ya in tonal de que quisas ya, ijcuacán quinnotzac itaquehualuan huan quinmajmactilijtehuac nitomin cada se taquehual. ¹⁵Huan senme de ne taquehualme quimactilij macuil mil monedas de istac tomin; huan ocsé quimactilij ome mil; huan in ocsé quimactilij se mil. Huan yejua ijcón quinmactilij in tomin ijcón queme quinitac de cada se den quipíayaj huelilis para tequitisque. Huan de ompa in patrón yajqui paxaloto huejca tech ocsé país. ¹⁶Huan in taquehual ten quiselij in macuil mil monedas de tomin, yejua ne quicuic in tomin huan yajqui quitequitiltito ne tomin huan quitanic ocsé macuil mil monedas de tomin. ¹⁷Huan no ijcón ne taquehual ten quiselij ome mil monedas de tomin, no ijcón quichihuac huan quitequitiltito ne tomin huan quitanic ocsé ome mil monedas de tomin. ¹⁸Huan ne taquehual ten quiselij se mil san, yejua nojón yajqui tachcuato huan ompa quipantalito in tomin den quimactilijca ya nipatrón. ¹⁹Huan panoc mías tonalme huan ijcón mocuepac ne inpatrón de ne taquehualme, huan quinemilij in patrón quitepotztocati nijín tahuicalis de ne eyi taquehualme. ²⁰Huan ijcón mochihuac que achtopa ejcóc in taquehual ne den quiselijca macuil mil monedas huan quimactij

nipatrón ocsé macuil mil ten quitanic ya huan quilij ijcuín: “Notecotzin, tejuatzin tinechonmactilijca macuil mil monedas de tomin, pero nican yetoc ocsé macuil mil ten nictanic ya”.²¹ Ijcuacán in patrón quinanquilij ijcuín: “Cuali yetoc, tejuatzin, titaquehual den semi tiyolcuali huan cuali titequitique, porín cuali tictequitiltij ya in tepitzin in tomin ten nimitzmactilijteuca ya. Ica ya nojón tejua nimitztalis tinotayecancataquehual, huan yequintzin xipano tech nochantzin huan cuali ma tisentequitican huan ma timosenpanyolpactican”.²² Huan de ompa ejcóc in taquehual ten quiselijca ome mil monedas huan quilij ne ipatrón ijcuín: “Notecotzin, tejuatzin tinechonmactilijca ya ome mil monedas, pero axcan nican nimitzualcuilía ocsé ome mil ten nictanic ya”.²³ Ijcuacán in patrón quinanquilij ijcuín: “Cuali yetoc, tejuatzin, titaquehual ten semi tiyolcuali huan cuali titequitique porín cuali tictequitiltij ya in tomin masqui tepitzin san ten nimitzmactilijteuca. Ica ya nojón nimitztaliti tejua tinotayecancataquehual. Huan yequintzin xipano tech nijín nochantzin huan cuali ma tisentequitican huan ma timosepanyolpactican”.²⁴ Huan de ompa ejcóc ne taquehual ten quiselijca se mil san monedas de tomin huan quilij ne ipatrón ijcuín: “Notecotzin, nejua nicmatía que tejuatzin chichahuac tiquitequitiltía motaquehualuan, huan tejuatzin nicmatía de que ticajocui taquilome campa amo tictocac huan ticololoa xinach campa amo teyi tictepehuac”.²⁵ Huan nicmohuilij ne chicaucatequit. Ica ya nojón nicuic in tomin huan nicuiyac nictalpachoto tech se talcomit. Huan axcan nican yetoc nijín motomin ten tinechmactilijteuca ya; xiconcui ten moaxca”.²⁶ Ijcuacán in patrón quinanquilij in taquehual ne ten amo yolcuali huan quilij ijcuín:

“Tejua semi titatzu porín ticmatoya ya de que nicajocui taquilome campa amo nictocac, huan nicololoa campa amo teyi nictepehuac”.²⁷ Ica ya nojón cachi cuali xictemacani oso xicalaquiani tech se banco campa notomin huelisquía quitequitiltisquíaj ne taca naquen tiquinmactilisquía. Huan ijcón cuac nimocuepasquía, ijcuacán nicselisquía notomin ihuan ten motanilij ya notomin”.²⁸ Huan ijcón in patrón quinilij in ocsequin taquehualme ijcuín: “Xicuilican de ne tatziu ne se mil monedas de tomin huan xiquinmactilican ne naquen quipía májtacti mil monedas”.²⁹ Huan nochi ne naquen quipíaj in tamachilisme de Dios huan quitequitiltíaj, yejuan nojonques cachi oc Dios quinmactilis. Huan nochi ne naquen quipíaj sayó tepitzin san tamachilisme de Dios huan amo quitequitiltisque in tepitzin san ten quipíaj, yejuan nojonques Dios quitamicuilis ne den tepitzin san ten quipíaj.³⁰ Huan ne taquehual ten tatzihuic nimantzin xicuiyacan huan xicalantamotacan ne campa tayohuayanijtíc huan ma ompa chocato huan ma ompa tannanatzocato tech ne tajyohuilis”.

**Nican Jesús Temaquixtijque
quinmachtij in tacaquini de ne tonal
cuac Yejuatzin quinixcomacas huan
quintelchihuas in talticpacuani**

³¹ Huan no Jesús quinilij imomachtijcahuan ijcuín:

—Huan ijcón Nejuatzin ni Yectagatzin nimohualuicas ica chichahualis queme hueyi chiuque de rey, nechyeualojtihualasque nochi niángeles itaquehualuan in Totajtzin Dios. Huan Nejuatzin nimotalis tech ne nomohuiscasehuilojcan campa ne notaixejecocan huan campa ne no tacualtzincan.³² Huan ijcón in ángeles quinsentilisque nochi in pueblojuani

de nochi pueblojme den talticpac noixpantzinco Nejuatzin. Huan Nejuatzin ni Cristo niquinsejsecotalis se huan ocsé, ijcón queme ne tapixque quinsejsecotalía in ichcame huan in chivos. ³³Huan Nejuatzin ni Cristo niquinyectalis noyecmacopaca in ichcame; huan in chivos niquintalis noopochcopaca. ³⁴Huan ijcón Nejuatzin nitayecanque niquinilis naquen yetosque noyecmacopaca ijcuín: “Xihualacan nohuan namejuan, porín nantatiochihualme den Notajtzin Dios. Huan xicselican nijín yec yetolis nipa eluiyactzinco ten Totajtzin Dios ne campa nanyetosque namejuan. Ipa namechchijchihuilij ya desde ne tonal cuac tzinpehuac in talticpac”. ³⁵Huan Nejuatzin ni Yectagatzin no niquinilis ne naquen yetosque noyecmacopaca ijcuín: “Nejuatzin cuac nimayanaya, ijcuacán namejuan nannechtamacacque. Huan cuac nimocaltajtaniaya, ijcuacán namejuan nannechmacacque can nimocuasehuis. ³⁶Huan no cuac amo nicpiaya notilmajtzin, ijcuacán namejuan nannechtaquentijque. Huan cuac nimococoaya ya, ijcuacán namejuan nannechcalpanotoj. Huan cuac niyetoya cárcelijtic, ijcuacán namejuan nanualajque nannechitacoj”. ³⁷Huan ne naquen yolchipauque quinanquilisque ijcuín: “Totecotzin, ¿catijejua tonal timitzitacque cuac timayancanemía huan timitztamacacque? ¿Huan catijejua tonal timitzitacque cuac tiamiquía huan timitzatiltijque? ³⁸¿Huan catijejua tonal timitzitacque cuac timocaltajtaniaya huan tejuan timitzmacacque can timosehuis? ¿Huan catijejua tonal timitzitacque cuac amo ticpiaya motilma huan tejuan timitztaquentijque? ³⁹¿Huan catijejua tonal timitzitacque cuac timococoaya ya oso cuac tiyetoya tech in cárcelijtic huan tejuan timitzitatoj?” ⁴⁰Huan

in Jesús in tayecanque quinnaquilis ijcuín: “De yec melau ten namechilía que nochi ten yesqui tapalehuilis ten nanquichiuque para nijinques nocnihuan masqui nocnihuan amo quiapiayaj tenica ixpanosque, pero nochi nijín nanquichiuque para Nejuatzin”.

⁴¹Huan no Jesús quinilij imomachtijcahuan ijcuín:

—Huan de ompa in tayecanque quinilis naquen yetosque iopochcopaca ijcuín: “Xicnechtapatahuilican, namejuan den nantatelchihualme ya, huan xiyacan tech ne tit ten amo queman sehuis campa Dios quichijchihuac ya para in amocuali huan para nitaquehualuan. ⁴²Huan ompa xiyacan porín cuac nimayanac, namejuan amo nannechtamacacque. Huan cuac niamiquía, namejuan amo nannechatiltijque. ⁴³Huan cuac nimocaltajtaniaya, namejuan amo nannechmacacque can nimosehuis. Huan cuac nechpoloaya notilmajtzin, namejuan amo nannechtaquentijque. Huan cuac nejua nimococoaya huan niyetoya cárcelijtic, ijcuacán namejuan amo no nannechcalpanotoj”. ⁴⁴Ijcuacán in taca den tatelchihualme quinanquilisque ijcuín: “Totecotzin, ¿quemanía timitzitacque ay timayancanemi oso tiamictinemi oso mitzpoloaya motilma, oso timococoaya, oso tiyetoya tech in cárcel huan amo timitzpalehuijque?” ⁴⁵Huan ijcuacán Jesús in tayecanque quinnanquilis ijcuín: “De yec melau ten namechilía, nochi ten yesqui tapalehuilis ten amo nanquichiuque ihuan nijín nocnihuan ten amo quiapiayaj tenica ixpanosque, no ijcón amo para nejua nanquichiuque. ⁴⁶Huan nochi namejuan den tatelchihualme nantamelahuasque campa ne tatzacuilitis ten amo queman tamis. Huan nochi namejuan den nanyolcualime nantamelahuasque campa ne nemilis nachipa”.

**Nican tajtoa de queniu
moyectencauque in tayecanani
judíos para quiquitzquisque Jesús
Temaquixtisque**

(Mr. 14.1-2; Lc. 22.1-2; Jn. 11.45-53)

26 Huan cuac Jesús
quintaminextilij ya nochi
nijín nexcuitil, ijcuacán quinilij
imomachtijcahuan ijcuín:

²—Huan cuali nanquimatocque ya
que nican ome tonalica mochihuas
iluit den tajyohuilis huan Nejuatzin ni
Yectagatzin nechtemactisque para ma
nechcuoupampilocan.

³Huan ijcón in tayecanani tiopixcame
huan in tanextiliani den tanahuatil
de Moisés huan in huehuentzitzin den
pueblojuani judíos, nochi nijinques
mosentilijque icalteno ne tayecanque
tiopixcat ten monotza Caifás. ⁴Huan
ompa moixejecoltisque se huan ocsé
quenín para quiquitzquisque queme
preso in Jesús ica tacajcayahualis para
quimictisque. ⁵Huan no quinemilijque
ijcuín:

—Cachi cuali ma amo ticchihuacan
axcan, porín mochiutoc ne hueyi iluit
den tajyohuilis huan para ma amo
moyolcucuejmolocan in tagayot.

**Nican tajtoa de queniu se sihuat
de ne pueblo Betania quicuaojxilij
Jesús Temaquixtisque ica aceite ten
semi ajuiyac**

(Mr. 14.3-9; Jn. 12.1-8)

⁶Huan Jesús yetoya tech ne pueblo
Betania campa calyetoya ne Simón
naquen Jesús quipajtijca ya den ninacayo
pajpalanía. ⁷Huan motoquij se sihuat
campa Jesús tacuajtoya huan quicuaojxilij
aceite ica se istacomit ten pexontoya ica
aceite ten cualtzin ajuiyac huan ten semi
patío. ⁸Huan cuac imomachtijcahuan
quitacque ten quichihuac ne sihuat,
ijcuacán yejuan yolcualanque huan
peuque quilfayaj ijcuín:

—¿Queyé, tejua sihuat, ijcón
ticchihua? Ticahuiloj nijín ajuiyacayot.

⁹Ta, cachi cuali ma ticnamacanij
ica míac tomin huan ica nijín tomin
tiquinpalehuisqufaj in taca ten amo teyi
quipíaj ten cuasque.

¹⁰Huan cuac ijcón quijtoayaj,
ijcuacán in Jesús quicayic huan quinilij
ijcuín:

—¿Queyé nanquicuejmoloaj nijín
sihuatzin? Porín nochi nijín ten
nechchiuilí, se cuali tequit. ¹¹Porín
xicmatican de que nachipa namohuan
yetosque ne naquen amo teyi quipía
ten cuasque. Pero nejua amo nachipa
namohuan ninemis nican. ¹²Huan nijín
sihuat nechcuaojxilijtoc ica nijín aceite
den ajuiyacat, huan nijín quichihuac
para ne tonal cuac nechtalpachotihue
tech ne ánimajcal. ¹³De yec melau
ten namechilí que campa yesqui
motetapohuis nijín yancuic tanahuatil
de Dios tech nochi se manahuac, no
ijcón motetapohuis de nijín sihuatzin
ten quichihuac axcan, huan ica nijín
quelnamiquisque ne sihuatzin.

**Nican tajtoa de queniu in Judas
moyectencahuac de quitemactis
Jesús Temaquixtisque inmaco in
tayecanani**

(Mr. 14.10-11; Lc. 22.3-6)

¹⁴Huan senme den majtactionmomen
imomachtijcahuan ten monotza Judas
Iscariote, yejua ne yajqui quinnojnotzato
in tayecanani tiopixcame. ¹⁵Huan Judas
quinilij ijcuín:

—¿Canachi tomin nannechmacasque
para que ma nejua namechmacti Jesús
Temaquixtisque?

Huan in tayecanani quinanquilijque
ijcuín:

—Timitzixtahuilisque sempoal huan
májtacti ica ne istac tomin denario —
yesqui queme valeroa eyi ciento pesos.

¹⁶Huan cuac in Judas quiselij ya in
tomin, ijcuacán yejua pehuac tech ne

tonal de que quitemojtinemía para quenín huelis quitemactis in Jesús inmaco in tayecanani.

**Nican tajtoa de queniu Jesús
Temaquixtisque quinnextilij
imomachtijcahuan de ne Santa Cena**

(Mr. 14.12-25; Lc. 22.7-23;

Jn. 13.21-30; 1 Co. 11.23-26)

¹⁷Huan ijcón queman ajsic ya ne achto tonal den iluit den tajyohuilis cuac quicuayaj pan ten amo quipía tamajmahuilis de levadura, ijcuacán motoquijque imomachtijcahuan huan quitajtoitijque Jesús ijcuín:

—¿Can timonequiltía ma timitzchijchiuilij in tacualis para titacuasque tech ne iluit den tajyohuilis?

¹⁸Ijcuacán in Jesús quinnanquilij ijcuín:

—Xiyacan tech ne pueblo huan xiajsican ichan se tagat huan xiquilican ijcuín: “In Tamachtijque quijtoa que ejcotoc ya ne hora de notajyohuilis huan tech mochantzin nejua nicnequi ma ticchihuacan ne iluitzin den tajyohuilis ihuan nomomachtijcahuan”.

¹⁹Huan imomachtijcahuan yajque quichihuatoj ijcón queme Jesús quinnajnahuatij ya, huan ompa quichijchiuque in tacualis para se iluit den tajyohuilis.

²⁰Huan cuac ne tapoyauteno ya, Jesús motocotzojtzino huan tacuaj ihuan ne majtactionome imomachtijcahuan. ²¹Huan cuac ne tacuajtoyaj ya, ijcuacán Jesús quinilij ijcuín:

—Yec melau ten namechilía de que senme de namejuan nechtemactis inmaco in tayecanani para nechmictisque.

²²Ijcuacán semi moyolcocoayaj ne imomachtijcahuan huan peuque quimatajtoitíaj se huan ocsé huan quilijque ijcuín:

—Notecotzin, ¿xon amo nejua?

²³Huan Yejuatzin quinnanquilij ijcuín:

—Ne naquen pantajaquis tech noplato, yejua ne naquen nechtemactis. ²⁴Yec melau Nejuatzin ya ni Yectagatzin niyás nimomiquilitiu ijcón queme quijtoa in Tajcuilolamatzin. Pero cachi teicneltijque ne tagat naquen nechtemactis Nejuatzin ni Yectagatzin; cachi cuali nojón tagat ma amo yolini nican talticpac.

²⁵Ijcuacán tananquilij in Judas ten quitemactij Jesús huan quilij ijcuín:

—Notamachtijcau, ¿xe nejua yesqui nimitztemactis?

Huan Jesús quinnanquilij:

—Quema, como tejua ijcón tiquijtoa.

²⁶Huan cuac tacuajtoyaj ya, ijcuacán Jesús quicuic in pan huan quitasojcamachilij Ihueyitajtzin, huan satepan quicojcotonac in pan huan quinmajmacac imomachtijcahuan. Huan de ompa quinilij ijcuín:

—Xicuacan nijín pantzin; yejua ne nonacayo.

²⁷Huan de ompa quicuic ocsepa se vaso de vino huan quitasojcamachilij Ihueyitajtzin. Huan quinmajmacac imomachtijcahuan huan quinilij ijcuín:

—Xitayican nijín vino nochi namejuan.

²⁸Porín nijín vino yejua ne noesyotzin. Huan ica nijín vino quitenextía que nimoyectencauca ya ihuan Notajtzin Dios de que mimilahuis noesyotzin, para que ijcón ixnesis que Dios quintapojpoluía miacque den tajtaclejque. ²⁹Pero namechyecquilía que amo ocsepa nitayis oc nijín vino, hasta queman ne tonal cuac tisentayisque cuac Notajtzin Dios momasoutoc namoyoljtic ica ihueyichicahualis.

**Nican Jesús Temaquixtisque
quitematiltij Pedro que yejua quilis
de que amo quixmatis in Jesús**

(Mr. 14.26-31; Lc. 22.31-34; Jn. 13.36-38)

³⁰Huan queman tami cantarojque ya se himno, ijcuacán nochin quisque de

ne cali huan yajque campa se tepepan de monotza Olivos. ³¹Huan ompa Jesús quinilij ijcuín:

—Nochi namejuan nanmomoutisque huan nanmoyolxocolisque porín Nejuatzin tech nijín yohual. Porín ijcón ijcuiliutoc tech in Tajcuilolamatzin de Dios ten quijtoj ijcuín: “Nicojcocos in tapixque huan niichcahuan sejseyacan yasque”.

³²Huan satepan cuac nipanquisas ya niyoltoc intzalan in ánimajme, ijcuacán Nejuatzin niyás namechyecantíyas hasta ne Galileajcopaca.

³³Huan Pedro quinanquilij ijcuín:

—Masqui nochi in tagayot momoutisque huan yolcualanisque por tejuatzin, pero nejua amo.

³⁴Huan ijcón in Jesús quilij ijcuín:

—Yec melau ten nimitzilía que tejua axcan tech nijín tayohuac achtopa que tzajtzis in plotzin, tejua titeilis expa que amo tinechixmati.

³⁵Pero in Pedro quilij:

—Melau masqui mohuan ma nimiquiti, pero amo niquijtos de que amo nimitzixmati.

Huan nochi ijcón quijtojque imomachtijcahuan se huan ocsé.

**Nican tajtoa de queniu Jesús
Temaquixtijque motatatautilij
ihuan Dios tech ne xocomila campa
monotza Getsemaní**

(Mr. 14.32-42; Lc. 22.39-46)

³⁶Huan ijcón ajsicque Jesús ihuan imomachtijcahuan campa itech se xocomila ten monotza Getsemaní. Huan ompa Jesús quinilij ijcuín:

—Ximosehuican nican huan Nejuatzin niyó cachi taixpan nimotatatautiliti ihuan Notajtzin Dios.

³⁷Ijcuacán in Jesús quinuiyac in Pedro huan in ome iconehuan Zebedeo. Huan pehuac Jesús quimachiliaya que tajyohuiyaya tech niyolo huan motayocoltiaya ya. ³⁸Huan ijcón in Jesús quinilij ijcuín:

—Nimachilía tech noyolo de que nitayocolmiqui. Ica ya nojón namejuan ximocahuacan nican pero xiisatocan nohuan.

³⁹Huan ijcón in Jesús yajqui cachi taixpan huan ompa motancuaquetzato huan motentocato talixco huan ompa motatatautilito ihuan Itajtzin huan quiliaya ijcuín:

—Nohueyitajtzin, como ijcón mopaquilis, xinechonajchihiuli nijín tajyohuilis. Pero ma amo mochihua queme nejua nicnequi. Ta, ma mochihua ijcón queme Tejuatzin ticonmonequiltía.

⁴⁰Huan de ompa mocuepac Jesús quinitato campa yetoyaj ne imomachtijcahuan, huan quinajsito cocochtocque huan Jesús quilij in Pedro ijcuín:

—¿Queyé amo nanuelque nanixpetantosquíaj nohuan siquiera se hora?

⁴¹Huan ocsepa Jesús quinilij ijcuín:

—Nican xiyetocan xiixpetantocan huan ximotatatautilijtocan ihuan Dios para que ma amo nanuetzisque tech in ohuijcyot de que in Satanás mitzichtacahuis. De yec melau ten namechilía de que namoyoljuan quipíaj tanejnequilis de cuali, pero cuetautoc namochicahualis porín amo nanquipíaj in yec tacuautamatilis. Ica ya nojón amo huali nanquichihua ten cuali.

⁴²Huan ijcón ica ojpa yajqui Jesús motatatautilito ihuan Dios ocsepa ijcuín:

—Notajtzin, como semi monequis de que nejua niquijyohuis nijín ohuijcyot, pues sayó xiconchihua queme Tejuatzin ticonmonequiltía.

⁴³Huan ijcón niman ocsepa mocuepac Jesús campa yetoyaj imomachtijcahuan huan ocsepa quinajsito cocochtocque ne imomachtijcahuan porín ninixtololohuan ixtatzacuíaj ica

in cochilis. ⁴⁴Huan ocsepa ompa quincateu huan yajqui ica expa huan motatatautilito ihuan Dios ica mismo tajtolme de ne achtopa quijtojca ya.

⁴⁵Huan ijcón ocsepa mocuepac Jesús campá yetoyaj imomachtijcahuan huan quinilij ijcuín:

—Axcan huelis para nancochisque ya, huan ximosehuican ya. Porín ejcóc ya in hora de Nejuatzin ni Yectagatzin nechtemactisque inmaco ne tagayot den tajtaclejque para nechmictisque.

⁴⁶Huan niman ximoquetzacan huan tiyohue; porín huitza ya ne naquen nechtemactis inmaco in tayecanani.

**Nican tajtoa de queniu in tayecanani
judíos quiquitziyque Jesús
Temaquixtijque queme preso**

(Mr. 14.43-50; Lc. 22.47-53; Jn. 18.2-11)

⁴⁷Huan queman Jesús tajtojtoya oc ihuan imomachtijcahuan, ijcuacán ejcóc in Judas senme de ne majtactionome imomachtijcahuan. Huan ne Judas quinquacuía míac tagayot ten cualcuíaj machete huan cuoume. Hualajque intencopaca ne tayecanani tiopixcame huan in huehuentzitzin den pueblojani judíos.

⁴⁸Huan in Judas ne naquen quitemactij Jesús quinilijca ya in tayecanani ijcuín:

—Cuac nanquitasque que nictennamiquis, ijcuacán xicmatican que yejua ya ne Jesús; xiquitzquican huan xictzicocan.

⁴⁹Huan ijcón in Judas motoquij campá Jesús yetoya huan quilij ijcuín:

—¿Quenín tiontayohuac, Notamachtijcau?

Huan niman Judas quiquechnahuaj huan quitenamic in Jesús. ⁵⁰Ijcuacán in Jesús quinanquilij ijcuín:

—Nocnitzin, ¿tonica tejua tihuitza?

Ijcuacán nimantzín in tagayot motoquijque huan quimatziytzicojque Jesús huan cuiyacque queme preso.

⁵¹Pero mochihuac de que senme

den ihuan yetoya in Jesús quiquixtij nimachete, huan quincascotonac in taquehual de ne cachi hueyi tiopixcat.

⁵²Huan ijcón in Jesús quiluij ijcuín:

—Xicyectali momachete campá tiquiehua. Porín nochi naquen motehuis ica machete, yejua ne no ica machete miquis.

⁵³Huan Jesús quinilij in tagayot ijcuín:

—¿Xe amo ticmati de que Nejuatzin nihuelis nictajtánis Nohueyitajtzin huan Yejuatzin nechinuáltitanilis majtactionome pantime de ángeles? Huan se panti quipá majtactionome mil ángeles. ⁵⁴Pero tacán ijcón nicchihuasquía, ijcuacán amo mochihuasquía ne ten in Tajcuilolamatzin de Dios quijtoa que monequi motamichihuas.

⁵⁵Huan Jesús ocsepa quinilij in tagayot ijcuín:

—Namejuan nanualajque ica machete huan ica cuohuit para nannechquitzquisque, queme yesquía nejua nitachteque san. Mosta mosta nimotaliaya namohuan tiopanijtíc huan namechmachtiaya; huan amo queman nannechquitzquijque para ma xinechtzitzicocan.

⁵⁶Huan nochi nijín mochihuac para ma motamichihuas ijcón queme tacuilojcaj in tanahuatiani de Dios. Huan ijcón nochi ne imomachtijcahuan quichocholohuilijque Jesús huan Yejuatzin mocahuac iselti.

**Nican tajtoa de queniu cuiyacque
Jesús Temaquixtijque inixpan in
tayecanani judíos**

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷Huan ne taca quiquitziyque Jesús huan cuiyacque inixpan ne hueyi tayecanque tiopixcat ten monotza Caifás, huan ompa no mosentilijque ne tanextiliani den tanahuatil de

Moisés huan ne huehuentzitzin den pueblojuani judíos. ⁵⁸Huan in Pedro quitoctiliaya huejca san hasta ajsicque icaltenixpan nichan ne hueyi tiopixcat. Huan in Pedro calayic caltampa huan motalij campa in mayolme para quitasquía toni quichi huilisque in Jesús.

⁵⁹Huan in tayecanani tiopixcame huan in huehuentzitzin den judíos huan nochi ocseque tamachilejque ten pohuáj ihuan in hueyi tequihuani, nochi nijinques mosentilijque huan quiyoltemoayaj tensá tajtacol para quipajpantisquáj Jesús, para ijcón huelisquía quitelchihuasque huan quimictisque Yejuatzin. ⁶⁰Huan masqui ijcón quichiuque, pero amo teyi cajxiliayaj, masqui miacque quipajpantiayaj Jesús ten amo melau. Huan cachi satepan hualajque ome taca para quitechtisque Jesús ica tajtolme ten amo melau. ⁶¹Huan yejuan quilijque ijcuín:

—Nijín tagat Jesús quijtoaya ijcuín: “Nejua nihuelis nicuejelos in tiopan de Dios huan ipan eyi tonal nicchijchihuas ocsepa”.

⁶²Huan ijcón in tayecanque tiopixcat moquetzac huan quilij Jesús ijcuín:

—¿Queyé amo teyi ica titananquilía? ¿Toni mitzijtohuilijtocque nijín ome testigos?

⁶³Huan in Jesús motentamatilij san. Huan cachi oc in tayecanque tiopixcat quilij ijcuín:

—Nimitzchicaucanajnahuatía ica itocaytzin den Tohueyitajtzin Dios ten yoltica que “Quitztica Dios”, xitechyequili cox tejuatzin ya in Cristo Temaquixtijque, in Teconetzin de Dios.

⁶⁴Huan in Jesús tananquilij ijcuín:

—Quema, Nejuatzin ya in Cristo ijcón queme tejuatzin tiquijtoa. Huan no namechilía que nannechitasque Nejuatzin ni Yectagatzin cuac nimotalitui iyecmacopaca ica in chichahualis den Totajtzin Dios. Huan

no nannechitasque cuac nimohualuicas mixtzalan nepa ejecaixco.

⁶⁵Huan ijcón ne tayecanque tiopixcat cualanic huan pehuac momojmotzoaya ica ne itilma; ijcón quichi huac porín quixejecoj que Jesús quihuajuicaltij Totajtzin Dios. Huan de ompa quinilij ijcuín:

—Nijín tagat quihuajuicaltij Dios ica itajtoluan. ¿Para toni ticnequij ocsé tagat ma quipajpantiqui oc? Porín namejuan cuali nanquicactocque ya de nijín tajtolme tenica quihuajuicaltij Dios. ⁶⁶Huan, ¿toni nanquixejecoj namejuan?

Huan tananquilijque in tayecanani ijcuín:

—Tejuan timoixejecoltíaj de que cachi cuali ma miqui nijín tagat.

⁶⁷Huan ijcón peuque quixchichijchaj Jesús huan quixtajtatziniayaj huan cuitequáj. ⁶⁸Huan quiliayaj Jesús ijcuín:

—Como teja in Cristo, xiquixejeco aconi mitzmagatoc.

Nican tajtoa de queni in Pedro quinilij in tacaquini que yejua amo quixmati in Jesús Temaquixtijque

(Mr. 14.66-72; Lc. 22.56-62;

Jn. 18.15-18, 25-27)

⁶⁹Huan ijcón in Pedro tocotzyetoya nepa caltampa huan mochihuac que hualcalanquisac se sihuat den tetixilijque huan quilij Pedro ijcuín:

—Tej no tinemía ihuan ne Jesús den Galilea.

⁷⁰Huan in Pedro quitatij ten melau huan senteixpan quilij ijcuín:

—Amo nicajscamati tonica tinechnojnotztoc.

⁷¹Huan cuac in Pedro calan quistiaya ya, ijcuacón ne calampa ya ocsé tetixilijque quitac Pedro huan quinilij ne naquen tocotzyetoyaj caltampa:

—Ne tagat no ihuan nemía ne Jesús de Nazaret.

⁷²Huan ijcón ocsepa in Pedro quitatij ten melau huan quiniij ijcuín:

—“Quitztica Dios” que amo niquixmati ne tagat.

⁷³Huan cachi nimampa sequi taca ten ompa yetoyaj ya huan motoquijque campa in Pedro huan quilijque ijcuín:

—Tejua, yec melau ixnesí que no ticayot de ne Galilea, ompa tipohui porín mocaqui motajtolis sansé ijcón que me Yejuatzin tajtoa.

⁷⁴Ijcuacán in Pedro pehuac cachi oc tahuijuicaltía huan quiniij ocsepa ijcuín:

—Melau “Quitztica Dios” que ne tagat amo niquixmati.

Huan de ompa nimantzin pehuac tzajtzi ya in piotzin. ⁷⁵Huan ijcón in Pedro quelnamic ten Jesús quiluijca ya ne achtopa: “Yec melau que achtopa ya que tzajtzisquía in piotzin, tejua tiquijtos expa de que amo tinexchixmati”. Huan ijcón in Pedro calan quisac huan pehuac semi mochojchoctía ilihuis.

Nican tajtoa de queniu Jesús Temaquixtijque ajsic campa in hueyi chiuque Pilato

(Mr. 15.1; Lc. 23.1-2; Jn. 18.28-32)

27 Huan cuac tanesic ya, ijcuacán nochi in tayecanani tiopixcame huan in huehuentzitzin den pueblojuani judíos, yejuan nojonques mosentilijque huan moyectencauque de que quimictisque Jesús. ²Huan ijcón cuiyacque Jesús tzicautiaya huan quitemactijque imaco in hueyi chiuque ne tayecanque Poncio Pilato.

Nican tajtoa de queniu in Judas miquic.

³Huan ijcón in Judas cuac quitac de que quitelchiuque ya Jesús ma quimictican, ijcuacán yejua moyolcocoj ya huan moyolnemiliaya porín quitemactij ya Jesús. Huan

yajqui nimantzin quitemactito in sempoal huan májtacti istac tomin de ne tayecanani tiopixcame huan in huehuentzitzin den pueblojuani den judíos. ⁴Ijcuacán in Judas quiniij ne tayecanani ijcuín:

—Nimotajtacolmacac ya porín nictemactij ne yectica tagat para ma quimictican.

Huan yejuan quinanquilijque ijcuín:

—Huan tejuan, ¿toni totequiu oc? Pues amo totequiu oc tejuan. Ta, tejua san a ver toni ticchihua ica nojón tomin.

⁵Ijcuacán in Judas ica calijtic tacuamotac ne istac tomin den tiopixcame, huan quisteu huan yajqui huan moquechilpito ica se laso, huan ompa miyic. ⁶Huan ne tayecanani tiopixcame quiajocuicque ne tomin huan quijtojqe ijcuín:

—Amo huelis ma ticsentilican nijín tomin campa monechicoa in tomin ten in tagayot quitemacaj para Dios. Porín nijín tomin yejua ne in taxtahuil para quimictisque se tagat.

⁷Huan ijcón niman in tayecanani moixejecoltijque huan moyectencauque que cachi cuali ica ne tomin ma quicohuasque se tal den se tagat soquiconchiuque para ma quipiacan campa quintalpachosque in ánimajme den amo nican cayome.

⁸Ica ya nojón hasta axcan ne tal monotza ijcuín: in tal quicouque ica taxtahuil tenica quimictijque se tagat. ⁹Huan ijcón mochihuac ten quijcuilojca ya ne tanahuatijque Jeremías cuac quijtojca ijcuín:

“Huan teconejuan den pueblojuani Israel quitalijque que se tagat ipatui sempoal huan májtacti tomin, huan quicuicque ne tomin, ¹⁰huan ijcón quicouque ne tal campa tequitía ne soquiconchiuque. Huan ijcón mochihuac porín quimonequiltij in Totecotzin”.

**Nican tajtoa de queniu Pilato
quimatajtoltij Jesús Temaquixtíjque**
(Mr. 15.2-5; Lc. 23.3-5; Jn. 18.33-38)

¹¹Huan ipa cuiyacque ya Jesús iixpan in hueyi tequihua Pilato huan yejua pehuac quimatajtoltij Jesús ijcuín:
—¿Xe tejua ya in tayecanque de nochi in judíos?

Ijcuacón in Jesús tananquiliij ijcuín:
—Quema, ijcón queme tejuatzin tiquijtoa.

¹²Huan cuac in tayecanani tiopixcame huan in huehuentzitzin den judíos quicacque in tananquiliis de Jesús, ijcuacón yejuan cachi oc quiteteluiliayaj huan quipajpantiayaj de míac tataman; pero Jesús sayó motentamatilij huan amo teyi ica tananquiliij. ¹³Huan in Pilato ocsepa quilij ijcuín:

—¿Xe amo ticaqui nochi nijín ne teluililis tenica mitzpajpantíaj?

¹⁴Pero Jesús sayó motentamatilij huan nión teyi ica tananquiliij. Ijcuacón in tayecanque Pilato quimoucaitac huan amo quimatía oc toni quichihuas oc.

**Nican tajtoa de queniu quitelchíuque
Jesús Temaquixtíjque de que ma
quimictican**

(Mr. 15.6-20; Lc. 23.13-25; Jn. 18.38—19.16)

¹⁵Huan tech ne tonalme den iluit ipa mochiutihuitz que in tequihua Pilato quincahuilía in pueblojuani judíos se tagat preso naquen yejuan quijitasquíaj. ¹⁶Huan ne tonal tzactoya se tagat se preso monotza ya Barrabás den nochi quixmatíaj. ¹⁷Huan ijcón cuac mosentilijque ya in tayecanani, ijcuacón in tequihua Pilato quintajtoltij in tagayot ocsepa ijcuín:

—Namejuan tagayot, ¿catiyejua preso nanquinequij ma nicajcahua? ¿Cox yejua ne preso Barrabás, oso yejua Jesús den monotza Cristo?

¹⁸Porín Pilato ipa cajsicamatic ya de que ica ne xijcolot in tayecanani quitemactijque Jesús para ma quimictican. ¹⁹Huan cuac in Pilato tocotzyetoya campa ne quinixejecoa in moteteluiliani, ijcuacón isihuau in Pilato quinhuatiliqui ijcuín:
“Amo teyica ximocalaqui ica ne tagat ten yolcuali, porín yalao tayohuac nejua nechmomoutiaya huan nechtajyohuiltiaya porín nicojcochitztoya de ne Jesús”.

²⁰Huan in tayecanani tiopixcame huan in huehuentzintzin den judíos quintaneltoctijque nochi in tagayot de que ma quitajtanilican in Pilato de que ma quitojtomacan ne Barrabás huan ma quimictican Jesús. ²¹Huan ijcón in Pilato ocsepa quinnojnotzac huan quintajtoltij in pueblojuani ijcuín:

—¿Catiyejua de nijín omen presos nanquinequij namejuan ma nictojtoma ma yohui?

Ijcuacón in pueblojuani quijtojque ijcuín:

—Yejua ne Barrabás.

²²Huan Pilato ocsepa quintajtoltij in pueblojuani ijcuín:

—Huan como nictojtoma Barrabás ma yohui, ¿toni nicchihuilis Jesús den monotza Cristo?

Ijcuacón nochi in pueblojuani tananquiliijque ijcuín:

—¡Xicuoupampilocan in Jesús!

²³Huan in Pilato ocsepa quinilij in pueblojuani ijcuín:

—¿Toni tajtacol quichihuac nijín Jesús?

Ijcuacón in pueblojuani cachi oc tzajtzíaj huan quijtoayaj ijcuín:

—¡Xicuoupampilocan in Jesús!

²⁴Huan quitac in Pilato de que amo teyi cuatiaya oc nitajtol. Ta, cachi oc moyolcuemoloayaj san yejuan in pueblojuani judíos. Ijcuacón in Pilato tanahuatij ma cualcuilican at para ma momajtequi senteixpan nochi in tagayot huan quinilij ijcuín:

—Pues nejua amo xinechtechtican que nejua nitanahuatij que xicmictican nijín tagat den yolcuali. Ta, namejuan namotanemililis cuica in tajtacol.

²⁵Huan nochi in tagayot tananquilijque ijcuín:

—Tejuan huan toconejuan titananquilíaj por ne miquilis den ne yolcuali Jesús.

²⁶Huan ijcón quitojtonque de que ma yohui in preso Barrabás. Huan niman tatitanic ma cuitequican Jesús huan quitemacti ma quicuoupampilocan Yejuatzin. ²⁷Huan cachi satepan in taquehualme soldados den hueyi tequihua Pilato cuiyacque Jesús ichan Pilato campa hueyi caltampa. Huan de ompa quinsentilijque ocsepa in soldados huan nochin quiyehualojque in Jesús. ²⁸Huan de ompa quitaquenquixtijque Jesús huan quiquentijque se tilma chichiltic.

²⁹Huan ompa quiquejuelojque Jesús huan quicuatalilijque se taijquilit de huitzti ten yohualtic queme se corona. Huan quimaquitzquiltijque Jesús se topil iyecmacopaca huan motancuaquetzque iixpan huan quiquejueloayaj huan quiluiayaj ijcuín:

—Ma amo queman timiquis, tejua titayecanque den judíos.

³⁰Huan no quixchichayaj Jesús huan no quicuijque se acat huan quicuahuijuitequíaj Yejuatzin. ³¹Huan niman cuac quitamiquejuelojque ya, ijcuacán quiquixtilijque ne chichiltima huan quitalilijque ocsepa itilma. Huan de ompa cuiyacque huan quicuoupampilotoj.

**Nican tajtoa de queniu
quicuoupampilojque Jesús
Temaquixtijque**

(Mr. 15.21-32; Lc. 23.26-43; Jn. 19.17-27)

³²Huan cuac sen quistiayaj caltempan in soldados ihuan Jesús, ijcuacán quinamicque se tagat

monotza Simón, ipueblo Cirene, huan quifuerzahuijque de que ma no quimama ne colotzin ten cuiyac ya in Jesús. ³³Huan ijcón ajsicque tech ne tal lomojtzin ten monotza Gólgota, den quijosnequi miquetzontecomatan. ³⁴Huan de ompa quitayiltijque Jesús vinagre tamanelol ica cuouchoquilot. Huan Jesús cuac quitenyecoj ya, ijcuacán amo quineyic tayis.

³⁵Huan cuac ne Jesús quisojsoque ya ica clavos tech ne colotzin, ijcuacán in soldados quichiuque ne tatanilis para quitasquía de catiyejua tasal de Jesús cuicasquía cada soldado. Huan ijcón mochihuac ten quijcuiloy ne tanahuatijque de Dios cuac quijtoj ijcuín: “Moxejxelo huilijque se huan ocsé notilmajuan huan quichiuque ne tatanilis para quitasquía aconicuasquía nochi notilma”. ³⁶Huan niman motalijque ompa in soldados para quipiasque Yejuatzin campa yetoya. ³⁷Huan tech ne ixcuaco in colotzin quitalijque sequi tajtolme tenica quitelchiuque Jesús, huan ne tajtol quijtoaya ijcuín: “Yejua nijín Jesús, Tayecanque den judíos”.

³⁸Huan no quincuoupampiloyque inajnacastampa Jesús ome tachtequini, se iyecmacopaca huan in ocsé iopochcopaca. ³⁹Huan in pueblojuani ten panoayaj taixpampa Jesús mocuahuihuicatoyaj huan yejuan quiquejueloayaj san Jesús huan quiliayaj ijcuín:

⁴⁰—Tejua tiquijtoaya que ticuejuelos in tiopan de Dios huan ipa eyi tonal ocsepa ticchihuas. Pero axcan ximomaquixti tejua moselti san.

⁴¹Huan no ijcón quiquejueloayaj Jesús nochi in tayecanani tiopixcame huan in tanextiliani den tanahuatil de Moisés, huan in fariseos huan in huehuentzitzin den pueblojuani de judíos. ⁴²Huan ijcón yejuan moyoliliayaj de Jesús ijcuín:

—Achá yejua quinmaquixtij ocsequin tagayot, pero yejua iselti amo huelis momaquixtis. Pero melau como yejua ne in Tayecanque de Israel, pues ma temo tech ne colotzin; huan ijcón ticneltocasque de que melau yejua in Cristo Temaquixtijque. ⁴³Yejua ne Jesús quijtoj que tacuautamatij tech ne Ihueyitajtzin Dios, pues achá Itajtzin Dios quimaquixtis axcan mismo como melau quitasojta, porín techilía que yejua Teconetzin de Dios.

⁴⁴Huan no ijcón quiquejqueloayaj Jesús ne ome tachtequini den ihuan quincuoupampilojque Yejuatzin.

Nican tajtoa de que Jesús Temaquixtijque momiquilij

(Mr. 15.33-41; Lc. 23.44-49; Jn. 19.28-30)

⁴⁵Huan mochihuac que tayohuayantijtoya nochi in talticpac desde ne cuac nepanta hasta ne eyi hora de tiotac. ⁴⁶Huan cuac ne eyi hora de tiotac, ijcuacón Jesús tzajtzc chicahuac huan quijtoaya ijcuín:

—Elí, Elí, ¿lama sabactani? —
quijtosnequi: No Dios no Dios, ¿queyé tinechsenahuac?

⁴⁷Huan in ocsequin ten yetoyaj ompa quicacque itzajtzilis huan quijtoaya ijcuín:

—Nijín tagat quinoztoc ne tanahuatijque de Dios ten monotza Elías.

⁴⁸Huan nimantzin senme den yetoya ompa, yejua cuitihuetzito se tilma ten posotcic huan cajaqui tech vino den chichic huan quiyecapantalilij ica se acat; huan de ompa quitenajxiltij Jesús para ma yejua quichichinani. ⁴⁹Huan in ocsequin ten ompa yetoyaj quijtojque ijcuín:

—Xicahuacan ma tiquitacan cox hualas oc ne Elías tanahuatijque para quipalehuiqui.

⁵⁰Huan ocsepa in Jesús tzajtzc chicahuac huan ijcón momiquilij.

⁵¹Huan ne tasal ten pilcatoya ne tiopanijtic campa in altar, yejua ne ixtzayanic huan ome quisac de ajco huan hasta tani. Huan talolinic huan ijcón in teme tajtapanque nochi. ⁵²Huan motapouque ne tepanme campa talpachiutoyaj in ánimajme huan sequin taneltocani panquisque yoltocque ne ten achtopa momiquilijque. Huan ijcón quisque in ánimajme itech ne tepancalme. ⁵³Huan nimampa de que cuac panquisac ya Jesús yoltoc intzalan in ánimajme, ijcuacón ne taneltocani den quisque tech ne ánimaj tepancalme, yejuan yajque tech ne mohuiscapueblo de Jerusalén campa miacque tagayot quinnextilijque. ⁵⁴Huan se tayecanque soldado huan ocsequin in soldados quipixtoyaj Jesús. Huan cuac quimachilijque de que talolinic ya huan quitacque nochi mías tenesi den mochihuac, ijcuacón yejuan semi moyolmoutijque huan quijtojque ijcuín: —Yec melau nijín tagatzin Teconetzin de Dios.

⁵⁵Huan ompa yetoyaj mías sihuame huejca san ontachixtoyaj. Huan yejuan ipa quitoctiliayaj Yejuatzin in Jesús porín quisenuicatinemíaj desde ne Galilea huan quitequiltiayaj Jesús. ⁵⁶Huan ompa yetoyaj in María Magdalena, huan in María inan den Jacobo huan de José, huan no yetoya itenan den teconehuan de Zebedeo.

Nican tajtoa de queniu Jesús Temaquixtijque quitalpachojque

(Mr. 15: 42-47; Lc. 23.50-56; Jn. 19.38-42)

⁵⁷Huan cuac tapoyahuic ya, ijcuacón huala se tagat ten quiapiaya mías tenesi ten niaxa, huan yejua monotzaya José ipueblo Arimatea. ⁵⁸Yejua ipa quitoctiliaya Jesús queme imomachtijcau. Huan in José yajqui quitato in hueyi chiuque Pilato huan quitajtanilito inacayo in Jesús.

Huan ijcón in Pilato tanahuatij ma quimacacan. ⁵⁹Huan ijcón in José quicuic inacayo Jesús huan quitetziloy ica se hueyi istac tilma den chipahuac. ⁶⁰Huan yejua cuiyac quicalaquito inacayo in Jesús campa tecoyoc campa iaxca catca. ⁶¹Porín ipa quicoyonijcaj ya in tepet. Huan quixoloncucpac se hueyi tet para ica quitzacuas ne tecoyoc huan de ompa yajqui. Huan no ompa yetoyaj María Magdalena huan in ocsé María, huan yejuan tocotzyetoyaj ixpampa ne campa tecoyoc.

**Nican tajtoa de queniu soldados
tajpixtoyaj campa Jesús
Temaquixtijque campa ne tecoyoc**

⁶²Huan imostica cuac tanesic ya, satepan cuac in judíos moyeyectaliayaj para ne iluit de nesehuilistonal, ijcuacán in tayecanani tiopixcame huan in fariseos mosentilijque huan de ompa quitatoj in tayecanque Pilato. ⁶³Huan quilijque ijcuín:

—Totecotzin, tiquelnamicque que ne tacajcayauque Jesús quiytoaya cuac nemía nican talticpac de que ipan eyi tonal panquisas yoltoc intzalan in ánimajme. ⁶⁴Ica ya nojón xitanahuati de que ma quiyecpiatij nepa campa toctoc Jesús hasta ma ajsi in eyi tonal, huan para ma amo hualacan imomachtijcahuan huan quichtequiquihue inacayo Jesús. Porín como quichihuasquíaj, ijcuacán yejuan quinilisque in pueblojuani de que panquisac ya yoltoc in Jesús intzalan in ánimajme. ⁶⁵Huan como ijcón mochihuasquía nijín xolopijyot, cachi hueyi yesqui huan que ne achtopa catca, cuac yejuan quitetapohuijtinemíaj de que yejua in Cristo Temaquixtijque.

Huan ijcón in Pilato quinilij ijcuín:

—Namechinmactilía nijín soldados para ma tajpiacan. Huan namejuan xiquinuiyacan nijín soldados huan ompa ma quiyecpiatij huan ma

quiyectzacuatij in tecoyoc ijcón queme namejuan nanquinequij ma mochihua.

⁶⁶Huan ijcón in soldados yajque huan quiyectentzacuatoy in tecoyoc campa toctoc ya Jesús. Huan de ompa quisellarojque in tet huan ompa quincaque in soldados de que ma tajpiacan.

**Nican tajtoa de queniu Jesús
Temaquixtijque panquisas yoltoc
intzalan in ánimajme**

(Mr. 16.1-8; Lc. 24.1-12; Jn. 20.1-10)

28 Huan panoc ya ne sehuilistonal den sábado huan imostica san tanesic, yej ne tayecana tonal den semana, yej ne axcan domingo. Ijcuacán ne tonal yajque in María Magdalena huan ocsé María quitatoj ne hueyi tecoyoc campa toctoaya Jesús. ²Huan niman semi chicaucatalolinic porín temoc den ne eluiyactzinco se taquehual ángel de Dios huan ajsic campa tecoyoc huan quixoloncucpac in hueyi tet tenica tentzactoya in tecoyoc; huan de ompa motalij panían. ³Huan ne ángel ixmilinía queme cuac se quita tapejpetani huan tatanextía nohuiyan. Huan ne itaquen in ángel catca cachi istac huan que secti. ⁴Huan cuac in soldados quitacque nochi nijín ten mochihuac, ijcuacán yejuan semi motelyolmoutíaj huan hasta peuque cuecuetacayaj; huan de ompa mocauque queme yesquíaj amo talnamiquíaj oc. ⁵Huan ijcón ne ángel quinilij ne sihuame ijcuín:

—Amo ximomoutican; porín nejua nicmati que namejuan nanquitemouaj Jesús de ne quicuoupampilojcaj. ⁶Huan axcan amo yetoc oc nican. Ta, axcan Yejuatzin panquisac ya yoltoc intzalan in ánimajme, ijcón queme quijtoja ya ne achtopa ya. Xihualacan nican huan xiquitaquij campa quinalcalaquijcaj in Totecotzin tech in tecoyoc. ⁷Huan axcan niman xiyacan huan xiquintapohuitij ne imomachtijcahuan de que in

Jesús panquisac ya yoltoc intzalan in ánimajme. Huan yequintzin Yejuatzin namechyecanati hasta ne Galileajcopaca huan ompa nanquitasque. Huan yejua san nijín monequía namechilis.

⁸Huan ijcón in sihuame moucaquisteuque campa ne tecoyoc pero no moyolpactijtiayaj. Huan niman yajque motalojque huan quintapohuitoj imomachtijcahuan Jesús. ⁹Huan cuac yayaj ya para quintapohuitij ne imomachtijcahuan, ijcuacón in Jesús quinmonextilij inixpan in sihuame huan quilij ijcuín:

—Axcan nihuala namechtajpaloco san.

Huan in sihuame motoquijque huan motancuaquetzque huan quimetzquitzquijque para quimohuistilisque. ¹⁰Huan Jesús quinilij ijcuín:

—Amo ximomoutican. Ta, xiyacan xiquinnejmachtitij nocnihuan de que monequi ma xiyacan tech ne pueblo Galileajcopaca huan ompa nannechitasque.

**Nican tajtoa de queniu in soldados
romanos quincajcayauque
in tayecanani judíos de toni
mochihuac campa ánimajtecoch**

¹¹Huan cuac in sihuame yajque ya, ijcuacón ne soldados no yajque Jerusalén quintapohuitoj in tayecanani tiopixcame nochi ten mochihuac huan nochi ten quitacque yejuan. ¹²Huan ijcón in tayecanani yajque mosentilitoj ihuan in huehuentzitzin huan ompa moixejecoltijque toni quichihuasquíaj. Huan ijcón niman motajtolmacacque de que quintaxtahuisque ica mícac tomin in soldados huan melau ijcón quichiuque huan quinnahuatijque ijcuín:

¹³—Namejuan sayó xiquijtoca in ijcuín: “Cuac ne tayohuac ya, cuac tejuan ticochtoyaj ya, ijcuacón hualajque imomachtijcahuan in Jesús huan quichtequicoj inacayo”.

¹⁴Huan ijcón in tayecanani ocsepa quinilijque in soldados:

—Tacán in tayecanque Pilato ejcos in momento de que quimatis, ijcuacón tejuan ticmatij queniu para tictaneltoctisque den nochi den nijín mochihuac huan ijcón huelis tamechpalehuisque.

¹⁵Huan ijcón in soldados quiselijque ne tomin huan yajque quichihuatoj ijcón queme quinilijque in tayecanani. Huan nochi ijcón quintetapohuiayaj in judíos desde ne tonal huan hasta axcan que ijcón mochihuac.

**Nican tajtoa de queniu Jesús
Temaquixtijque quinquimactij
imomachtijcahuan**

(Mr. 16.14-18; Lc. 24.36-49; Jn. 20.19-23)

¹⁶Huan ijcón in majtactionés imomachtijcahuan in Jesús yajque ne Galileajcopaca tech ne tepelomo campa Jesús quinilijca ya de que ma yanij.

¹⁷Huan ijcón cuac quitacque Jesús, ijcuacón peuque quimohuistiliayaj, masqui ayamo yec tacuautamatiayaj.

¹⁸Huan ijcón in Jesús motoquij campa yetoyaj imomachtijcahuan huan quinilij ijcuín:

—Notajtzin Dios nechmactilij ya nochi in tanahuatil tech in eluiyactzinco huan nican talticpac.

¹⁹Huan axcan xiyacan nochi tech in senmanahuac huan xiquinnextilican nochi in talticpacuani ma yejuan no ma mochihuacan nomomachtijcahuan. Huan xiquinahuijtinemican ica itocaytzin de Tohueyitajtzin Dios huan de Iconetzin Dios huan de in Yecticatzin Espíritu.

²⁰Huan xiquinmactican de que ma tatacamatican nochi ica in tanextililisme ten namechnajnahuatíaj ma no xicchihuacan. Huan xicmatican que Nejuatzin niyetos nachipa namohuan desde axcan huan hasta cuac tamis in talticpac. Amén.